

Rigveda Mandala 7

——
ऋग्वेदः मण्डलं ७

——
Document Information



Text title : Rigveda Mandalam 7

File name : r07.itx

Category : veda, rigveda, svara

Location : doc_veda

Author : Vedic Tradition

Transliterated by : 1. Source: Aufrecht/van Nooten/Holland (Samhita), 2. Final transliteration:

Detlef Eichler

Proofread by : Detlef Eichler detlefeichler at gmail.com

Latest update : July 2, 2013

Send corrections to : detlefeichler@googlemail.com, sanskrit@cheerful.com


This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

Please help to maintain respect for volunteer spirit.

Please note that proofreading is done using Devanagari version and other language/scripts are generated using **sanscript**.

October 2, 2020

sanskritdocuments.org



ऋग्वेदः मण्डलं ७



अग्निं नरो दीधितिभिररण्योर्हस्तच्युती जनयन्त प्रशस्तम् ।
दूरेदृशं गृहपतिमथर्युम् ॥ ७.००१.०१
तमग्निमस्ते वसवो न्यृण्वन्सुप्रतिचक्षमवसे कुतश्चित् ।
दक्षाय्यो यो दम आस नित्यः ॥ ७.००१.०२
प्रेद्धो अग्ने दीदिहि पुरो नोऽजस्रया सूम्या यविष्ठ ।
त्वां शश्वन्त उप यन्ति वाजाः ॥ ७.००१.०३
प्र ते अग्नयोऽग्निभ्यो वरं निः सुवीरासः शोशुचन्त द्युमन्तः ।
यत्रा नरः समासते सुजाताः ॥ ७.००१.०४
दा नो अग्ने धिया रयिं सुवीरं स्वपत्यं सहस्य प्रशस्तम् ।
न यं यावा तरति यातुमावान् ॥ ७.००१.०५
उप यमेति युवतिः सुदक्ष दोषा वस्तोर्हविष्मती घृताची ।
उप स्वैनमरमतिर्वसूयुः ॥ ७.००१.०६
विश्वा अग्नेऽप दहारातीर्येभिस्तपोभिरदहो जरूथम् ।
प्र निस्वरं चातयस्वामीवाम् ॥ ७.००१.०७
आ यस्ते अग्न इधते अनीकं वसिष्ठ शुक्र दीदिवः पावक ।
उतो न एभिः स्तवथैरिह स्याः ॥ ७.००१.०८
वि ये ते अग्ने भेजिरे अनीकं मर्ता नरः पित्र्यासः पुरुत्रा ।
उतो न एभिः सुमना इह स्याः ॥ ७.००१.०९
इमे नरो वृत्रहत्येषु शूरा विश्वा अदेवीरभि सन्तु मायाः ।
ये मे धियं पनयन्त प्रशस्ताम् ॥ ७.००१.१०
मा शूने अग्ने नि षदाम नृणां माशेषसोऽवीरता परि त्वा ।
प्रजावतीषु दुर्यासु दुर्य ॥ ७.००१.११

यमश्ची नित्यमुपयाति यज्ञं प्रजावन्तं स्वपत्यं क्षयं नः ।
स्वजन्मना शेषसा वावृधानम् ॥ ७.००१.१२
पाहि नो अग्ने रक्षसो अजुष्टात्पाहि धूर्तेरररुषो अघायोः ।
त्वा युजा पृतनायूरभि ष्याम् ॥ ७.००१.१३
सेदग्निरग्निरत्यस्त्वन्यान्यत्र वाजी तनयो वीळुपाणिः ।
सहस्रपाथा अक्षरा समेति ॥ ७.००१.१४
सेदग्निर्यो वनुष्यतो निपाति समेद्धारमंहस उरुष्यात् ।
सुजातासः परि चरन्ति वीराः ॥ ७.००१.१५
अयं सो अग्निराहुतः पुरुत्रा यमीशानः समिदिन्धे हविष्मान् ।
परि यमेत्यध्वरेषु होता ॥ ७.००१.१६
त्वे अग्न आहवनानि भूरीशानास आ जुहुयाम नित्या ।
उभा कृण्वन्तो वहतू मियेधे ॥ ७.००१.१७
इमो अग्ने वीततमानि हव्याजस्रो वक्षि देवतातिमच्छ ।
प्रति न ईं सुरभीणि व्यन्तु ॥ ७.००१.१८
मा नो अग्नेऽवीरते परा दा दुर्वाससेऽमतये मा नो अस्यै ।
मा नः क्षुधे मा रक्षस ऋतावो मा नो दमे मा वन आ जुहूर्थाः ॥ ७.००१.१९
नू मे ब्रह्माण्यग्न उच्छशाधि त्वं देव मघवद्भ्यः सुषूदः ।
रातौ स्यामोभयास आ ते यूयं पात स्वस्तिभिः सदा नः ॥ ७.००१.२०
त्वमग्ने सुहवो रणवसंदक्सुदीती सूनो सहसो दिदीहि ।
मा त्वे सचा तनये नित्य आ धङ्गा वीरो अस्मन्नर्यो वि दासीत् ॥ ७.००१.२१
मा नो अग्ने दुर्भृतये सचेषु देवेद्धेष्वग्निषु प्र वोचः ।
मा ते अस्मान्दुर्मतयो भुमाच्चिद्देवस्य सूनो सहसो नशन्त ॥ ७.००१.२२
स मर्तो अग्ने स्वनीक रेवानमर्त्ये य आजुहोति हव्यम् ।
स देवता वसुवर्नि दधाति यं सूरिरर्थी पृच्छमान एति ॥ ७.००१.२३
महो नो अग्ने सुवितस्य विद्वान्नरियं सूरिभ्य आ वहा बृहन्तम् ।
येन वयं सहसावन्मदेमाविक्षितास आयुषा सुवीराः ॥ ७.००१.२४
नू मे ब्रह्माण्यग्न उच्छशाधि त्वं देव मघवद्भ्यः सुषूदः ।

रा॒तौ स्या॒मोभया॑स आ ते॒ यु॒यं पा॑त स्व॒स्तिभिः॑ सदा॒ नः ॥ ७.००१.२५
 जुष॑स्व नः समि॒धम॑ग्ने अ॒द्य शो॑चा बृ॒हद्य॑ज॒तं धूम॑मृष्वन् ।
 उप॑ स्पृश दि॒व्यं सानु॑ स्तू॒पैः सं रश्मि॑भिस्त॒तनः॑ सूर्य॒स्य ॥ ७.००२.०१
 नरा॑शंसस्य महि॒मान॑मेषामुप॒ स्तोषाम॑ यज॒तस्य॑ यज्ञैः ।
 ये सु॒क्रतवः॑ शुचयो धि॒यधाः॑ स्वदन्ति दे॒वा उ॒भया॑नि ह॒व्या ॥ ७.००२.०२
 ई॒ळेन्य॑ वो अ॒सुरं सु॑दक्षमन्त॒र्दतं॑ रोद॒सी सत्य॑वाचम् ।
 मनु॑ष्वदग्निं मनु॒ना समि॑द्धं सम॒ध्वरा॑य स॒दमि॑न्महेम ॥ ७.००२.०३
 स॒पर्य॑वो भर॒माणा॑ अभि॒ज्ञु प्र वृ॑ञ्जते नमसा ब॒र्हि॑रग्नौ ।
 आ॒जुह्वा॑ना घृ॒तपृ॑ष्ठं पृष॒द्वध्व॑र्यवो ह॒विषा॑ म॒र्जय॑ध्वम् ॥ ७.००२.०४
 स्वा॒ध्यो३ वि॒ दुरो॑ दे॒वय॑न्तोऽशि॒श्रयू॑ रथ॒युर्दे॑वताता ।
 पूर्वी॑ शि॒शुं न मा॑तरा रिहाणे स॒मग्रु॑वो न स॒मने॑ष्वञ्जन् ॥ ७.००२.०५
 उ॒त यो॑षणे दि॒व्ये म॒ही न उ॑षासान॒क्ता सु॑दु॒धेव॑ धेनुः ।
 ब॒र्हिष॑दा पुरु॒हूते॑ मघो॒नी आ य॑ज्ञिये सु॒विता॑य श्रयेताम् ॥ ७.००२.०६
 वि॒प्रा य॑ज्ञेषु मानु॒षेषु॑ का॒रू मन्ये॑ वां जा॒तवे॑दसा यज॒ध्वै ।
 ऊ॒र्ध्वं नो॑ अध्व॒रं कृतं॑ ह॒वेषु॑ ता दे॒वेषु॑ वनथो वा॒र्याणि॑ ॥ ७.००२.०७
 आ भार॑ती भार॒तीभिः॑ स॒जोषा॑ इळा दे॒वैर्मनु॑ष्येभिरग्निः ।
 सर॑स्वती सार॒स्वते॑भिर॒वाक्ति॑स्रो दे॒वीर्ब॒र्हिरे॑दं स॒दन्तु॑ ॥ ७.००२.०८
 तन्न॑स्तुरी॒पम॑ध पोषयि॒तु दे॒व त्व॑ष्ट॒र्वि र॑राणः स्य॒स्व ।
 यतो॑ वी॒रः क॑र्मण्यः सु॒दक्षो॑ यु॒क्तग्रा॑वा जा॒यते॑ दे॒वका॑मः ॥ ७.००२.०९
 वन॑स्पतेऽव सु॒जोप॑ दे॒वान॑ग्निर्ह॒विः श॑मिता सू॒दया॑ति ।
 सेदु॑ होता सत्य॒तरो॑ यजाति यथा दे॒वानां॑ ज॒निमा॑नि वेद ॥ ७.००२.१०
 आ या॒ह्यग्ने॑ समि॒धानो॑ अ॒र्वाडि॑न्द्रेण दे॒वैः सर॑थ॒ तुरे॑भिः ।
 ब॒र्हिर्न॑ आस्ता॒मदि॑तिः सु॒पुत्रा॑ स्वाहा दे॒वा अ॑मृता मा॒दय॑न्ताम् ॥ ७.००२.११
 अ॒ग्निं वो॑ दे॒वम॑ग्निभिः स॒जोषा॑ यजिष्ठं दू॒तम॑ध्वरे कृणुध्वम् ।
 यो म॒र्त्येषु॑ निध्रु॒विर्ऋ॑तावा तपु॒र्मूर्धा॑ घृ॒तान्नः॑ पा॒वकः॑ ॥ ७.००३.०१
 प्रोथ॑दश्वो न यवसेऽविष्य॒न्यदा॑ महः सं॒व॒रणा॑द्भ्यस्थात् ।
 आ॒दस्य॑ वातो अनु॒ वाति॑ शो॒चिर॑ध स्म ते॒ ब्रज॑नं कृ॒ष्णमा॑स्ति ॥ ७.००३.०२

उद्यस्य ते नवजातस्य वृष्णोऽग्ने चरन्त्यजरा इधानाः ।
 अच्छा द्यामरूपो धूम एति सं दूतो अग्र ईयसे हि देवान् ॥ ७.००३.०३
 वि यस्य ते पृथिव्यां पाजो अश्रेत्तुषु यदन्ना समवृक्त जम्भैः ।
 सेनेव सुष्टा प्रसितिष्ट एति यवं न दस्म जुहा विवेक्षि ॥ ७.००३.०४
 तमिद्वोषा तमुषसि यविष्ठमग्निमत्यं न मर्जयन्त नरः ।
 निशिशाना अतिथिमस्य योनौ दीदाय शोचिराहुतस्य वृष्णः ॥ ७.००३.०५
 सुसंदक्ते स्वनीक प्रतीकं वि यद्रुक्मो न रोचस उपाके ।
 दिवो न ते तन्यतुरेति शुष्मश्चित्रो न सूरः प्रति चक्षि भानुम् ॥ ७.००३.०६
 यथा वः स्वाहाग्नये दाशेम परीळाभिर्घृतवद्विश्च ह्व्यैः ।
 तेभिर्नो अग्ने अमितैर्महाभिः शतं पूर्भिरायसीभिर्नि पाहि ॥ ७.००३.०७
 या वा ते सन्ति दाशुषे अधृष्टा गिरो वा याभिर्नूवतीरुष्याः ।
 ताभिर्नः सूनो सहसो नि पाहि स्मत्सूरीञ्जरितृञ्जातवेदः ॥ ७.००३.०८
 निर्यत्पूतेव स्वधितिः शुचिर्गात्स्वया कृपा तन्वा३ रोचमानः ।
 आ यो मात्रोरुशेन्यो जनिष्ट देवयज्याय सुक्रतुः पावकः ॥ ७.००३.०९
 एता नो अग्ने सौभगा दिदीह्यपि क्रतु सुचेतसं वतेम ।
 विश्वा स्तोतृभ्यो गृणते च सन्तु यूयं पात स्वस्तिभिः सदा नः ॥ ७.००३.१०
 प्र वः शुक्राय भानवे भरध्वं ह्व्यं मतिं चाग्नये सुपूतम् ।
 यो दैव्यानि मानुषा जनूप्यन्तर्विश्वानि विद्यना जिगाति ॥ ७.००४.०१
 स गृत्सो अग्निस्तरुणश्चिदस्तु यतो यविष्ठो अजनिष्ट मातुः ।
 सं यो वना युवते शुचिदन्भूरि चिदन्ना समिदति सद्यः ॥ ७.००४.०२
 अस्य देवस्य संसद्यनीके यं मर्तासः श्येतं जगृभ्रे ।
 नि यो गृभं पौरुषेयीमुवोच दुरोकमग्निरायवे शुशोच ॥ ७.००४.०३
 अयं कविरकविषु प्रचेता मतेष्वग्निरमृतो नि धायि ।
 स मा नो अत्र जुहुरः सहस्वः सदा त्वे सुमनसः स्याम ॥ ७.००४.०४
 आ यो योनिं देवकृतं ससाद ऋत्वा ह्यग्निर्मृताँ अतारीत् ।
 तमोषधीश्च वनिनश्च गर्भं भूमिश्च विश्वधायसं बिभर्ति ॥ ७.००४.०५
 ईशे ह्यग्निर्मृतस्य भूरेरीशे रायः सुवीर्यस्य दातोः ।

मा त्वा वयं सहसावन्नवीरा माप्सवः परि षदाम मादुवः ॥ ७.००४.०६
 परिषद्यं ह्यरणस्य रेक्णो नित्यस्य रायः पतयः स्याम ।
 न शेषो अग्ने अन्यजातमस्त्यचेतानस्य मा पथो वि दुक्षः ॥ ७.००४.०७
 नहि भ्रमायारणः सुशेवोऽन्योदर्यो मनसा मन्तवा उ ।
 अधा चिदोकः पुनरित्स एत्या नो वाज्यभीषाळेतु नव्यः ॥ ७.००४.०८
 त्वमग्ने वनुष्यतो नि पाहि त्वमु नः सहसावन्नवद्यात् ।
 सं त्वा ध्वस्मन्वदभ्येतु पाथः सं रयिः स्पृहयाय्यः सहस्री ॥ ७.००४.०९
 एता नो अग्ने सौभगा दिदीह्यपि क्रतुं सुचेतसं वतेम ।
 विश्वा स्तोतृभ्यो गृणते च सन्तु यूयं पात स्वस्तिभिः सदा नः ॥ ७.००४.१०
 प्राग्रये तवसे भरध्वं गिर दिवो अरतये पृथिव्याः ।
 यो विश्वेषाममृतानामुपस्थे वैश्वानरो वावृधे जागृवद्भिः ॥ ७.००५.०१
 पृष्टो दिवि धाय्यग्निः पृथिव्यां नेता सिन्धूनां वृषभः स्तियानाम् ।
 स मानुषीरभि विशो वि भाति वैश्वानरो वावृधानो वरेण ॥ ७.००५.०२
 त्वद्विया विश आयन्नसिक्रीरसमना जहतीर्भोजनानि ।
 वैश्वानर पूरवे शोशुचानः पुरो यदग्ने दरयन्नदीदेः ॥ ७.००५.०३
 तव त्रिधातु पृथिवी उत द्यौर्वैश्वानर व्रतमग्ने सचन्त ।
 त्वं भासा रोदसी आ ततन्थाजस्त्रेण शोचिषा शोशुचानः ॥ ७.००५.०४
 त्वामग्ने हरितो वावशाना गिरः सचन्ते धुनयो घृताचीः ।
 पतिं कृष्टीनां रथ्यं रयीणां वैश्वानरमुषसां केतुमहाम् ॥ ७.००५.०५
 त्वे असूर्यं वसवो न्यृण्वन्क्रतुं हि ते मित्रमहो जुषन्त ।
 त्वं दस्यूरोकसो अग्र आज उरु ज्योतिर्जनयन्नायाय ॥ ७.००५.०६
 स जायमानः परमे व्योमन्वायुर्न पाथः परि पासि सद्यः ।
 त्वं भुवना जनयन्नभि क्रन्नपत्याय जातवेदो दशस्यन् ॥ ७.००५.०७
 तामग्ने अस्मे इषमेरयस्व वैश्वानर द्युमतीं जातवेदः ।
 यया राधः पिन्वसि विश्ववार पृथु श्रवां दाशुषे मत्याय ॥ ७.००५.०८
 तं नो अग्ने मघवद्भ्यः पुरुक्षुं रयिं नि वाजं श्रुत्य युवस्व ।
 वैश्वानर महि नः शर्म यच्छ रुद्रेभिरग्ने वसुभिः सजोषाः ॥ ७.००५.०९

प्र सम्राजो असुरस्य प्रशस्तिं पुंसः कृष्टीनामनुमाद्यस्य ।
 इन्द्रस्येव प्र तवसस्कृतानि वन्दे दारुं वन्दमानो विवक्ति ॥ ७.००६.०१
 कविं केतुं धासिं भानुमद्रेर्हिन्वन्ति शं राज्यं रोदस्योः ।
 पुरंदरस्य गीर्भिरा विवासेऽग्नेर्भ्रतानि पूर्वा महानि ॥ ७.००६.०२
 न्यक्रतून्प्रथिनो मृध्रवाचः पर्णारश्रद्धाँ अवृध्वाँ अयज्ञान् ।
 प्रप्र तान्दस्यूरग्निविवाय पूर्वश्चकारापराँ अयज्यून् ॥ ७.००६.०३
 यो अपाचीने तमसि मदन्तीः प्राचीश्चकार नृतमः शचीभिः ।
 तमीशानं वस्वा अग्निं गृणीषेऽनानतं दमयन्तं पृतन्यून् ॥ ७.००६.०४
 यो देह्योऽ अनमयद्वधस्त्रैर्यो अर्यपत्नीरुषसश्चकार ।
 स निरुध्या नहुषो यह्यो अग्निर्विशश्चक्रे बलिहतः सहोभिः ॥ ७.००६.०५
 यस्य शर्मन्नुप विश्वे जनास एवैस्तस्थुः सुमतिं भिक्षमाणाः ।
 वैश्वानरो वरमा रोदस्योराग्निः ससाद पित्रोरुपस्थम् ॥ ७.००६.०६
 आ देवो ददे बुध्याऽ वसूनि वैश्वानर उदिता सूर्यस्य ।
 आ समुद्रादवरादा परस्मादाग्निर्ददे दिव आ पृथिव्याः ॥ ७.००६.०७
 प्र वो देवं चित्सहसानमग्निमश्वं न वाजिनं हिषे नमोभिः ।
 भवा नो दूतो अध्वरस्य विद्वान्त्मना देवेषु विविदे मितद्रुः ॥ ७.००७.०१
 आ याह्यग्ने पथ्याऽ अनु स्वा मन्द्रो देवानां सख्यं जुषाणः ।
 आ सानु शुष्मैर्नदयन्पृथिव्या जम्भेभिर्विश्वमुशधगवनानि ॥ ७.००७.०२
 प्राचीनो यज्ञः सुधितं हि बर्हिः प्रीणीते अग्निरीळितो न होता ।
 आ मातरा विश्ववारे हुवानो यतो यविष्ठ जज्ञिषे सुशेवः ॥ ७.००७.०३
 सद्यो अध्वरे रथिरं जनन्त मानुषासो विचेतसो य एषाम् ।
 विशामधायि विश्वपतिर्दुरोणेऽग्निर्मन्द्रो मधुवचा ऋतावा ॥ ७.००७.०४
 असादि वृतो वह्निराजगन्वानग्निर्ब्रह्मा नृषदने विधर्ता ।
 द्यौश्च यं पृथिवी वावृधाते आ यं होता यजति विश्ववारम् ॥ ७.००७.०५
 एते द्युम्नेभिर्विश्वमातिरन्त मन्त्रं ये वारं नर्या अतक्षन् ।
 प्र ये विशस्तिरन्त श्रोषमाणा आ ये मे अस्य दीधयन्तस्य ॥ ७.००७.०६
 नू त्वामग्न ईमहे वसिष्ठा ईशानं सूनो सहसो वसूनाम् ।

इषं स्तोतृभ्यो मघवञ्च आनङ्गूयं पात स्वस्तिभिः सदा नः ॥ ७.००७.०७
 इन्धे राजा समर्यो नमोभिर्यस्य प्रतीकमाहुतं घृतेन ।
 नरो हृद्येभिरीळते सबाध आग्निरग्र उषसामशोचि ॥ ७.००८.०१
 अयमु ष्य सुमहाँ अवेदि होता मन्द्रो मनुषो यहो अग्निः ।
 वि भा अकः ससृजानः पृथिव्यां कृष्णपविरोषधीभिर्ववक्षे ॥ ७.००८.०२
 कया नो अग्ने वि वसः सुवृक्तिं कामु स्वधामृणवः शस्यमानः ।
 कदा भवेम पतयः सुदत्र रायो वन्तारो दुष्टरस्य साधोः ॥ ७.००८.०३
 प्रप्रायमग्निर्भरतस्य शृण्वे वि यत्सूर्यो न रोचते बृहद्भाः ।
 अभि यः पूरुं पृतनासु तस्थौ द्युतानो दैव्यो अतिथिः शुशोच ॥ ७.००८.०४
 असन्नित्वे आहवनानि भूरि भुवो विश्वेभिः सुमना अनीकैः ।
 स्तुतश्चिदग्ने शृण्विषे गृणानः स्वयं वर्धस्व तन्व सुजात ॥ ७.००८.०५
 इदं वचः शतसाः संसहस्रमुदग्रये जनिषीष्ट द्विबर्हाः ।
 शं यत्स्तोतृभ्य आपये भवाति द्युमदमीवचातनं रक्षोहा ॥ ७.००८.०६
 नू त्वामग्न ईमहे वसिष्ठा ईशानं सूनो सहसो वसूनाम् ।
 इषं स्तोतृभ्यो मघवञ्च आनङ्गूयं पात स्वस्तिभिः सदा नः ॥ ७.००८.०७
 अबोधि जार उषसामुपस्थाद्धोता मन्द्रः कवितमः पावकः ।
 दधाति केतुमुभयस्य जन्तोर्हृव्या देवेषु द्रविणं सुकृत्सु ॥ ७.००९.०१
 स सुक्रतुर्यो वि दुरः पणीनां पुनानो अर्कं पुरुभोजसं नः ।
 होता मन्द्रो विशां दमूनास्तिरस्तमो ददृशे राम्याणाम् ॥ ७.००९.०२
 अमूरः कविरदितिर्विवस्वान्सुसंसन्मित्रो अतिथिः शिवो नः ।
 चित्रभानुरुषसां भात्यग्नेऽपां गर्भः प्रस्वश् आ विवेश ॥ ७.००९.०३
 ईळ्यो वो मनुषो युगेषु समनगा अशुचञ्जातवेदाः ।
 सुसंदृशा भानुना यो विभाति प्रति गावः समिधानं बुधन्त ॥ ७.००९.०४
 अग्ने याहि दूत्यं मा रिषण्यो देवाँ अच्छा ब्रह्मकृता गणेन ।
 सरस्वतीं मरुतो अश्विनापो यक्षि देवान्नक्षधेयाय विश्वान् ॥ ७.००९.०५
 त्वामग्ने समिधानो वसिष्ठो जरूथं हन्यक्षि राये पुरधिम् ।
 पुरुणीथा जातवेदो जरस्व यूयं पात स्वस्तिभिः सदा नः ॥ ७.००९.०६

उ॒पो न जा॒रः पृथु॑ पा॒जो अ॒श्रेद्द॒विद्यु॑त॒द्दीद्य॑च्छो॒शुचानः॑ ।
 वृ॒षा हरिः॑ शु॒चिरा भा॒ति भा॒सा धियो॑ हि॒न्वान॑ उ॒शती॑र॒जीगः॑ ॥ ७.०१०.०१
 स्व॒र्णं वस्तो॑रु॒षसा॑मरोचि॒ यज्ञं त॑न्वाना उ॒शिजो॑ न मन्म ।
 अ॒ग्नि॒र्जन्मानि॑ दे॒व आ वि॑ वि॒द्वान्द्र॒वद्भूतो॑ दे॒वया॒वा वनि॑ष्ठः ॥ ७.०१०.०२
 अ॒च्छा गि॒रो मत॑यो दे॒वय॑न्ती॒रग्निं॑ यन्ति॒ द्रवि॑णं॒ भिक्ष॑माणाः ।
 सु॒सं॒दृशं॑ सु॒प्रती॑कं॒ स्वञ्च॑ ह॒व्यवा॑ह॒मर॑तिं॒ मानु॑षाणा॒म् ॥ ७.०१०.०३
 इन्द्रं॑ नो अ॒ग्ने वसु॑भिः स॒जोषा॑ रु॒द्रं रु॒द्रेभि॑रा वहा॒ बृह॑न्तम् ।
 आ॒दि॒त्येभि॑र॒दितिं॑ वि॒श्वज॑न्यां॒ बृह॑स्पति॒मृक्क॑भिर्वि॒श्ववार॑म् ॥ ७.०१०.०४
 म॒न्द्रं हो॑तार॒मुशि॑जो॒ यवि॑ष्ठम॒ग्निं विश॑ ई॒ळते॑ अध्व॒रेषु॑ ।
 स हि॑ क्ष॒पावाँ॑ अ॒भव॑द्रयी॒णाम॑तन्द्रो॒ दूतो॑ य॒जथा॑य दे॒वान् ॥ ७.०१०.०५
 महँ॑ अ॒स्यध्व॑रस्य प्र॒केतो॑ न ऋ॒ते त्वद॑मृता॒ माद॑यन्ते ।
 आ वि॒श्वेभिः॑ स॒रथ॑ याहि॒ देवै॑र्य॒ग्ने होता॑ प्रथ॒मः सदे॑ह ॥ ७.०११.०१
 त्वामी॑ळते अ॒जिरं॑ दू॒त्याय॑ ह॒विष्म॑न्तः स॒दमि॑न्मानु॒पासः॑ ।
 यस्य॑ दे॒वैरा॑सदो ब॒र्हि॒रग्ने॑ऽहान्यस्मै सु॒दिना॑ भवन्ति ॥ ७.०११.०२
 त्रि॒श्वि॒द॒क्तोः प्र॑ चि॒कितु॑र्व॒सूनि॑ त्वे अ॒न्तर्दा॑शुषे म॒त्याय॑ ।
 म॒नुष्व॑द॒ग्न इ॒ह य॑क्षि दे॒वान्भवा॑ नो दू॒तो अ॑भि॒शस्ति॑पा॒वा ॥ ७.०११.०३
 अ॒ग्नि॒रीशे॑ बृ॒हतो॑ अध्व॒रस्या॑ग्निर्वि॒श्वस्य॑ ह॒विषः॑ कृतस्य ।
 ऋ॒तुं ह्य॑स्य॒ वस॑वो जु॒षन्ता॑था दे॒वा दधि॑रे ह॒व्यवा॑हम् ॥ ७.०११.०४
 आ॒ग्ने वह॑ ह॒विर॑द्याय दे॒वानि॑न्द्र॒ज्येष्ठा॑स इ॒ह मा॑दयन्ता॒म् ।
 इ॒मं य॑ज्ञं दि॒वि दे॒वेषु॑ धेहि॒ यूयं॑ पा॒त स्व॑स्तिभिः सदा॒ नः ॥ ७.०११.०५
 अ॒गन्म॑ म॒हा न॑मसा॒ यवि॑ष्ठं॒ यो दी॑दाय॒ समि॑द्धः॒ स्वे दुरो॑णे ।
 चि॒त्र॒भानुं॑ रो॒दसी॑ अ॒न्तरु॑र्वी॒ स्वाहु॑तं वि॒श्वतः॑ प्र॒त्यञ्च॑म् ॥ ७.०१२.०१
 स म॒हा वि॒श्वा दुरि॑तानि सा॒ह्वान॑ग्निः॒ ष्टवे॑ दम आ॒ जात॑व॒देदाः॑ ।
 स नो॑ र॒क्षिष॑द्दुरि॒ताद॑व॒द्याद॑स्मान्गृण॒त उ॒त नो॑ म॒घोनः॑ ॥ ७.०१२.०२
 त्वं वरु॑ण उ॒त मि॒त्रो अ॒ग्ने त्वां॑ वर्ध॒न्ति म॑तिभिर्व॒सिष्ठाः॑ ।
 त्वे वसु॑ सु॒षण॑नानि सन्तु॒ यूयं॑ पा॒त स्व॑स्तिभिः सदा॒ नः ॥ ७.०१२.०३
 प्रा॒ग्नये॑ वि॒श्वशु॑चे॒ धिय॑धेऽसुर॒ग्ने म॑न्म॒ धीतिं॑ भ॒रध्व॑म् ।

भरे ह॒विर्न ब॒र्हिषि॑ प्री॒णानो॑ वै॒श्वानराय॑ यतये मती॒नाम् ॥ ७.०१३.०१
 त्वमग्ने॑ शोचि॒षा शोशु॑चान आ रोदसी॒ अपु॑णा जायमानः ।
 त्वं दे॒वाँ अ॒भि॒शस्ते॑रमु॒ञ्चो वै॒श्वानर॑ जातवेदो महि॒त्वा ॥ ७.०१३.०२
 जा॒तो यद॑ग्ने भुवना॒ व्यख्यः॑ प॒शून्न गो॑पा इर्यः॒ परि॑ज्मा ।
 वै॒श्वानर॑ ब्रह्मणे विन्द गा॒तुं यूयं॑ पात स्व॒स्तिभिः॑ सदा नः ॥ ७.०१३.०३
 स॒मिधा॑ जा॒तवे॑दसे दे॒वाय॑ दे॒वहू॑तिभिः ।
 ह॒विर्भिः॑ शु॒क्रशो॑चिषे नमस्वि॒नो वयं॑ दा॒शेमा॑ग्नये ॥ ७.०१४.०१
 वयं॑ ते अग्ने स॒मिधा॑ विधेम वयं॑ दा॒शेम॑ सुष्टु॒ती यज॑त्र ।
 वयं॑ घृ॒तेना॑ध्वरस्य होत॒र्वयं॑ दे॒व ह॒विषा॑ भद्रशोचे ॥ ७.०१४.०२
 आ नो॑ दे॒वेभि॑रुप दे॒वहू॑तिमग्ने या॒हि वष॑ट्कृतिं जुषाणः ।
 तुभ्यं॑ दे॒वाय॑ दाशतः स्याम यूयं॑ पात स्व॒स्तिभिः॑ सदा नः ॥ ७.०१४.०३
 उ॒पस॑द्याय मी॒ळ्ळुष॑ आ॒स्ये जु॑हुता ह॒विः ।
 यो नो॑ नेदिष्ठमा॒प्यम् ॥ ७.०१५.०१
 यः प॒ञ्च च॑र्षणीर॒भि नि॑षसाद दमे॒दमे॑ ।
 क॒विर्गृ॑हपतिर्यु॒वा ॥ ७.०१५.०२
 स नो॑ वेदो अ॒मात्य॑मग्नी रक्षतु वि॒श्वतः॑ ।
 उ॒तास्मान्पा॑त्वंहसः ॥ ७.०१५.०३
 नवं॑ नु स्तोमम॒ग्नये॑ दि॒वः श्ये॑नाय जी॒जनम्॑ ।
 वस्वः॑ कु॒विद्व॑नाति नः ॥ ७.०१५.०४
 स्पा॒र्हा यस्य॑ श्रियो॒ दृशे॑ र॒यिर्वी॑रवतो यथा ।
 अग्ने॑ य॒ज्ञस्य॑ शोचतः ॥ ७.०१५.०५
 सेमां॑ वेतु वष॑ट्कृतिमग्नि॒जुष॑त नो गिरः ।
 यजि॑ष्ठो ह॒व्यवा॑हनः ॥ ७.०१५.०६
 नि त्वा॑ नक्ष्य विश॒पते॑ द्युमन्त॒ देव॑ धीमहि ।
 सु॒वीर॑मग्न आहुत ॥ ७.०१५.०७
 क्षप॑ उ॒स्रश्च॑ दीदिहि स्व॒ग्नय॑स्त्वया व॒यम् ।
 सु॒वीर॑स्त्वमस्मयुः ॥ ७.०१५.०८

उप॑ त्वा सा॒तये॑ नरो॒ विप्रा॑सो यन्ति धी॒तिभिः॑ ।
 उपा॑क्षरा स॒हस्रिणी॑ ॥ ७.०१५.०९
 अ॒ग्नी रक्षा॑सि सेधति शु॒क्रशो॑चिरम॒र्त्यः ।
 शुचिः॑ पा॒वक ई॒ड्यः ॥ ७.०१५.१०
 स नो॑ राधा॑स्या भ॒रेशानः॑ सहसो य॒हो ।
 भग॑श्च दातु वा॒र्यम् ॥ ७.०१५.११
 त्वम॑ग्ने वी॒रव॑द्यशो दे॒वश्च स॑विता भगः ।
 दि॒तिश्च दा॑ति वा॒र्यम् ॥ ७.०१५.१२
 अ॒ग्ने रक्षा॑ णो अ॒हंसः॑ प्रति ष्म दे॒व री॑षतः ।
 तपि॑ष्ठैरजरो द॒ह ॥ ७.०१५.१३
 अथा॑ म॒ही न आ॒यस्य॑नाधृष्टो नृपी॑तये ।
 पू॒र्भवा॑ शतभु॒जिः ॥ ७.०१५.१४
 त्वं नः॑ पा॒ह्यंह॑सो दोषा॒वस्तर॑घायतः ।
 दि॒वा नक्त॑मदाभ्य ॥ ७.०१५.१५
 ए॒ना वो अ॒ग्निं नम॑सोर्जो नपा॒तमा हु॑वे ।
 प्रि॒यं चेति॑ष्ठम॒रतिं स्व॑ध्वरं वि॒श्वस्य॑ दू॒तम॑मृतम् ॥ ७.०१६.०१
 स यो॑जते अ॒रुषा॑ वि॒श्वभो॑जसा स दु॒द्रव॑त्स्वाहुतः ।
 सु॒ब्रह्मा॑ य॒ज्ञः सु॑शमी वसू॒नां दे॒वं रा॒धो ज॑नानाम् ॥ ७.०१६.०२
 उद॑स्य शो॒चिर॑स्थादाजु॒ह्वान॑स्य मी॒ळुषः॑ ।
 उद्धू॑मासो अ॒रुषा॑सो दि॒विस्पृ॑शः स॒मग्नि॑मिन्धते नरः ॥ ७.०१६.०३
 तं त्वा॑ दू॒तं कृ॑ण्महे य॒शस्त॑मं दे॒वाँ आ वी॑तये वह ।
 वि॒श्वा सू॒नो स॒हसो॑ म॒र्तभो॑जना रा॒स्व तद्य॑त्त्वेमहे ॥ ७.०१६.०४
 त्वम॑ग्ने गृह॑पतिस्त्वं होता नो अध्व॒रे ।
 त्वं पो॑ता वि॒श्ववा॑र प्रचे॒ता यक्षि॑ वे॒षि च॑ वा॒र्यम् ॥ ७.०१६.०५
 कृ॒धि रत्नं॑ यज॒मानाय॑ सु॒क्रतो॑ त्वं हि रत्न॑धा असि ।
 आ न॑ ऋ॒ते शि॑शीहि वि॒श्वमृ॑त्विजं सु॒शंसो॑ यश्च दक्ष॑ते ॥ ७.०१६.०६
 त्वे अ॒ग्ने स्वा॑हुत प्रि॒यासः॑ सन्तु सू॒रयः॑ ।

यन्तारो ये मघवानो जनानामूर्वान्दयन्त गोनाम् ॥ ७.०१६.०७
येषामिळा घृतहस्ता दुरोण आँ अपि प्राता निषीदति ।
ताँस्त्रायस्व सहस्य द्रुहो निदो यच्छा नः शर्म दीर्घश्रुत् ॥ ७.०१६.०८
स मन्द्रया च जिह्वया वहिरासा विदुष्टरः ।
अग्ने रयिं मघवच्छो न आ वह हव्यदातिं च सूदय ॥ ७.०१६.०९
ये राधासि ददत्यश्व्या मघा कामेन श्रवसो महः ।
ताँ अंहसः पिपृहि पृर्तुभिष्ट्वं शतं पूर्भिर्यविष्ठ ॥ ७.०१६.१०
देवो वो द्रविणोदाः पूर्णाँ विवष्ट्रासिचम् ।
उद्धा सिञ्चध्वमुप वा पृणध्वमादिद्धा देव ओहते ॥ ७.०१६.११
तं होतारमध्वरस्य प्रचेतसं वहि देवा अकृण्वत ।
दधाति रत्नं विधते सुवीर्यमग्निर्जनाय दाशुषे ॥ ७.०१६.१२
अग्ने भव सुषमिधा समिद्ध उत बर्हिरुर्विया वि स्तृणीताम् ॥ ७.०१७.०१
उत द्वार उशतीर्वि श्रयन्तामुत देवाँ उशत आ वहेह ॥ ७.०१७.०२
अग्ने वीहि हविषा यक्षि देवान्स्वध्वरा कृणुहि जातवेदः ॥ ७.०१७.०३
स्वध्वरा करति जातवेदा यक्षदेवाँ अमृतान्प्रियच्च ॥ ७.०१७.०४
वंस्व विश्वा वार्याणि प्रचेतः सत्या भवन्त्वाशिषो नो अद्य ॥ ७.०१७.०५
त्वामु ते दधिरे हव्यवाह देवासो अग्र ऊर्ज आ नपातम् ॥ ७.०१७.०६
ते ते देवाय दाशतः स्याम महो नो रत्ना वि दध इयानः ॥ ७.०१७.०७
त्वे ह यत्पितरश्चित्र इन्द्र विश्वा वामा जरितारो असन्वन् ।
त्वे गावः सुदुघास्त्वे ह्यश्वस्त्वं वसु देवयते वनिष्ठः ॥ ७.०१८.०१
राजेव हि जनिभिः क्षेष्येवाव द्युभिरभि विदुष्कविः सन् ।
पिशा गिरो मघवन्गोभिरश्वेस्त्वायतः शिशीहि राये अस्मान् ॥ ७.०१८.०२
इमा उ त्वा पस्पृधानासो अत्र मन्द्रा गिरो देवयन्तीरुप स्थुः ।
अर्वाची ते पथ्या राय एतु स्याम ते सुमताविन्द्र शर्मन् ॥ ७.०१८.०३
धेनुं न त्वा सूयवसे ददुक्षन्नुप ब्रह्माणि ससृजे वसिष्ठः ।
त्वामिन्मे गोपतिं विश्व आहा न इन्द्रः सुमतिं गन्त्वच्छ ॥ ७.०१८.०४
अर्णासि चित्प्रथाना सुदास इन्द्रो गाधान्यकृणोत्सुपारा ।

शर्धन्तं शिन्धुमुचथस्य नव्यः शापं सिन्धूनामकृणोदशस्तीः ॥ ७.०१८.०५
 पुरोळा इत्तुर्वशो यक्षुरासीद्राये मत्स्यासो निशिता अपीव ।
 श्रुष्टिं चक्रुर्भृगवो द्रुह्यवश्च सखा सखायमतरद्विषूचोः ॥ ७.०१८.०६
 आ पक्थासो भलानसो भनन्तालिनासो विषाणिनः शिवासः ।
 आ योऽनयत्सधमा आर्यस्य गव्या तृत्सुभ्यो अजगन्धुधा नृन् ॥ ७.०१८.०७
 दुराध्योऽदितिं स्वेवयन्तोऽचेतसो वि जगृभ्रे परुष्णीम् ।
 महाविव्यक्पृथिवीं पत्यमानः पशुष्कविरशयञ्चायमानः ॥ ७.०१८.०८
 ईयुरर्थं न न्यर्थं परुष्णीमाशुश्चनेदभिपित्वं जगाम ।
 सुदास इन्द्रः सुतुकां अमित्रानरन्धयन्मानुषे वध्निवाचः ॥ ७.०१८.०९
 ईयुर्गावो न यवसादगोपा यथाकृतमभि मित्रं चितासः ।
 पृश्निगावः पृश्निनिप्रेषितासः श्रुष्टिं चक्रुर्नियुतो रन्तयश्च ॥ ७.०१८.१०
 एकं च यो विशतिं च श्रवस्या वैकर्णयोर्जनात्राजा न्यस्तः ।
 दस्मो न सद्मन्नि शिशति बर्हिः शूरः सर्गमकृणोदिन्द्र एषाम् ॥ ७.०१८.११
 अध श्रुतं कवषं वृद्धमप्स्वनु द्रुह्यं नि वृणग्वज्रबाहुः ।
 वृणाना अत्र सख्याय सख्यं त्वायन्तो ये अमदन्ननु त्वा ॥ ७.०१८.१२
 वि सद्यो विश्वा दंहितान्येषामिन्द्रः पुरः सहसा सप्त दर्दः ।
 व्यानवस्य तृत्सवे गयं भाग्जेष्म पूरुं विदथे मृध्रवाचम् ॥ ७.०१८.१३
 नि गव्यवोऽनवो द्रुह्यवश्च षष्टिः शता सुषुपुः षट् सहस्रा ।
 षष्टिर्वीरासो अधि षड्वोयु विश्वेदिन्द्रस्य वीर्या कृतानि ॥ ७.०१८.१४
 इन्द्रेणैते तृत्सवो वेविषाणा आपो न सृष्टा अधवन्त नीचीः ।
 दुर्मित्रासः प्रकलविन्मिमाना जहुर्विश्वानि भोजना सुदासे ॥ ७.०१८.१५
 अर्धं वीरस्य शृतपामनिन्द्रं परा शर्धन्तं नुनुदे अभि क्षाम् ।
 इन्द्रो मन्युं मन्युम्यो मिमाय भेजे पथो वर्तनिं पत्यमानः ॥ ७.०१८.१६
 आध्रेण चित्तद्वेकं चकार सिंह्यं चित्पेत्वेना जघान ।
 अव सक्तीर्वश्यावृश्चदिन्द्रः प्रायच्छद्विश्वा भोजना सुदासे ॥ ७.०१८.१७
 शश्वन्तो हि शत्रवो रारधुष्टे भेदस्य चिच्छर्धतो विन्द रन्धिम् ।
 मताँ एनः स्तुवतो यः कृणोति तिग्मं तस्मिन्नि जहि वज्रमिन्द्र ॥ ७.०१८.१८

आवदिन्द्रं यमुना तृत्सवश्च प्रात्र भेदं सर्वताता मुषायत् ।
 अजासश्च शिग्रवो यक्षवश्च बलिं शीर्षाणि जभ्रुरश्वानि ॥ ७.०१८.१९
 न त इन्द्र सुमतयो न रायः संचक्षे पूर्वा उषसो न नूलाः ।
 देवकं चिन्मान्यमानं जघन्थाव त्मना बृहतः शम्बरं भेत् ॥ ७.०१८.२०
 प्र ये गृहादममदुस्त्वाया पराशरः शतयातुर्वसिष्ठः ।
 न ते भोजस्य सख्यं मृषन्ताधा सूरिभ्यः सुदिना व्युच्छान् ॥ ७.०१८.२१
 द्वे नसुर्देववतः शते गोर्द्वा रथा वधूमन्ता सुदासः ।
 अहन्नग्रे पैजवनस्य दानं होतेव सद्य पर्यमि रेभन् ॥ ७.०१८.२२
 चत्वारो मा पैजवनस्य दानाः स्मद्विष्टयः कृशनिनो निरेके ।
 ऋज्जासो मा पृथिविष्ठाः सुदासस्तोकं तोकाय श्रवसे वहन्ति ॥ ७.०१८.२३
 यस्य श्रवो रोदसी अन्तरुर्वी शीर्ष्णीशीर्ष्णी विबभाजा विभक्ता ।
 सप्तेदिन्द्रं न स्रवतो गृणन्ति नि युध्यामधिमशिशादभीके ॥ ७.०१८.२४
 इमं नरो मरुतः सश्चतानु दिवोदासं न पितरं सुदासः ।
 अविष्टना पैजवनस्य केतं दूणाशं क्षत्रमजरं दुवोयु ॥ ७.०१८.२५
 यस्तिग्मशृङ्गो वृषभो न भीम एकः कृष्टीश्र्यावयति प्र विश्वाः ।
 यः शश्वतो अदाशुषो गयस्य प्रयन्तासि सुष्वितराय वेदः ॥ ७.०१९.०१
 त्वं ह त्यदिन्द्र कुत्समावः शुश्रूषमाणस्तन्वा समर्ये ।
 दासं यच्छुष्णं कुयवं न्यस्मा अरन्धय आर्जुनेयाय शिक्षन् ॥ ७.०१९.०२
 त्वं धृष्णो धृषता वीतहव्यं प्रावो विश्वाभिरूतिभिः सुदासम् ।
 प्र पौरुकुत्सिं त्रसदस्युमावः क्षेत्रसाता वृत्रहत्येषु पूरुम् ॥ ७.०१९.०३
 त्वं नृभिर्नृमणो देववीतौ भूरीणि वृत्रा हर्यश्व हंसि ।
 त्वं नि दस्युं चुमुरिं धुनिं चास्वापयो दभीतये सुहन्तु ॥ ७.०१९.०४
 तव च्यौलानि वज्रहस्त तानि नव यत्पुरो नवतिं च सद्यः ।
 निवेशने शततमाविवेपीरहश्च वृत्रं नमुचिमुताहन् ॥ ७.०१९.०५
 सना ता त इन्द्र भोजनानि रातहव्याय दाशुषे सुदासे ।
 वृष्णे ते हरी वृषणा युनज्मि व्यन्तु ब्रह्माणि पुरुशाक वाजम् ॥ ७.०१९.०६
 मा ते अस्यां सहसावन्परिष्टावघाय भूम हरिवः परादै ।

त्रायस्व नोऽवृकेभिर्वरूथैस्तव प्रियासः सूरिषु स्याम ॥ ७.०१९.०७
 प्रियास इते मघवन्नभिष्टौ नरो मदेम शरणे सखायः ।
 नि तुर्वशं नि याद्वं शिशोह्यतिथिग्वाय शंस्यं करिष्यन् ॥ ७.०१९.०८
 सद्यश्चिन्तु ते मघवन्नभिष्टौ नरः शंसन्त्युक्थशास उक्था ।
 ये ते ह्वेभिर्वि पर्णारदाशन्नस्मान्वृणीष्व युज्याय तस्मै ॥ ७.०१९.०९
 एते स्तोमा नरां नृतम तुभ्यमस्मद्यश्चो ददतो मघानि ।
 तेषामिन्द्र वृत्रहत्ये शिवो भूः सखा च शूरोऽविता च नृणाम् ॥ ७.०१९.१०
 नू इन्द्र शूर स्तवमान ऊती ब्रह्मजूतस्तन्वा वावृधस्व ।
 उप नो वाजान्मिमीह्युप स्तीन्यूयं पात स्वस्तिभिः सदा नः ॥ ७.०१९.११
 उग्रो जज्ञे वीर्याय स्वधावाञ्चक्रिरपो नर्यो यत्करिष्यन् ।
 जग्मिर्युवा नृषदनमवोभिस्त्राता न इन्द्र एनसो महश्चित् ॥ ७.०२०.०१
 हन्ता वृत्रमिन्द्रः शूशुवानः प्रावीन्तु वीरो जरितारमृती ।
 कर्ता सुदासे अह वा उ लोकं दाता वसु मुहुरा दाशुषे भूत् ॥ ७.०२०.०२
 युध्मो अनर्वा खजकृत्समद्वा शूरः सत्रापाङ्गनुषेमषाव्हः ।
 व्यास इन्द्रः पृतनाः स्वोजा अधा विश्वं शत्रूयन्तं जघान ॥ ७.०२०.०३
 उभे चिदिन्द्र रोदसी महित्वा पप्राथ तविषीभिस्तुविष्मः ।
 नि वज्रमिन्द्रो हरिवाग्निमिक्षन्समन्धसा मदेषु वा उवोच ॥ ७.०२०.०४
 वृषा जजान वृषणं रणाय तमु चिन्नारी नर्यं ससूव ।
 प्र यः सेनानीरध नृभ्यो अस्तीनः सत्वा गवेषणः स धृष्णुः ॥ ७.०२०.०५
 नू चित्स भ्रेषते जनो न रेषन्मनो यो अस्य घोरमाविवासात् ।
 यज्ञैर्य इन्द्रे दधते दुवासि क्षयत्स राय ऋतपा ऋतेजाः ॥ ७.०२०.०६
 यदिन्द्र पूर्वं अपराय शिक्षन्नयञ्ज्यायान्कनीयसो देष्णम् ।
 अमृत इत्पर्यासीत दूरमा चित्र चित्र्यं भरा रयिं नः ॥ ७.०२०.०७
 यस्त इन्द्र प्रियो जनो ददाशदसन्निरेके अद्रिवः सखा ते ।
 वयं ते अस्यां सुमतौ चनिष्ठाः स्याम वरूथे अघ्नतो नृपीतौ ॥ ७.०२०.०८
 एष स्तोमो अचिक्रदद्वृषा त उत स्तामुर्मघवन्नक्रपिष्ट ।
 रायस्कामो जरितारं त आगन्त्वमङ्ग शक्र वस्व आ शको नः ॥ ७.०२०.०९

स न इन्द्र त्वयताया इषे धास्त्मना च ये मघवानो जुनन्ति ।
वस्वी षु ते जरित्रे अस्तु शक्तिर्युयं पात स्वस्तिभिः सदा नः ॥ ७.०२०.१०
असावि देवं गोऋजीकमन्धो न्यस्मिन्निन्द्रो जनुषेमुवोच ।
बोधामसि त्वा हर्यश्च यज्ञैर्बोधा नः स्तोममन्धसो मदेषु ॥ ७.०२१.०१
प्र यन्ति यज्ञं विपयन्ति बर्हिः सोममादो विदथे दुध्रवाचः ।
न्यु भ्रियन्ते यशसो गृभादा दूरउपब्दो वृषणो नृषाचः ॥ ७.०२१.०२
त्वमिन्द्र स्रवितवा अपस्कः परिष्ठिता अहिना शूर पूर्वीः ।
त्वद्वावक्रे रथ्योऽ न धेना रेजन्ते विश्वा कृत्रिमाणि भीषा ॥ ७.०२१.०३
भीमो विवेषायुधेभिरेषामपांसि विश्वा नर्याणि विद्वान् ।
इन्द्रः पुरो जहृषाणो वि दूधोद्वि वज्रहस्तो महिना जघान ॥ ७.०२१.०४
न यातव इन्द्र जूजुवुर्नो न वन्दना शविष्ठ वेद्याभिः ।
स शर्धदर्यो विषुणस्य जन्तोर्मा शिश्रदेवा अपि गुर्कृतं नः ॥ ७.०२१.०५
अभि क्रत्वेन्द्र भूरध ज्मन्न ते विव्यङ्गहिमानं रजांसि ।
स्वेना हि वृत्रं शवसा जघन्थ न शत्रुरन्तं विविदद्युधा ते ॥ ७.०२१.०६
देवाश्चित्ते असुर्याय पूर्वेऽनु क्षत्राय ममिरे सहांसि ।
इन्द्रो मघानि दयते विषह्येन्द्रं वाजस्य जोहुवन्त सातौ ॥ ७.०२१.०७
कीरिश्चिद्धि त्वामवसे जुहावेशानमिन्द्र सौभगस्य भूरः ।
अवो बभूथ शतमूते अस्मे अभिक्षत्तुस्त्वावतो वरूता ॥ ७.०२१.०८
सखायस्त इन्द्र विश्वह स्याम नमोवृधासो महिना तरुत्र ।
वन्वन्तु स्मा तेऽवसा समीकेऽभीतिमर्यो वनुषां शवासि ॥ ७.०२१.०९
स न इन्द्र त्वयताया इषे धास्त्मना च ये मघवानो जुनन्ति ।
वस्वी षु ते जरित्रे अस्तु शक्तिर्युयं पात स्वस्तिभिः सदा नः ॥ ७.०२१.१०
पिबा सोममिन्द्र मन्दतु त्वा यं ते सुषाव हर्यश्वाद्रिः ।
सोतुर्बाहुभ्यां सुयतो नार्वा ॥ ७.०२२.०१
यस्ते मदो युज्यश्चारुरस्ति येन वृत्राणि हर्यश्च हंसि ।
स त्वामिन्द्र प्रभूवसो ममत्तु ॥ ७.०२२.०२
बोधा सु मे मघवन्वाचमेमां यां ते वसिष्ठो अर्चति प्रशस्तिम् ।

इ॒मा ब्र॒ह्म॑ स॒ध॒मादे॑ जुषस्व ॥ ७.०२२.०३
 श्रु॒धी ह॒वं वि॒पि॒पा॒न॒स्या॒द्रे॒र्बो॒धा॒ वि॒प्र॒स्या॒र्च॒तो म॒नी॒षाम् ।
 कृ॒ष्वा दु॒वां॒स्य॒न्त॒मा स॒चे॒मा ॥ ७.०२२.०४
 न ते॒ गि॒रो अ॒पि मृ॒ष्ये त॒ुर॒स्य॒ न सु॒ष्टु॒ति॒म॒सु॒र्य॒स्य॒ वि॒द्वान् ।
 सदा॒ ते ना॒म स्व॒य॒शो वि॒व॒क्त्रि॑ ॥ ७.०२२.०५
 भूरि॒ हि ते॒ स॒व॒ना॒ मा॒नु॒षेषु॑ भूरि॒ मनी॑षी ह॒वते॒ त्वा॒मि॒त् ।
 मा॒रे अ॒स्म॒न्म॒घ॒व॒ञ्चो॒क्कः ॥ ७.०२२.०६
 तु॒भ्ये॒दि॒मा स॒व॒ना शू॒र वि॒श्वा॒ तु॒भ्यं ब्र॒ह्मा॒णि॒ वर्ध॑ना कृणोमि ।
 त्वं नृ॒भिर्ह॑व्यो वि॒श्व॒धा॒सि ॥ ७.०२२.०७
 नू चि॒त्रु॒ ते म॒न्य॒मा॒न॒स्य॒ द॒स्मो॒द॒श्रु॒वन्ति॑ म॒हि॒मा॒न॒मु॒ग्र ।
 न वी॒र्य॑मिन्द्र॒ ते न रा॒धः ॥ ७.०२२.०८
 ये च॒ पूर्वं॑ ऋषयो॒ ये च॒ नू॒त्ना॒ इन्द्र॑ ब्रह्माणि॒ जन॑यन्त॒ वि॒प्राः ।
 अ॒स्मे ते॒ स॒न्तु स॒ख्या शि॒वानि॑ यूयं पात॒ स्व॒स्ति॒भिः सदा॑ नः ॥ ७.०२२.०९
 उ॒दु ब्र॒ह्मा॒ण्यै॒रत॑ श्रव॒स्येन्द्र॑ स॒म॒र्ये म॒हया॑ वसिष्ठ ।
 आ यो वि॒श्वानि॑ श॒व॒सा॒ त॒ता॒नो॒प॒श्रो॒ता म॒ ई॒वतो॑ वचा॒सि ॥ ७.०२३.०१
 अ॒यामि॑ घोष॒ इन्द्र॑ दे॒व॒जा॒मि॒रि॒र॒ज्य॒न्त॒ यच्छु॑रुधो वि॒वा॒चि ।
 न॒हि स्व॒मा॒यु॒श्चि॒किते॑ जनेषु॒ तानी॑दंहांस्यति॒ प॒र्ष्य॒स्मान् ॥ ७.०२३.०२
 यु॒जे रथं॑ ग॒वेष॑णं॒ हरि॑भ्यामु॒प ब्र॒ह्मा॒णि॒ जु॒जु॒षा॒ण॒म॒स्थुः ।
 वि॒ बा॒धि॒ष्ट॒ स्य रो॑दसी॒ महि॑त्वेन्द्रो॒ वृ॒त्रा॒ण्य॒प्रती॑ जघ॒न्वान् ॥ ७.०२३.०३
 आ॒प॒श्चि॒त्पि॒प्युः स्त॒र्यो॑३ न गा॒वो न॑क्षत्र॒तं ज॒रि॒ता॒र॒स्त इन्द्र॑ ।
 या॒हि वा॒यु॒र्न नि॒युतो॑ नो॒ अच्छा॑ त्वं हि धी॒भिर्द॑यसे वि॒वा॒जान् ॥ ७.०२३.०४
 ते त्वा॒ मदा॑ इन्द्र॒ मा॒दय॑न्तु शु॒ष्मि॒णं तु॒वि॒रा॒धसं॑ ज॒रि॒त्रे ।
 ए॒को दे॒व॒त्रा द॑यसे हि॒ मता॑न॒स्मि॒ञ्छू॒र स॒वने॑ मा॒दय॑स्व ॥ ७.०२३.०५
 ए॒वेदि॑न्द्रं वृषणं॒ वज्र॑बाहुं॒ वसि॑ष्ठासो॒ अभ्य॑र्चन्त्य॒र्केः ।
 स नः॑ स्तुतो॒ वी॒र॒व॒द्धा॒तु गो॑म॒द्व्यूयं॑ पात॒ स्व॒स्ति॒भिः सदा॑ नः ॥ ७.०२३.०६
 यो॒नि॒ष्ट इन्द्र॑ स॒दने॑ अ॒कारि॑ त॒मा नृ॒भिः पुरु॑हूत॒ प्र या॑हि ।
 असो॑ यथा॒ नोऽवि॑ता॒ वृ॒धे च॒ ददो॑ वसू॒नि म॒म॒दश्च॑ सोमैः ॥ ७.०२४.०१

गृभीतं ते मन इन्द्र द्विबर्हाः सुतः सोमः परिषिक्त्वा मधूनि ।
 विसृष्टधेना भरते सुवृक्तिरियमिन्द्रं जोहुवती मनीषा ॥ ७.०२४.०२
 आ नो दिव आ पृथिव्या ऋजीषिन्निदं बर्हिः सोमपेयाय याहि ।
 वहन्तु त्वा हरयो मद्यञ्चमाङ्गुषमच्छा तवसं मदाय ॥ ७.०२४.०३
 आ नो विश्वाभिरूतिभिः सजोषा ब्रह्म जुषाणो हर्यश्व याहि ।
 वरीवृजत्स्थविरेभिः सुशिप्रास्मे दधद्वृषणं शुष्ममिन्द्र ॥ ७.०२४.०४
 एष स्तोमो मह उग्राय वाहे धुरीश्वात्यो न वाजयन्नधायि ।
 इन्द्र त्वायमर्क ईद्रे वसूनां दिवीव द्यामधि नः श्रोमतं धाः ॥ ७.०२४.०५
 एवा न इन्द्र वार्यस्य पूर्धिं प्र ते महीं सुमतिं वेविदाम ।
 इषं पिन्व मघवद्भ्यः सुवीरां यूयं पात स्वस्तिभिः सदा नः ॥ ७.०२४.०६
 आ ते मह इन्द्रोत्युग्र समन्यवो यत्समरन्त सेनाः ।
 पताति दिद्युन्नर्यस्य बाह्वोर्मा ते मनो विष्वद्यश्ग्वि चारीत् ॥ ७.०२५.०१
 नि दुर्ग इन्द्र श्रथिह्यमित्रां अभि ये नो मतांसो अमन्ति ।
 आरे तं शंसं कृणुहि निनित्सोरा नो भर सम्भरणं वसूनाम् ॥ ७.०२५.०२
 शतं ते शिप्रिन्नृतयः सुदासे सहस्रं शंसा उत रातिरस्तु ।
 जहि वधर्वनुषो मर्त्यस्यास्मे द्युम्नमधि रत्नं च धेहि ॥ ७.०२५.०३
 त्वावतो हीन्द्र ऋत्वे अस्मि त्वावतोऽवितुः शूर रातौ ।
 विश्वेदहानि तविषीव उग्रं ओकः कृणुष्व हरिवो न मर्धीः ॥ ७.०२५.०४
 कुत्सा एते हर्यश्वाय शूषमिन्द्रे सहो देवजूतमियानाः ।
 सत्रा कृधि सुहना शूर वृत्रा वयं तरुत्राः सनुयाम वाजम् ॥ ७.०२५.०५
 एवा न इन्द्र वार्यस्य पूर्धिं प्र ते महीं सुमतिं वेविदाम ।
 इषं पिन्व मघवद्भ्यः सुवीरां यूयं पात स्वस्तिभिः सदा नः ॥ ७.०२५.०६
 न सोम इन्द्रमसुतो ममाद नाब्रह्माणो मघवानं सुतासः ।
 तस्मा उक्थं जनये यञ्जुजोषन्नृवन्नवीयः शृणवद्यथा नः ॥ ७.०२६.०१
 उक्थौक्थे सोम इन्द्र ममाद नीथेनीथे मघवानं सुतासः ।
 यदी सबाधः पितरं न पुत्राः समानदक्षा अवसे हवन्ते ॥ ७.०२६.०२
 चकार ता कृणवन्नूनमन्या यानि ब्रुवन्ति वेधसः सुतेषु ।

जनीरिव पतिरेकः समानो नि मामृजे पुर इन्द्रः सु सर्वाः ॥ ७.०२६.०३
एवा तमाहुरुत शृण्व इन्द्र एको विभक्ता तरणिर्मघानाम् ।
मिथस्तुर ऊतयो यस्य पूर्वीरस्मे भद्राणि सश्रत् प्रियाणि ॥ ७.०२६.०४
एवा वसिष्ठ इन्द्रमृतये नृकृष्टीनां वृषभं सुते गृणाति ।
सहस्रिण उप नो माहि वाजान्यूयं पात स्वस्तिभिः सदा नः ॥ ७.०२६.०५
इन्द्रं नरो नेमधिता हवन्ते यत्पार्या युनजते धियस्ताः ।
शूरो नृपाता शवसश्चकान आ गोमति ब्रजे भजा त्वं नः ॥ ७.०२७.०१
य इन्द्र शुष्मो मघवन्ते अस्ति शिक्षा सखिभ्यः पुरुहूत नृभ्यः ।
त्वं हि दृष्ठा मघवन्विचेता अपा वृधि परिवृतं न राधः ॥ ७.०२७.०२
इन्द्रो राजा जगतश्चर्षणीनामधि क्षमि विषुरूपं यदस्ति ।
ततो ददाति दाशुषे वसूनि चोदद्राध उपस्तुतश्चिदवार्क् ॥ ७.०२७.०३
नू चित्र इन्द्रो मघवा सहूती दानो वाजं नि यमते न ऊती ।
अनूना यस्य दक्षिणा पीपाय वामं नृभ्यो अभिर्वीता सखिभ्यः ॥ ७.०२७.०४
नू इन्द्र राये वरिवस्कृधी न आ ते मनो ववृत्याम मघाय ।
गोमदश्वावद्रथवद्वन्तो यूयं पात स्वस्तिभिः सदा नः ॥ ७.०२७.०५
ब्रह्मा ण इन्द्रोप याहि विद्वानर्वाश्चस्ते हरयः सन्तु युक्ताः ।
विश्वे चिद्धि त्वा विहवन्त मता अस्माकमिच्छृणुहि विश्वमिन्व ॥ ७.०२८.०१
हवं त इन्द्र महिमा व्यानद्ब्रह्म यत्पासि शवसिन्नृषीणाम् ।
आ यद्वज्रं दधिषे हस्त उग्र घोरः सन्क्रत्वा जनिष्ठा अपाव्हः ॥ ७.०२८.०२
तव प्रणीतीन्द्र जोहुवानान्सं यन्नृन्न रोदसी निनेथ ।
महे क्षत्राय शवसे हि जज्ञेऽतुजिं चित्तुतुजिरशिश्रत् ॥ ७.०२८.०३
एभिर्न इन्द्राहभिर्दशस्य दुर्मित्रासो हि क्षितयः पवन्ते ।
प्रति यच्चष्टे अनृतमनेना अव द्विता वरुणो मायी नः सात् ॥ ७.०२८.०४
वोचेमेदिन्द्र मघवानमेनं महो रायो राधसो यद्वदन्नः ।
यो अर्चतो ब्रह्मकृतिमविष्टो यूयं पात स्वस्तिभिः सदा नः ॥ ७.०२८.०५
अयं सोम इन्द्र तुभ्यं सुन्व आ तु प्र याहि हरिवस्तदोकाः ।
पिबा त्वशस्य सुषुतस्य चारोर्ददो मघानि मघवन्नियानः ॥ ७.०२९.०१

ब्रह्मन्वीर ब्रह्मकृतिं जुषाणोऽर्वाचीनो हरिभिर्याहि तूयम् ।
 अस्मिन्नु षु सवने मादयस्वोप ब्रह्माणि शृणव इमा नः ॥ ७.०२९.०२
 का ते अस्त्यरकृतिः सूक्तैः कदा नूनं ते मघवन्दाशेम ।
 विश्वा मतीरा ततने त्वायाधा म इन्द्र शृणवो हवेमा ॥ ७.०२९.०३
 उतो घा ते पुरुष्या इदासन्येषां पूर्वेषामशृणोर्ऋषीणाम् ।
 अधाहं त्वा मघवञ्जोहवीमि त्वं न इन्द्रासि प्रमतिः पितेव ॥ ७.०२९.०४
 वोचेमेदिन्द्र मघवानमेनं महो रायो राधसो यद्ददन्नः ।
 यो अर्चतो ब्रह्मकृतिमविष्टो यूयं पात स्वस्तिभिः सदा नः ॥ ७.०२९.०५
 आ नो देव शवसा याहि शुष्मिन्भवा वृध इन्द्र रायो अस्य ।
 महे नृम्णाय नृपते सुवन्न महि क्षत्राय पौस्याय शूर ॥ ७.०३०.०१
 हवन्त उ त्वा हव्यं विवाचि तनूषु शूराः सूर्यस्य सातौ ।
 त्वं विश्वेषु सेन्यो जनेषु त्वं वृत्राणि रन्धया सुहन्तु ॥ ७.०३०.०२
 अहा यदिन्द्र सुदिना व्युच्छान्दधो यत्केतुमुपमं समत्सु ।
 न्यश्रिभिः सीददसुरो न होता हुवानो अत्र सुभगाय देवान् ॥ ७.०३०.०३
 वयं ते त इन्द्र ये च देव स्तवन्त शूर ददतो मघानि ।
 यच्छा सूरिभ्य उपमं वरूथं स्वाभुवो जरणामश्रवन्त ॥ ७.०३०.०४
 वोचेमेदिन्द्र मघवानमेनं महो रायो राधसो यद्ददन्नः ।
 यो अर्चतो ब्रह्मकृतिमविष्टो यूयं पात स्वस्तिभिः सदा नः ॥ ७.०३०.०५
 प्र व इन्द्राय मादनं हर्यश्वाय गायत ।
 सखायः सोमपात्रे ॥ ७.०३१.०१
 शंसेदुक्थं सुदानव उत द्युक्षं यथा नरः ।
 चक्रुमा सत्यराधसे ॥ ७.०३१.०२
 त्वं न इन्द्र वाजयुस्त्वं गव्युः शतक्रतो ।
 त्वं हिरण्ययुर्वसो ॥ ७.०३१.०३
 वयमिन्द्र त्वायवोऽभि प्र णौनुमो वृषन् ।
 विद्धी त्वशस्य नो वसो ॥ ७.०३१.०४
 मा नो निदे च वक्तवेऽर्यो रन्धीरराव्यो ।

त्वे अपि ऋतुर्मम ॥ ७.०३१.०५
 त्वं वर्मासि सप्रथः पुरोयोधश्च वृत्रहन् ।
 त्वया प्रति ब्रुवे युजा ॥ ७.०३१.०६
 महौ उतासि यस्य तेऽनु स्वधावरी सहः ।
 मन्नाते इन्द्र रोदसी ॥ ७.०३१.०७
 तं त्वा मरुत्वती परि भुवद्वाणी सयावरी ।
 नक्षमाणा सह द्युभिः ॥ ७.०३१.०८
 ऊर्ध्वासस्त्वान्विन्दवो भुवन्दस्ममुप द्यवि ।
 सं ते नमन्त कृष्टयः ॥ ७.०३१.०९
 प्र वो महे महिवृधे भरध्वं प्रचेतसे प्र सुमतिं कृणुध्वम् ।
 विशः पूर्वीः प्र चरा चर्षणिप्राः ॥ ७.०३१.१०
 उरुव्यचसे महिने सुवृक्तिमिन्द्राय ब्रह्म जनयन्त विप्राः ।
 तस्य व्रतानि न मिनन्ति धीराः ॥ ७.०३१.११
 इन्द्रं वाणीरनुत्तमन्युमेव सत्रा राजानं दधिरे सहध्वै ।
 हर्यश्वाय बर्हया समापीन् ॥ ७.०३१.१२
 मो षु त्वा वाघतश्चनारे अस्मन्नि रीरमन् ।
 आरात्ताच्चित्सधमादं न आ गहीह वा सन्नुप श्रुधि ॥ ७.०३२.०१
 इमे हि ते ब्रह्मकृतः सुते सचा मधौ न मक्ष आसते ।
 इन्द्रे कामं जरितारो वसूयवो रथे न पादमा दधुः ॥ ७.०३२.०२
 रायस्कामो वज्रहस्तं सुदक्षिणं पुत्रो न पितरं हुवे ॥ ७.०३२.०३
 इम इन्द्राय सुन्विरे सोमासो दध्याशिरः ।
 ताँ आ मदाय वज्रहस्त पीतये हरिभ्यां याह्योक आ ॥ ७.०३२.०४
 श्रवच्छ्रुत्कर्ण ईयते वसूनां नू चित्रो मर्घिषद्विरः ।
 सद्यश्चिद्यः सहस्राणि शता ददन्नकिर्दित्सन्तमा मिनत् ॥ ७.०३२.०५
 स वीरो अप्रतिष्कृत इन्द्रेण शूशुवे नृभिः ।
 यस्ते गभीरा सवनानि वृत्रहन्सुनोत्या च धावति ॥ ७.०३२.०६
 भवा वरूथं मघवन्मघोनां यत्समजासि शर्धतः ।

वि त्वा॑ह॒तस्य॑ वे॒दनं॑ भजे॒म॒ह्या दू॒णाशो॑ भ॒रा ग॒यम् ॥ ७.०३२.०७
सु॒नोता॑ सो॒मपा॒त्रे सो॒ममिन्द्रा॑य व॒ज्रिणे॑ ।
प॒चता॑ प॒क्तीर॑वसे कृणु॒ध्वमित्पृ॑णन्नि॒त्पृण॑ते म॒यः ॥ ७.०३२.०८
मा स्रै॑धत सो॒मिनो॑ दक्ष॒ता म॒हे कृ॑णु॒ध्वं रा॒य आ॒तुजे॑ ।
त॒रणि॑रि॒ज्जय॑ति क्षेति॒ पुष्य॑ति न दे॒वासः क॒वत्र॑वे ॥ ७.०३२.०९
नकिः॑ सु॒दासो॑ रथं॒ पर्या॑स न री॒रम॑त् ।
इन्द्रो॑ यस्या॒विता॑ यस्य॒ मरु॑तो ग॒मत्स गो॑मति ब्र॒जे ॥ ७.०३२.१०
ग॒मद्वाजं॑ वा॒जय॑न्निन्द्र॒ मर्त्यो॑ यस्य॒ त्वम॑विता भुवः ।
अ॒स्माकं॑ बो॒ध्यवि॑ता रथाना॒मस्माकं॑ शू॒र नृ॑णाम् ॥ ७.०३२.११
उदि॒त्र्वस्य॑ रि॒च्यते॑ऽशो धनं॒ न जि॑ग्युषः ।
य इन्द्रो॑ हरि॒वान्न॑ द॒भन्ति॑ तं रि॒पो दक्ष॑ दधाति सो॒मिनि॑ ॥ ७.०३२.१२
म॒न्नम॑खर्वं सु॒धितं॑ सु॒पेश॑सं दधात॒ यज्ञि॑येष्वा ।
पूर्वी॑श्च॒न प्र॑सित॒यस्तर॑न्ति तं य इन्द्रे॒ कर्म॑णा भुवत् ॥ ७.०३२.१३
क॒स्तमि॑न्द्र॒ त्वाव॑सु॒मा मर्त्यो॑ दध॒र्षति॑ ।
श्रद्धा॑ इ॒त्ते म॑घ॒वन्पार्ये॑ दि॒वि वा॒जी वाजं॑ सि॒षास॑ति ॥ ७.०३२.१४
म॒घोनः॑ स्म वृ॒त्रह॑त्येषु चो॒दय॑ ये द॒दति॑ प्रि॒या व॑सु ।
तव॑ प्र॒णीती॑ हर्य॒श्व सूरि॑भिर्वि॒श्वा तरे॑म दुरि॒ता ॥ ७.०३२.१५
तवे॑दिन्द्रा॒वमं॑ व॒सु त्वं पु॑ष्यसि म॒ध्यम॑म् ।
स॒त्रा विश्व॑स्य॒ पर॑मस्य॒ राज॑सि नकि॒ष्ट्वा गो॑षु वृ॒ण्वते ॥ ७.०३२.१६
त्वं विश्व॑स्य॒ धन॑दा अ॒सि श्रु॑तो य ई॒ भव॑न्त्या॒जयः॑ ।
तवा॑यं विश्वः पुरु॒हूत॑ पा॒थिवो॑ऽव॒स्युर्नाम॑ भि॒क्षते ॥ ७.०३२.१७
यदि॑न्द्र॒ याव॑त॒स्त्वमे॒ताव॑द॒हमी॑शीय ।
स्तो॑तार॒मिद्वि॑धिषेय॒ रदा॑वसो न पा॒पत्वा॑य रा॒सीय ॥ ७.०३२.१८
शि॒क्षेय॑मिन्म॒हय॑ते दि॒वेदि॑वे रा॒य आ कु॑ह॒चिद्वि॑दे ।
न॒हि त्व॑द॒न्यन्म॑घवन्न॒ आप्यं॑ व॒स्यो अ॑स्ति पि॒ता च॒न ॥ ७.०३२.१९
त॒रणि॑रि॒त्सिषा॑सति वा॒जं पु॑र॒ध्या यु॒जा ।
आ व॑ इन्द्र॒ पुरु॑हूतं न॒मे गि॑रा॒ नेमिं॑ तष्टे॒व सु॒द्धम् ॥ ७.०३२.२०

न दुष्टृती मर्त्या विन्दते वसु न स्नेधन्तं रयिर्नशत् ।
 सुशक्तिरिन्मघवन्तुभ्यं मावते देष्णं यत्पार्ये दिवि ॥ ७.०३२.२१
 अभि त्वा शूर नोनुमोऽदुग्धा इव धेनवः ।
 ईशानमस्य जगतः स्वर्दशमीशानमिन्द्र तस्थुषः ॥ ७.०३२.२२
 न त्वावां अन्यो दिव्यो न पार्थिवो न जातो न जनिष्यते ।
 अश्वायन्तो मघवन्निन्द्र वाजिनो गव्यन्तस्त्वा हवामहे ॥ ७.०३२.२३
 अभी षतस्तदा भरेन्द्र ज्यायः कनीयसः ।
 पुरूवसुर्हि मघवन्सनादसि भरेभरे च हव्यः ॥ ७.०३२.२४
 परा गुदस्व मघवन्नमित्रान्सुवेदा नो वसू कृधि ।
 अस्माकं बोध्यविता महाधने भवा वृधः सखीनाम् ॥ ७.०३२.२५
 इन्द्र ऋतु न आ भर पिता पुत्रेभ्यो यथा ।
 शिक्षा णो अस्मिन्पुरुहूत यामनि जीवा ज्योतिरशीमहि ॥ ७.०३२.२६
 मा नो अज्ञाता वृजना दुराध्योऽ माशिवासो अव क्रमुः ।
 त्वया वयं प्रवतः शश्वतीरपोऽति शूर तरामसि ॥ ७.०३२.२७
 श्वित्यञ्चो मा दक्षिणतस्कपर्दा धियंजिन्वासो अभि हि प्रमन्दुः ।
 उत्तिष्ठन्वोचे परि बर्हिषो नृन्न मे दूरादवितवे वसिष्ठाः ॥ ७.०३३.०१
 दूरादिन्द्रमनयन्ना सुतेन तिरो वैशन्तमति पान्तमुग्रम् ।
 पाशद्युम्नस्य वायतस्य सोमात्सुतादिन्द्रोऽवृणीता वसिष्ठान् ॥ ७.०३३.०२
 एवेन्नु कं सिन्धुमेभिस्ततारेवेन्नु कं भेदमेभिर्जघान ।
 एवेन्नु कं दाशराज्ञे सुदासं प्रावदिन्द्रो ब्रह्मणा वो वसिष्ठाः ॥ ७.०३३.०३
 जुष्टी नरो ब्रह्मणा वः पितृणामक्षमव्ययं न किला रिषाथ ।
 यच्छक्करीषु बृहता रवेणेन्द्रे शुष्ममदधाता वसिष्ठाः ॥ ७.०३३.०४
 उद्दामिवेत्तृष्णजो नाथितासोऽदीधयुर्दाशराज्ञे वृतासः ।
 वसिष्ठस्य स्तुवत इन्द्रो अश्रोदुरुं तृत्सुभ्यो अकृणोदु लोकम् ॥ ७.०३३.०५
 दण्डा इवेद्भोअजनास आसन्परिच्छिन्ना भरता अर्भकासः ।
 अभवच्च पुरएता वसिष्ठ आदित्तृत्सूनां विशो अप्रथन्त ॥ ७.०३३.०६
 त्रयः कृण्वन्ति भुवनेषु रेतस्तिस्त्रः प्रजा आर्या ज्योतिरग्राः ।

त्रयो घर्मास उषसं सचन्ते सर्वाँ इत्ताँ अनु विदुर्वसिष्ठाः ॥ ७.०३३.०७
 सूर्यस्येव वक्षथो ज्योतिरेषां समुद्रस्येव महिमा गभीरः ।
 वातस्येव प्रजवो नान्येन स्तोमो वसिष्ठा अन्वेतवे वः ॥ ७.०३३.०८
 त इन्निष्यं हृदयस्य प्रकेतैः सहस्रवल्शमभि सं चरन्ति ।
 यमेन ततं परिधिं वयन्तोऽप्सरस उप सेदुर्वसिष्ठाः ॥ ७.०३३.०९
 विद्युतो ज्योतिः परि संजिहानं मित्रावरुणा यदपश्यतां त्वा ।
 तत्ते जन्मोतैकं वसिष्ठागस्त्यो यत्त्वा विश आजभार ॥ ७.०३३.१०
 उतासि मैत्रावरुणो वसिष्ठोर्वश्या ब्रह्मन्मनसोऽधि जातः ।
 द्रप्सं स्कन्नं ब्रह्मणा दैव्येन विश्वे देवाः पुष्करे त्वाददन्त ॥ ७.०३३.११
 स प्रकेत उभयस्य प्रविद्वान्सहस्रदान उत वा सदानः ।
 यमेन ततं परिधिं वयिष्यन्नप्सरसः परि जज्ञे वसिष्ठः ॥ ७.०३३.१२
 सत्रे ह जाताविषिता नमोभिः कुम्भे रेतः सिषिचतुः समानम् ।
 ततो ह मान उदियाय मध्यात्ततो जातमृषिमाहुर्वसिष्ठम् ॥ ७.०३३.१३
 उक्थभृतं सामभृतं बिभर्ति ग्रावाणं बिभ्रत्प्र वदात्यग्रे ।
 उपैनमाध्वं सुमनस्यमाना आ वो गच्छाति प्रतृदो वसिष्ठः ॥ ७.०३३.१४
 प्र शुक्रेतु देवी मनीषा अस्मत्सुतष्टो रथो न वाजी ॥ ७.०३४.०१
 विदुः पृथिव्या दिवो जनित्रं शृण्वन्त्यापो अध क्षरन्तीः ॥ ७.०३४.०२
 आपश्चिदस्मै पिन्वन्त पृथ्वीवृत्रेषु शूरा मंसन्त उग्राः ॥ ७.०३४.०३
 आ धूर्षस्मै दधाताश्वानिन्द्रो न वज्री हिरण्यबाहुः ॥ ७.०३४.०४
 अभि प्र स्थाताहेव यज्ञं यातेव पत्मन्तमना हिनोत ॥ ७.०३४.०५
 त्मना समत्सु हिनोत यज्ञं दधात केतुं जनाय वीरम् ॥ ७.०३४.०६
 उदस्य शुष्माद्भानुर्नार्त बिभर्ति भारं पृथिवी न भूम ॥ ७.०३४.०७
 ह्यामि देवाँ अयातुरग्रे साधनृतेन धियं दधामि ॥ ७.०३४.०८
 अभि वो देवीं धियं दधिध्वं प्र वो देवत्रा वाचं कृणुध्वम् ॥ ७.०३४.०९
 आ चष्ट आसां पाथो नदीनां वरुण उग्रः सहस्रचक्षाः ॥ ७.०३४.१०
 राजा राष्टानां पेशो नदीनामनुत्तमस्मै क्षत्रं विश्वायु ॥ ७.०३४.११
 अविष्टो अस्मान्विश्वासु विक्ष्वद्यु कृणोत शंसं निनित्सोः ॥ ७.०३४.१२

व्येतु दिद्युद्विषामशवा युयोत विष्वग्रपस्तनूनाम् ॥ ७.०३४.१३
 अवीन्नो अग्निर्हव्यान्नमोभिः प्रेष्ठो अस्मा अधायि स्तोमः ॥ ७.०३४.१४
 सजूर्देवेभिरपां नपातं सखायं कृध्वं शिवो नो अस्तु ॥ ७.०३४.१५
 अञ्जामुक्थैरहिं गृणीषे बुध्ने नदीनां रजस्सु षीदन् ॥ ७.०३४.१६
 मा नोऽहिर्बुध्न्यो रिषे धान्मा यज्ञो अस्य स्निधदतायोः ॥ ७.०३४.१७
 उत न एषु नृषु श्रवो धुः प्र राये यन्तु शर्धन्तो अर्यः ॥ ७.०३४.१८
 तपन्ति शत्रुं स्वर्षणं भूमा महासेनासो अमेभिरेषाम् ॥ ७.०३४.१९
 आ यन्नः पत्नीर्गमन्त्यच्छा त्वष्टा सुपाणिर्दधातु वीरान् ॥ ७.०३४.२०
 प्रति नः स्तोमं त्वष्टा जुषेत स्यादस्मे अरमतिर्वसूयुः ॥ ७.०३४.२१
 ता नो रासन्नातिषाचो वसून्या रोदसी वरुणानी शृणोतु ।
 वरूत्रीभिः सुशरणो नो अस्तु त्वष्टा सुदत्रो वि दधातु रायः ॥ ७.०३४.२२
 तन्नो रायः पर्वतास्तन्न आपस्तद्रातिषाच ओषधीरुत द्यौः ।
 वनस्पतिभिः पृथिवी सजोषा उभे रोदसी परि पासतो नः ॥ ७.०३४.२३
 अनु तदुर्वी रोदसी जिहातामनु द्युक्षो वरुण इन्द्रसखा ।
 अनु विश्वे मरुतो ये सहासो रायः स्याम धरुण धियध्यै ॥ ७.०३४.२४
 तन्न इन्द्रो वरुणो मित्रो अग्निराप ओषधीर्वनिनो जुषन्त ।
 शर्मन्स्याम मरुतामुपस्थे यूयं पात स्वस्तिभिः सदा नः ॥ ७.०३४.२५
 शं न इन्द्राग्नी भवतामवोभिः शं न इन्द्रावरुणा रातहव्या ।
 शमिन्द्रासोमा सुविताय शं योः शं न इन्द्रापूषणा वाजसातौ ॥ ७.०३५.०१
 शं नो भगः शमु नः शंसो अस्तु शं नः पुरधिः शमु सन्तु रायः ।
 शं नः सत्यस्य सुयमस्य शंसः शं नो अर्यमा पुरुजातो अस्तु ॥ ७.०३५.०२
 शं नो धाता शमु धर्ता नो अस्तु शं न उरूची भवतु स्वधाभिः ।
 शं रोदसी बृहती शं नो अद्रिः शं नो देवानां सुहवानि सन्तु ॥ ७.०३५.०३
 शं नो अग्निर्ज्योतिरनीको अस्तु शं नो मित्रावरुणावश्विना शम् ।
 शं नः सुकृता सुकृतानि सन्तु शं न इषिरो अभि वातु वातः ॥ ७.०३५.०४
 शं नो द्यावापृथिवी पूर्वहूतौ शमन्तरिक्षं दृशये नो अस्तु ।
 शं न ओषधीर्वनिनो भवन्तु शं नो रजसस्पतिरस्तु जिष्णुः ॥ ७.०३५.०५

शं न इन्द्रो वसुभिर्देवो अस्तु शमादित्येभिर्वरुणः सुशंसः ।
 शं नो रुद्रो रुद्रेभिर्जलापः शं नस्त्वष्टा ग्राभिरिह शृणोतु ॥ ७.०३५.०६
 शं नः सोमो भवतु ब्रह्म शं नः शं नो ग्रावाणः शमु सन्तु यज्ञाः ।
 शं नः स्वरूपां मितयो भवन्तु शं नः प्रस्वः शम्बस्तु वेदिः ॥ ७.०३५.०७
 शं नः सूर्य उरुचक्षा उदेतु शं नश्चतस्रः प्रदिशो भवन्तु ।
 शं नः पर्वता ध्रुवयो भवन्तु शं नः सिन्धवः शमु सन्त्वापः ॥ ७.०३५.०८
 शं नो अदितिर्भवतु व्रतेभिः शं नो भवन्तु मरुतः स्वर्काः ।
 शं नो विष्णुः शमु पूषा नो अस्तु शं नो भवित्रं शम्बस्तु वायुः ॥ ७.०३५.०९
 शं नो देवः सविता त्रायमाणः शं नो भवन्तुषसो विभातीः ।
 शं नः पर्जन्यो भवतु प्रजाभ्यः शं नः क्षेत्रस्य पतिरस्तु शम्भुः ॥ ७.०३५.१०
 शं नो देवा विश्वदेवा भवन्तु शं सरस्वती सह धीभिरस्तु ।
 शमभिषाचः शमु रातिषाचः शं नो दिव्याः पार्थिवाः शं नो अप्याः ॥ ७.०३५.११
 शं नः सत्यस्य पतयो भवन्तु शं नो अर्वन्तः शमु सन्तु गावः ।
 शं न ऋभवः सुकृतः सुहस्ताः शं नो भवन्तु पितरो हवेषु ॥ ७.०३५.१२
 शं नो अज एकपाद्देवो अस्तु शं नोऽहिर्बुध्न्यः शं समुद्रः ।
 शं नो अपां नपात्पेरुरस्तु शं नः पृश्निर्भवतु देवगोपा ॥ ७.०३५.१३
 आदित्या रुद्रा वसवो जुषन्तेदं ब्रह्म क्रियमाणं नवीयः ।
 शृण्वन्तु नो दिव्याः पार्थिवासो गोजाता उत ये यज्ञियांसः ॥ ७.०३५.१४
 ये देवानां यज्ञिया यज्ञियानां मनोर्यजत्रा अमृता ऋतज्ञाः ।
 ते नो रासन्तामुरुगायमद्य यूयं पात स्वस्तिभिः सदा नः ॥ ७.०३५.१५
 प्र ब्रह्मैतु सदनादृतस्य वि रश्मिभिः ससृजे सूर्यो गाः ।
 वि सानुना पृथिवी सस्र उर्वी पृथु प्रतीकमध्येधे अग्निः ॥ ७.०३६.०१
 इमां वा मित्रावरुणा सुवृक्तिमिषं न कृण्वे असुरा नवीयः ।
 इनो वामन्यः पदवीरदब्धो जनं च मित्रो यतति ब्रुवाणः ॥ ७.०३६.०२
 आ वातस्य ध्रजतो रन्त इत्या अपीपयन्त धेनवो न सूदाः ।
 महो दिवः सदने जायमानोऽचिक्रदद्वृषभः सस्मिन्नूधन् ॥ ७.०३६.०३
 गिरा य एता युनजद्धरी त इन्द्र प्रिया सुरथा शूर धायू ।

प्र यो म॒न्युं रि॒रि॒क्षतो॑ मि॒नात्या॑ सु॒क्रतु॑म॒र्यम॑र्णं ववृ॒त्याम् ॥ ७.०३६.०४
 यज॑न्ते अस्य स॒ख्यं वय॑श्च नमस्वि॒नः स्व ऋ॑तस्य धाम॒न ।
 वि पृ॒क्षो बा॒बधे॑ नृभिः स्तवान॑ इ॒दं नमो॑ रु॒द्राय॑ प्रेष्ठम् ॥ ७.०३६.०५
 आ यत्सा॑कं य॒शसो॑ वाव॒शानाः॑ सर॒स्वती॑ सप्तथी॒ सिन्धु॑माता ।
 याः सु॒ष्वय॑न्त सु॒दुघाः॑ सु॒धारा॑ अ॒भि स्वे॒न प॑यसा पी॒प्यानाः॑ ॥ ७.०३६.०६
 उ॒त त्ये॑ नो म॒रुतो॑ म॒न्दसाना॑ धियं॒ तोकं॑ च वा॒जिनो॑ऽवन्तु ।
 मा नः॑ परि॒ ख्यद॑क्षरा च॒रन्त्य॑वी॒वृध॑न्युज्यं॒ ते रयि॑ं नः ॥ ७.०३६.०७
 प्र वो म॒हीम॑रमतिं कृणु॒ध्वं प्र पू॑षणं वि॒दध्यं॑ न वी॒रम् ।
 भगं॑ धि॒योऽवि॑तारं नो अ॒स्याः सा॒तौ वाजं॑ रा॒तिषा॑चं पुर॒धिम् ॥ ७.०३६.०८
 अ॒च्छायं॑ वो म॒रुतः॑ श्लोक॒ ए॒त्वच्छा॑ विष्णुं॒ निषि॑क्तपामवोभिः ।
 उ॒त प्र॒जायै॑ गृण॒ते वयो॑ धु॒र्युयं॑ पा॒त स्व॒स्तिभिः॑ सदा नः ॥ ७.०३६.०९
 आ वो वा॒हिष्ठो॑ वहतु स्त॒वध्ने॑ रथो॒ वाजा॑ ऋ॒भुक्ष॑णो अमृ॒क्तः ।
 अ॒भि त्रि॑पृ॒ष्ठैः स॒वने॑षु सोमै॒र्मदे॑ सु॒शिप्रा॑ म॒हभिः॑ पृणध्वम् ॥ ७.०३७.०१
 यूयं॑ ह॒ रत्नं॑ म॒घव॑त्सु ध॒त्थ स्व॑र्दृशं ऋ॒भुक्ष॑णो अमृ॒क्तम् ।
 सं य॒ज्ञेषु॑ स्वधाव॒न्तः पि॒बध्वं॑ वि नो रा॒धासि॑ म॒तिभि॑र्दयध्वम् ॥ ७.०३७.०२
 उ॒वोचि॑थ हि म॒घव॑न्दे॒ष्णं म॒हो अ॒भस्य॑ वसु॒नो वि॒भागे॑ ।
 उ॒भा ते॑ पूर्णा॒ वसु॑ना ग॒भस्ती॑ न सू॒नृता॑ नि यम॒ते वस॑व्या ॥ ७.०३७.०३
 त्वमि॒न्द्र स्व॑यशा ऋ॒भुक्षा॑ वा॒जो न सा॒धुर॑स्तमे॒ष्यृक्का॑ ।
 वयं॑ नु ते दा॒श्वान्सः॑ स्याम॒ ब्रह्म॑ कृण्व॒न्तो हरि॑वो वसि॒ष्ठाः ॥ ७.०३७.०४
 स॒निता॑सि प्र॒वतो॑ दा॒शुषे॑ चि॒द्याभि॑र्वि॒वेषो॑ हर्यश्च धी॒भिः ।
 व॒वन्मा॑ नु ते यु॒ज्याभि॑रू॒ती क॒दा न इ॒न्द्र रा॑य आ दशस्येः ॥ ७.०३७.०५
 वा॒सय॑सीव वे॒धस॑स्त्वं नः क॒दा न इ॒न्द्र व॑चसो बु॒बोधः॑ ।
 अस्तं॑ ता॒त्या धि॒या रयि॑ं सु॒वीरं॑ पृ॒क्षो नो॑ अर्वा॒ न्युही॑त वा॒जी ॥ ७.०३७.०६
 अ॒भि यं दे॒वी नि॒र्ऋ॑तिश्चि॒दीशे॑ नक्ष॒न्त इ॒न्द्र श॑रदः सु॒पृक्षः॑ ।
 उप॑ त्रि॒ब॒न्धु॑र्जरद॒ष्टिमे॒त्यस्व॑वेशं यं कृण॒वन्त॑ म॒र्ताः ॥ ७.०३७.०७
 आ नो॑ रा॒धासि॑ स॒वितः॑ स्त॒वध्या॑ आ रा॒यो य॑न्तु प॒र्वत॑स्य रा॒तौ ।
 सदा॑ नो दि॒व्यः पा॒युः सि॑षक्तु यूयं पा॒त स्व॒स्तिभिः॑ सदा नः ॥ ७.०३७.०८

उदु ष्य देवः सविता ययाम हिरण्ययीममतिं यामशिश्नेत् ।
 नूनं भगो हव्यो मानुषेभिर्वि यो रत्ना पुरूवसुर्दधाति ॥ ७.०३८.०१
 उदु तिष्ठ सवितः श्रुध्यश्स्य हिरण्यपाणे प्रभृतावृतस्य ।
 व्युश्वीं पृथ्वीममतिं सृजान आ नृभ्यो मर्तभोजनं सुवानः ॥ ७.०३८.०२
 अपि द्युतः सविता देवो अस्तु यमा चिद्विश्वे वसवो गृणन्ति ।
 स नः स्तोमान्नमस्यश्चनो धाद्विश्वेभिः पातु पायुभिर्नि सूरीन् ॥ ७.०३८.०३
 अभि यं देव्यदितिर्गृणाति सवं देवस्य सवितुर्जुषाणा ।
 अभि सम्राजो वरुणो गृणन्त्यभि मित्रासो अर्यमा सजोषाः ॥ ७.०३८.०४
 अभि ये मिथो वनुषः सपन्ते रातिं दिवो रातिषाचः पृथिव्याः ।
 अहिर्बुध्न्य उत नः शृणोतु वरुत्र्येकधेनुभिर्नि पातु ॥ ७.०३८.०५
 अनु तन्नो जास्पतिर्मसीष्ट रत्नं देवस्य सवितुरियानः ।
 भगमुग्रोऽवसे जोहवीति भगमनुग्रो अध याति रत्नम् ॥ ७.०३८.०६
 शं नो भवन्तु वाजिनो हवेषु देवताता मितद्रवः स्वर्काः ।
 जम्भयन्तोऽहिं वृकं रक्षांसि सनेम्यस्मद्युयवन्नमीवाः ॥ ७.०३८.०७
 वाजेवाजेऽवत वाजिनो नो धनेषु विप्रा अमृता ऋतज्ञाः ।
 अस्य मध्वः पिबत मादयध्वं तृप्ता यात पथिभिर्देवयानैः ॥ ७.०३८.०८
 ऊर्ध्वो अग्निः सुमतिं वस्वो अश्रेत्प्रतीची जूर्णिर्देवतातिमेति ।
 भेजाते अद्री रथ्येव पन्थामृतं होता न इषितो यजाति ॥ ७.०३९.०१
 प्र वावृजे सुप्रया बर्हिरेषामा विशपतीव बीरिट इयाते ।
 विशामक्तोरुषसः पूर्वहूतौ वायुः पूषा स्वस्तये नियुत्वान् ॥ ७.०३९.०२
 ज्मया अत्र वसवो रन्त देवा उरावन्तरिक्षे मर्जयन्त शुभ्राः ।
 अर्वाक्पथ उरुन्नयः कृणुध्वं श्रोता दूतस्य जग्मुषो नो अस्य ॥ ७.०३९.०३
 ते हि यज्ञेषु यज्ञियास ऊमाः सधस्थं विश्वे अभि सन्ति देवाः ।
 ताँ अध्वर उशतो यक्ष्यग्ने श्रुष्टी भगं नासत्या पुरधिम् ॥ ७.०३९.०४
 आग्ने गिरो दिव आ पृथिव्या मित्रं वह वरुणमिन्द्रमग्निम् ।
 आर्यमणमदितिं विष्णुमेषां सरस्वती मरुतो मादयन्ताम् ॥ ७.०३९.०५
 ररे हव्यं मतिभिर्यज्ञियानां नक्षत्कामं मर्त्यानामसिन्वन् ।

धाता रयिमविदस्यं सदासां सक्षीमहि युज्येभिर्नु देवैः ॥ ७.०३९.०६
 नू रोदसी अभिष्टुते वसिष्ठैऋतावानो वरुणो मित्रो अग्निः ।
 यच्छन्तु चन्द्रा उपमं नो अर्कं यूयं पात स्वस्तिभिः सदा नः ॥ ७.०३९.०७
 ओ श्रुष्टिविदध्या३ समेतु प्रति स्तोमं दधीमहि तुराणाम् ।
 यदद्य देवः सविता सुवाति स्यामास्य रत्निनो विभागे ॥ ७.०४०.०१
 मित्रस्तन्नो वरुणो रोदसी च द्युभक्तमिन्द्रो अर्यमा ददातु ।
 दिदेष्टु देव्यदिति रेक्णो वायुश्च यन्नियुवेते भगश्च ॥ ७.०४०.०२
 सेद्गो अस्तु मरुतः स शुष्मी यं मर्त्यं पृषदश्वा अवाथ ।
 उतेमग्निः सरस्वती जुनन्ति न तस्य रायः पर्येतास्ति ॥ ७.०४०.०३
 अयं हि नेता वरुण ऋतस्य मित्रो राजानो अर्यमापो धुः ।
 सुहवा देव्यदितिरनर्वा ते नो अंहो अति पर्षन्नरिष्टान् ॥ ७.०४०.०४
 अस्य देवस्य मीळ्हुषो वया विष्णोरेषस्य प्रभृथे हविर्भिः ।
 विदे हि रुद्रो रुद्रियं महित्वं यासिष्टं वर्तिरश्विनाविरावत् ॥ ७.०४०.०५
 मात्र पूषन्नाघृण इरस्यो वरूत्री यद्रातिषाचश्च रासन् ।
 मयोभुवो नो अर्वन्तो नि पान्तु वृष्टिं परिज्मा वातो ददातु ॥ ७.०४०.०६
 नू रोदसी अभिष्टुते वसिष्ठैऋतावानो वरुणो मित्रो अग्निः ।
 यच्छन्तु चन्द्रा उपमं नो अर्कं यूयं पात स्वस्तिभिः सदा नः ॥ ७.०४०.०७
 प्रातरग्निं प्रातरिन्द्रं हवामहे प्रातर्मित्रावरुणा प्रातरश्विना ।
 प्रातर्भगं पूषणं ब्रह्मणस्पतिं प्रातः सोममुत रुद्रं हुवेम ॥ ७.०४१.०१
 प्रातर्जितं भगमुग्रं हुवेम वयं पुत्रमदितेर्यो विधर्ता ।
 आध्रश्चिद्यं मन्यमानस्तुरश्चिद्राजा चिद्यं भगं भक्षीत्याह ॥ ७.०४१.०२
 भग प्रणेतर्भग सत्यराधो भगेमां धियमुदवा ददन्नः ।
 भग प्र णो जनय गोभिरश्वैर्भग प्र नृभिर्नूवन्तः स्याम ॥ ७.०४१.०३
 उतेदानीं भगवन्तः स्यामोत प्रपित्व उत मध्ये अह्वाम् ।
 उतोदिता मघवन्सूर्यस्य वयं देवानां सुमतौ स्याम ॥ ७.०४१.०४
 भग एव भगवाँ अस्तु देवास्तेन वयं भगवन्तः स्याम ।
 तं त्वा भग सर्वं इज्जोहवीति स नो भग पुरएता भवेह ॥ ७.०४१.०५

समध्वरायोषसो नमन्त दधिक्रावेव शुचये पदाय ।
अर्वाचीनं वसुविदं भगं नो रथमिवाश्वा वाजिन आ वहन्तु ॥ ७.०४१.०६
अश्वावतीर्गोमतीर्न उषासो वीरवतीः सदमुच्छन्तु भद्राः ।
घृतं दुहाना विश्वतः प्रपीता यूयं पात स्वस्तिभिः सदा नः ॥ ७.०४१.०७
प्र ब्रह्माणो अङ्गिरसो नक्षन्त प्र ऋन्दनुर्नभन्यस्य वेतु ।
प्र धेनव उदप्रुतो नवन्त युज्यातामद्री अध्वरस्य पेशः ॥ ७.०४२.०१
सुगस्ते अग्ने सनवित्तो अध्वा युक्त्वा सुते हरितो रोहितश्च ।
ये वा सद्मन्नरुषा वीरवाहो हुवे देवानां जनिमानि सन्तः ॥ ७.०४२.०२
समु वो यज्ञं महयन्नमोभिः प्र होता मन्द्रो रिरिच उपाके ।
यजस्व सु पुर्वणीक देवाना यज्ञियामरमतिं ववृत्याः ॥ ७.०४२.०३
यदा वीरस्य रेवतो दुरोणे स्योनशीरतिथिराचिकेतत् ।
सुप्रीतो अग्निः सुधितो दम आ स विशे दाति वार्यमियत्यै ॥ ७.०४२.०४
इमं नो अग्ने अध्वरं जुषस्व मरुत्स्विन्द्रे यशसं कृधी नः ।
आ नक्ता बर्हिः सदतामुषासोशन्ता मित्रावरुणा यजेह ॥ ७.०४२.०५
एवाग्निं सहस्यं वसिष्ठो रायस्कामो विश्वप्स्यस्य स्तौत् ।
इष रयिं पप्रथद्वाजमस्मे यूयं पात स्वस्तिभिः सदा नः ॥ ७.०४२.०६
प्र वो यज्ञेषु देवयन्तो अर्चन्द्यावा नमाभिः पृथिवी इषध्वै ।
येषां ब्रह्माण्यसमानि विप्रा विश्वग्वियन्ति वनिनो न शाखाः ॥ ७.०४३.०१
प्र यज्ञ एतु हेत्वो न सप्तिरुद्यच्छध्वं समनसो घृताचीः ।
स्तृणीत बर्हिरध्वराय साधूर्ध्वा शोचींषि देवयून्यस्थुः ॥ ७.०४३.०२
आ पुत्रासो न मातरं विभृत्राः सानौ देवासो बर्हिषः सदन्तु ।
आ विश्वाची विदथ्यामनक्तग्ने मा नो देवताता मृधस्कः ॥ ७.०४३.०३
ते सीषपन्त जोषमा यजत्रा ऋतस्य धाराः सुदुघा दुहानाः ।
ज्येष्ठ वो अद्य मह आ वसूनामा गन्तन समनसो यति ष्ट ॥ ७.०४३.०४
एवा नो अग्ने विक्त्वा दशस्य त्वया वयं सहसावन्नास्त्राः ।
राया युजा सधमादो अरिष्टा यूयं पात स्वस्तिभिः सदा नः ॥ ७.०४३.०५
दधिक्रां वः प्रथममश्विनोषसमग्निं समिद्धं भगमूतये हुवे ।

इन्द्रं विष्णुं पूषणं ब्रह्मणस्पतिमादित्यान्यावापृथिवी अपः स्वः ॥ ७.०४४.०१
 दधिक्रामु नमसा बोधयन्त उदीराणा यज्ञमुपप्रयन्तः ।
 इळा देवीं बर्हिषि सादयन्तोऽश्विना विप्रा सुहवा हुवेम ॥ ७.०४४.०२
 दधिक्रावाणं बुबुधानो अग्निमुप ब्रुव उषसं सूर्यं गाम् ।
 ब्रध्नं माँश्चतोरवरुणस्य बभ्रुं ते विश्वास्मद्दुरिता यावयन्तु ॥ ७.०४४.०३
 दधिक्रावा प्रथमो वाज्यर्वाग्ने रथानां भवति प्रजानन् ।
 संविदान उषसा सूर्येणादित्येभिर्वसुभिरङ्गिरोभिः ॥ ७.०४४.०४
 आ नो दधिक्राः पथ्यामनक्तृतस्य पन्थामन्वेतवा उ ।
 शृणोतु नो देव्यं शर्षो अग्निः शृण्वन्तु विश्वे महिषा अमूराः ॥ ७.०४४.०५
 आ देवो यातु सविता सुरलोऽन्तरिक्षप्रा वहमानो अश्वैः ।
 हस्ते दधानो नर्या पुरूणि निवेशयश्च प्रसुवश्च भूम ॥ ७.०४५.०१
 उदस्य बाहू शिथिरा बृहन्ता हिरण्यया दिवो अन्ताँ अनष्टाम् ।
 नूनं सो अस्य महिमा पनिष्ट सूरश्चिदस्मा अनु दादपस्याम् ॥ ७.०४५.०२
 स घा नो देवः सविता सहावा साविषद्वसुपतिर्वसूनि ।
 विश्रयमाणो अमतिमुरूचीं मर्तभोजनमध रासते नः ॥ ७.०४५.०३
 इमा गिरः सवितारं सुजिह्वं पूर्णगभस्तिमीळते सुपाणिम् ।
 चित्रं वयो बृहदस्मे दधातु यूयं पात स्वस्तिभिः सदा नः ॥ ७.०४५.०४
 इमा रुद्राय स्थिरधन्वने गिरः क्षिप्रेषवे देवाय स्वधात्रे ।
 अपाव्हाय सहमानाय वेधसे तिग्मायुधाय भरता शृणोतु नः ॥ ७.०४६.०१
 स हि क्षयेण क्षम्यस्य जन्मनः साम्राज्येन दिव्यस्य चेतति ।
 अवन्नवन्तीरुप नो दुरश्चरानमीवो रुद्र जासु नो भव ॥ ७.०४६.०२
 या ते दिद्युदवसृष्टा दिवस्पारि क्षमया चरति परि सा वृणक्तु नः ।
 सहस्रं ते स्वपिवात भेषजा मा नस्तोकेषु तनयेषु रीरिषः ॥ ७.०४६.०३
 मा नो वधी रुद्र मा परा दा मा ते भूम प्रसितौ हीळितस्य ।
 आ नो भज बर्हिषि जीवशंसे यूयं पात स्वस्तिभिः सदा नः ॥ ७.०४६.०४
 आपो यं वः प्रथमं देवयन्त इन्द्रपानमूर्मिमकृण्वतेळः ।
 तं वो वयं शुचिमरिप्रमद्य घृतप्रुषं मधुमन्तं वनेम ॥ ७.०४७.०१

तमूर्मिमापो मधुमत्तमं वोऽपां नपादवत्वाशुहेमा ।
यस्मिन्निन्द्रो वसुभिर्मादयाते तमश्याम देवयन्तो वो अद्य ॥ ७.०४७.०२
शतपवित्राः स्वधया मदन्तीर्देवीर्देवानामपि यन्ति पाथः ।
ता इन्द्रस्य न मिनन्ति व्रतानि सिन्धुभ्यो हव्यं घृतवञ्जुहोत ॥ ७.०४७.०३
याः सूर्यो रश्मिभिराततान याभ्य इन्द्रो अरदद्नातुमूर्मिम् ।
ते सिन्धवो वरिवो धातना नो यूयं पात स्वस्तिभिः सदा नः ॥ ७.०४७.०४
ऋभुक्षणो वाजा मादयध्वमस्मे नरो मघवानः सुतस्य ।
आ वोऽर्वाचः क्रतवो न यातां विभ्वो रथं नर्यं वर्तयन्तु ॥ ७.०४८.०१
ऋभुर्ऋभुभिरभि वः स्याम विभ्वो विभुभिः शवसा शवांसि ।
वाजो अस्माँ अवतु वाजसाताविन्द्रेण युजा तरुषेम वृत्रम् ॥ ७.०४८.०२
ते चिद्धि पूर्वोरभि सन्ति शासा विश्वाँ अर्यं उपरताति वन्वन् ।
इन्द्रो विर्वाँ ऋभुक्षा वाजो अर्यः शत्रोर्मिथत्या कृणवन्वि नृग्मम् ॥ ७.०४८.०३
नू देवासो वरिवः कर्तना नो भूत नो विश्वेऽवसे सजोषाः ।
समस्मे इषं वसवो ददीरन्यूयं पात स्वस्तिभिः सदा नः ॥ ७.०४८.०४
समुद्रज्येष्ठाः सलिलस्य मध्यात्पुनाना यन्त्यनिविशमानाः ।
इन्द्रो या वज्री वृषभो रराद ता आपो देवीरिह मामवन्तु ॥ ७.०४९.०१
या आपो दिव्या उत वा स्रवन्ति खनित्रिमा उत वा याः स्वयंजाः ।
समुद्रार्था याः शुचयः पावकास्ता आपो देवीरिह मामवन्तु ॥ ७.०४९.०२
यासां राजा वरुणो याति मध्ये सत्यानृते अवपश्यञ्जनानाम् ।
मधुश्चुतः शुचयो याः पावकास्ता आपो देवीरिह मामवन्तु ॥ ७.०४९.०३
यासु राजा वरुणो यासु सोमो विश्वे देवा यासूर्जं मदन्ति ।
वैश्वानरो यास्वग्निः प्रविष्टस्ता आपो देवीरिह मामवन्तु ॥ ७.०४९.०४
आ मां मित्रावरुणेह रक्षतं कुलाययद्विश्वयन्मा न आ गन् ।
अजकावं दुर्दृशीकं तिरो दधे मा मां पद्येन रपसा विदत्सरुः ॥ ७.०५०.०१
यद्विजामन्परुषि वन्दनं भुवदष्टीवन्तौ परि कुल्फौ च देहत् ।
अग्निष्टच्छोचन्नप बाधतामितो मा मां पद्येन रपसा विदत्सरुः ॥ ७.०५०.०२
यच्छल्मलौ भवति यन्नदीषु यदोषधीभ्यः परि जायते विषम् ।

विश्वे देवा निरितस्तत्सुवन्तु मा मां पद्येन रपसा विदत्सरुः ॥ ७.०५०.०३
याः प्रवतो निवत उद्धत उदन्वतीरनुदकाश्च याः ।
ता अस्मभ्यं पयसा पिन्वमानाः शिवा देवीरशिपदा भवन्तु सर्वा नद्यो अशिमिदा भवन्तु
॥ ७.०५०.०४

आदित्यानामवसा नूतनेन सक्षीमहि शर्मणा शंतमेन ।
अनागास्त्वे अदितित्वे तुरास इमं यज्ञं दधतु श्रोषमाणाः ॥ ७.०५१.०१
आदित्यासो अदितिर्मादयन्तां मित्रो अर्यमा वरुणो रजिष्ठाः ।
अस्माकं सन्तु भुवनस्य गोपाः पिबन्तु सोममवसे नो अद्य ॥ ७.०५१.०२
आदित्या विश्वे मरुतश्च विश्वे देवाश्च विश्व ऋभवश्च विश्वे ।
इन्द्रो अग्निरश्विना तुष्टुवाना यूयं पात स्वस्तिभिः सदा नः ॥ ७.०५१.०३
आदित्यासो अदितयः स्याम पूर्देवत्रा वसवो मर्त्यत्रा ।
सनेम मित्रावरुणा सनन्तो भवेम द्यावापृथिवी भवन्तः ॥ ७.०५२.०१
मित्रस्तत्रो वरुणो मामहन्त शर्म तोकाय तनयाय गोपाः ।
मा वो भुजेमान्यजातमेनो मा तत्कर्म वसवो यच्चयध्वे ॥ ७.०५२.०२
तुरण्यवोऽङ्गिरसो नक्षन्त रत्न देवस्य सवितुरियानाः ।
पिता च तन्नो महान्यजत्रो विश्वे देवाः समनसो जुषन्त ॥ ७.०५२.०३
प्र द्यावा यज्ञैः पृथिवी नमोभिः सबाध ईळे बृहती यजत्रे ।
ते चिद्धि पूर्वे कवयो गृणन्तः पुरो मही दधिरे देवपुत्रे ॥ ७.०५३.०१
प्र पूर्वजे पितरा नव्यसीभिर्गीर्भिः कृणुध्वं सद्ने ऋतस्य ।
आ नो द्यावापृथिवी दैव्येन जनेन यातं महि वां वरूथम् ॥ ७.०५३.०२
उतो हि वां रत्नधेयानि सन्ति पुरूणि द्यावापृथिवी सुदासे ।
अस्मे धत्तं यदसदस्कृधोयु यूयं पात स्वस्तिभिः सदा नः ॥ ७.०५३.०३
वास्तोष्पते प्रति जानीह्यस्मान्स्वावेशो अनमीवो भवा नः ।
यत्त्वेमहे प्रति तन्नो जुषस्व शं नो भव द्विपदे शं चतुष्पदे ॥ ७.०५४.०१
वास्तोष्पते प्रतरणो न एधि गयस्फानो गोभिरश्वभिरिन्द्रो ।
अजरासस्ते सख्ये स्याम पितेव पुत्रान्प्रति नो जुषस्व ॥ ७.०५४.०२
वास्तोष्पते शग्मया संसदा ते सक्षीमहि रण्वया गातुमत्या ।

पाहि क्षेम उत योगे वरं नो यूयं पात स्वस्तिभिः सदा नः ॥ ७.०५४.०३
 अमीवहा वास्तोष्पते विश्वा रूपाण्याविशन् ।
 सखा सुशेव एधि नः ॥ ७.०५५.०१
 यदर्जुन सारमेय दतः पिशङ्ग यच्छसे ।
 वीव भ्राजन्त ऋष्टय उप स्रक्केषु बप्सतो नि षु स्वप ॥ ७.०५५.०२
 स्तेनं राय सारमेय तस्करं वा पुनःसर ।
 स्तोतृनिन्द्रस्य रायसि किमस्मान्दुच्छुनायसे नि षु स्वप ॥ ७.०५५.०३
 त्वं सूकरस्य दर्दहि तव दर्दतु सूकरः ।
 स्तोतृनिन्द्रस्य रायसि किमस्मान्दुच्छुनायसे नि षु स्वप ॥ ७.०५५.०४
 सस्तु माता सस्तु पिता सस्तु श्वा सस्तु विशपतिः ।
 ससन्तु सर्वे ज्ञातयः सस्त्वयमभितो जनः ॥ ७.०५५.०५
 य आस्ते यश्च चरति यश्च पश्यति नो जनः ।
 तेषां सं हन्मो अक्षाणि यथेदं हर्म्यं तथा ॥ ७.०५५.०६
 सहस्रशृङ्गो वृषभो यः समुद्रादुदाचरत् ।
 तेना सहस्येना वयं नि जनान्स्वापयामसि ॥ ७.०५५.०७
 प्रोष्ठेशया वह्येशया नारीर्यास्तल्पशीवरीः ।
 स्त्रियो याः पुण्यगन्धास्ताः सर्वाः स्वापयामसि ॥ ७.०५५.०८
 क ई व्यक्ता नरः सनीळा रुद्रस्य मर्या अध स्वश्वाः ॥ ७.०५६.०१
 नकिह्येषां जनूपि वेद ते अङ्ग विद्रे मिथो जनित्रम् ॥ ७.०५६.०२
 अभि स्वपूभिर्मिथो वपन्त वातस्वनसः श्येना अस्पृधन् ॥ ७.०५६.०३
 एतानि धीरो निण्या चिकेत पृश्निर्यदूधो मही जभार ॥ ७.०५६.०४
 सा विट् सुवीरा मरुद्भिरस्तु सनात्सहन्ती पुष्यन्ती नृम्णम् ॥ ७.०५६.०५
 यामं येष्ठाः शुभा शोभिष्ठाः श्रिया सम्मिश्वा ओजोभिरुग्राः ॥ ७.०५६.०६
 उग्रं व ओजः स्थिरा शवांस्यधा मरुद्भिर्गणस्तुविष्मान् ॥ ७.०५६.०७
 शुभ्रो वः शुष्मः क्रुध्मी मनांसि धुनिर्मुनिरिव शर्धस्य धृष्णोः ॥ ७.०५६.०८
 सनेम्यस्मद्युयोत दिद्युं मा वो दुर्मतिरिह प्रणङ्गः ॥ ७.०५६.०९
 प्रिया वो नाम हुवे तुराणामा यत्तृपन्मरुतो वावशानाः ॥ ७.०५६.१०

स्वायुधास इष्मिणः सुनिष्का उत स्वयं तन्वः१ः शुम्भमानाः ॥ ७.०५६.११
 शुची वो हव्या मरुतः शुचीनां शुचिं हिनोम्यध्वरं शुचिभ्यः ।
 ऋतेन सत्यमृतसाप आयञ्छुचिजन्मानः शुचयः पावकाः ॥ ७.०५६.१२
 अंसेष्वा मरुतः खादयो वो वक्षस्सु रुक्मा उपशिश्त्रियाणाः ।
 वि विद्युतो न वृष्टिभी रुचाना अनु स्वधामायुधैर्यच्छमानाः ॥ ७.०५६.१३
 प्र बुध्या व ईरते महासि प्र नामानि प्रयज्यवस्तिरध्वम् ।
 सहस्रियं दम्यं भागमेतं गृहमेधीयं मरुतो जुषध्वम् ॥ ७.०५६.१४
 यदि स्तुतस्य मरुतो अधीथेतथा विप्रस्य वाजिनो हवीमन् ।
 मक्षू रायः सुवीर्यस्य दात नू चिद्यमन्य आदभदरावा ॥ ७.०५६.१५
 अत्यासो न ये मरुतः स्वञ्चो यक्षदृशो न शुभयन्त मर्याः ।
 ते हर्म्येष्ठाः शिशवो न शुभ्रा वत्सासो न प्रक्रीळिनः पयोधाः ॥ ७.०५६.१६
 दशस्यन्तो नो मरुतो मृळन्तु वरिवस्यन्तो रोदसी सुमेके ।
 आरे गोहा नृहा वधो वो अस्तु सुन्नेभिरस्मे वसवो नमध्वम् ॥ ७.०५६.१७
 आ वो होता जोहवीति सत्तः सत्रार्ची रातिं मरुतो गृणानः ।
 य ईवतो वृषणो अस्ति गोपाः सो अद्वयावी हवते व उक्थैः ॥ ७.०५६.१८
 इमे तुरं मरुतो रामयन्तीमे सहः सहस आ नमन्ति ।
 इमे शंसं वनुष्यतो नि पान्ति गुरु द्वेषो अररुषे दधन्ति ॥ ७.०५६.१९
 इमे रध्रं चिन्मरुतो जुनन्ति भूमिं चिद्यथा वसवो जुषन्त ।
 अप बाधध्वं वृषणस्तमासि धत्त विश्वं तनयं तोकमस्मे ॥ ७.०५६.२०
 मा वो दात्रान्मरुतो निरराम मा पश्चाद्दध्म रथ्यो विभागे ।
 आ नः स्पार्हे भजतना वसव्ये३ यदी सुजातं वृषणो वो अस्ति ॥ ७.०५६.२१
 सं यद्धनन्त मन्युभिर्जनासः शूरा यद्द्विष्वोषधीषु विक्षु ।
 अध स्मा नो मरुतो रुद्रियासस्त्रातारो भूत पृतनास्वर्यः ॥ ७.०५६.२२
 भूरि चक्र मरुतः पित्र्याण्युक्थानि या वः शस्यन्ते पुरा चित् ।
 मरुद्भिरुग्रः पृतनासु साव्हा मरुद्भिरित्सनिता वाजमर्वा ॥ ७.०५६.२३
 अस्मे वीरो मरुतः शुष्यस्तु जनानां यो असुरो विधर्ता ।
 अपो येन सुक्षितये तरेमाध स्वमोको अभि वः स्याम ॥ ७.०५६.२४

तन्न इन्द्रो वरुणो मित्रो अग्निराप ओषधीर्वनिनो जुषन्त ।
 शर्मन्स्याम मरुतामुपस्थे यूयं पात स्वस्तिभिः सदा नः ॥ ७.०५६.२५
 मध्वो वो नाम मारुतं यजत्राः प्र यज्ञेषु शवसा मदन्ति ।
 ये रेजयन्ति रोदसी चिदुर्वी पिन्वन्त्युत्सं यदयासुरुग्राः ॥ ७.०५७.०१
 निचेतारो हि मरुतो गृणन्तं प्रणेतारो यजमानस्य मन्म ।
 अस्माकमद्य विदथेषु बर्हिंरा वीतये सदत पिप्रियाणाः ॥ ७.०५७.०२
 नैतावदन्ये मरुतो यथेमे भ्राजन्ते रुक्मैरायुधैस्तनूभिः ।
 आ रोदसी विश्वपिशः पिशानाः समानमञ्ज्यञ्जते शुभे कम् ॥ ७.०५७.०३
 ऋधक्सा वो मरुतो दिद्युदस्तु यद्व आगः पुरुषता कराम ।
 मा वस्तस्यामपि भूमा यजत्रा अस्मे वो अस्तु सुमतिश्चनिष्ठा ॥ ७.०५७.०४
 कृते चिदत्र मरुतो रणन्तानवद्यासः शुचयः पावकाः ।
 प्र णोऽवत सुमतिभिर्यजत्राः प्र वाजैभिस्तिरत पुष्यसे नः ॥ ७.०५७.०५
 उत स्तुतासो मरुतो व्यन्तु विश्वभिर्नामभिर्नरो हवींषि ।
 ददात नो अमृतस्य प्रजायै जिगृत रायः सूनृता मघानि ॥ ७.०५७.०६
 आ स्तुतासो मरुतो विश्व ऊती अच्छा सूरीन्सर्वताता जिगात ।
 ये नस्त्मना शतिनो वर्धयन्ति यूयं पात स्वस्तिभिः सदा नः ॥ ७.०५७.०७
 प्र साकमुक्षे अर्चता गणाय यो दैव्यस्य धाम्नस्तुविष्मान् ।
 उत क्षोदन्ति रोदसी महित्वा नक्षन्ते नाकं निर्ऋतेरवंशात् ॥ ७.०५८.०१
 जनृश्चिद्वो मरुतस्त्वेष्येण भीमासस्तुविमन्यवोऽयासः ।
 प्र ये महोभिरोजसोत सन्ति विश्वो वो यामन्मयते स्वर्दृक् ॥ ७.०५८.०२
 बृहद्वयो मघवद्भ्यो दधात जुजोषन्निन्मरुतः सुष्टुतिं नः ।
 गतो नाध्वा वि तिराति जन्तुं प्र णः स्पार्हाभिरूतिभिस्तिरेत ॥ ७.०५८.०३
 युष्मोतो विप्रो मरुतः शतस्वी युष्मोतो अर्वा सहुरिः सहस्त्री ।
 युष्मोतः सम्राळूत हन्ति वृत्रं प्र तद्वो अस्तु धूतयो देष्णम् ॥ ७.०५८.०४
 ताँ आ रुद्रस्य मीळ्हुषो विवासे कुविन्नंसन्ते मरुतः पुनर्नः ।
 यत्सस्वर्ता जिहीळिरे यदाविरव तदेन ईमहे तुराणाम् ॥ ७.०५८.०५
 प्र सा वाचि सुष्टुतिर्मघोनामिदं सूक्तं मरुतो जुषन्त ।

आ॒रा॒च्चि॒द्वेषो॑ वृष॒णो यु॒योत॑ यु॒यं पा॒त स्व॒स्तिभिः॑ सदा॒ नः ॥ ७.०५८.०६
 यं त्रा॒यध्व॑ इ॒दमि॒दं दे॒वासो॑ यं च॒ नय॑थ ।
 तस्मा॑ अ॒ग्ने वरु॑ण मि॒त्राय॑म॒न्मरु॑तः शर्म॒ यच्छ॑त ॥ ७.०५९.०१
 यु॒ष्माकं॑ दे॒वा अव॑सा॒हनि॑ प्रि॒य ई॒जान॑स्तरति॒ द्विषः॑ ।
 प्र स॑ क्षयं॒ तिर॑ते वि॒ मही॑रिषो॒ यो वो॑ वरा॒य दा॑शति ॥ ७.०५९.०२
 नहि॑ व॒श्वर॑मं च॒न वसि॑ष्ठः परि॒मंस॑ते ।
 अ॒स्माक॑म॒द्य मरु॑तः सु॒ते स॒चा वि॒श्वे पि॑बत॒ कामि॑नः ॥ ७.०५९.०३
 नहि॑ व॒ ऊ॒तिः पृ॒तना॑सु॒ मर्ध॑ति॒ यस्मा॑ अ॒राध्वं॑ नरः ।
 अ॒भि व॒ आव॑त्सु॒मति॑र्नवी॒यसी॑ तू॒यं या॑त पिपीषवः ॥ ७.०५९.०४
 ओ षु॑ घृ॒ष्विरा॑धसो॒ यात॑ना॒न्धासि॑ पी॒तये॑ ।
 इ॒मा वो॑ ह॒व्या मरु॑तो॒ ररे॑ हि॒ कं मो॑ ष्व॒न्यत्र॑ गन्त॒न ॥ ७.०५९.०५
 आ च॑ नो॒ बर्हिः॑ स॒दता॑वि॒ता च॒ नः स्पा॑र्हा॒णि दा॑त॒वे वसु॑ ।
 अ॒स्त्रेध॑न्तो मरु॒तः सो॒म्ये म॑धौ॒ स्वाहे॑ह मा॒दया॑ध्वै ॥ ७.०५९.०६
 स॒स्वश्चि॑द्धि॒ तन्वः॑ शु॒म्भमा॑ना॒ आ हं॑सासो॒ नील॑पृ॒ष्ठा अ॑प॒त्न ।
 वि॒श्वं श॑धो॒ अभि॑तो॒ मा नि॑ षे॒द नरो॑ न॒ रण॑वाः स॒वने॑ म॒दन्तः॑ ॥ ७.०५९.०७
 यो नो॑ मरु॒तो अ॒भि दु॑र्ह॒णा॒युस्ति॑रश्चि॒त्तानि॑ वस॒वो जि॑घा॒सति॑ ।
 द्रु॒हः पा॑शा॒न्प्रति॑ स॒ मुची॑ष्ट॒ तपि॑ष्ठे॒न ह॑न्म॒ना ह॑न्त॒ना तम्॑ ॥ ७.०५९.०८
 सा॑त॒पना॒ इदं॑ ह॒विर्म॑रु॒तस्त॑ञ्जु॒जुष्ट॑न ।
 यु॒ष्माको॑ती रि॒शाद॑सः ॥ ७.०५९.०९
 गृ॒हमे॑धा॒स आ ग॑त॒ मरु॑तो॒ माप॑ भू॒तन॑ ।
 यु॒ष्माको॑ती सु॒दान॑वः ॥ ७.०५९.१०
 इ॒हेह॑ वः स्व॒तव॑सः॒ कव॑यः॒ सूर्य॑त्वचः ।
 य॒ज्ञं मरु॑त॒ आ वृ॑णे ॥ ७.०५९.११
 त्र्य॒म्बकं॑ य॒जाम॑हे सु॒गन्धि॑ पु॒ष्टि॒वर्ध॑नम् ।
 उ॒र्वारु॑कमि॒व ब॑न्ध॒नान्मृ॑त्यो॒र्मुक्षी॑य॒ मामृ॑तात् ॥ ७.०५९.१२
 य॒दद्य॑ सूर्य॒ ब्रवो॑ऽना॒गा उ॒द्यन्मि॑त्राय॒ वरु॑णाय॒ सत्य॑म् ।
 व॒यं दे॑व॒त्रादि॑ते स्याम॒ तव॑ प्रि॒यासो॑ अ॒र्यम॑न्गृणन्तः ॥ ७.०६०.०१

एष स्य मित्रावरुणा नृचक्षा उभे उदेति सूर्यो अभि ज्मन् ।
 विश्वस्य स्थातुर्जगतश्च गोपा ऋजु मर्तेषु वृजिना च पश्यन् ॥ ७.०६०.०२
 अयुक्त सप्त हरितः सधस्थाद्या ईं वहन्ति सूर्यं घृताचीः ।
 धामानि मित्रावरुणा युवाकुः सं यो यूथेव जनिमानि चष्टे ॥ ७.०६०.०३
 उद्वां पृक्षासो मधुमन्तो अस्थुरा सूर्यो अरुहच्छुक्रमर्णः ।
 यस्मा आदित्या अध्वनो रदन्ति मित्रो अर्यमा वरुणः सजोषाः ॥ ७.०६०.०४
 इमे चेतारो अनृतस्य भूरर्मित्रो अर्यमा वरुणो हि सन्ति ।
 इम ऋतस्य वावृधुर्दुरोणे शग्मासः पुत्रा अदितेरदब्धाः ॥ ७.०६०.०५
 इमे मित्रो वरुणो दूळभासोऽचेतसं चिच्चितयन्ति दक्षैः ।
 अपि क्रतुं सुचेतसं वतन्तस्तिरश्चिदंहः सुपथा नयन्ति ॥ ७.०६०.०६
 इमे दिवो अनिमिषा पृथिव्याश्चिकित्वांसो अचेतसं नयन्ति ।
 प्रव्राजे चिन्नद्यो गाधमस्ति पारं नो अस्य विष्पितस्य पर्षन् ॥ ७.०६०.०७
 यद्गोपावददितिः शर्म भद्रं मित्रो यच्छन्ति वरुणः सुदासे ।
 तस्मिन्ना तोकं तनयं दधाना मा कर्म देवहेळनं तुरासः ॥ ७.०६०.०८
 अव वेदिं होत्राभिर्यजेत रिपः काश्चिद्वरुणधृतः सः ।
 परि द्वेषाभिरर्यमा वृणक्तुरुं सुदासे वृषणा उ लोकम् ॥ ७.०६०.०९
 सस्वश्चिद्धि समृतिस्त्वेषामपीच्येन सहसा सहन्ते ।
 युष्मद्भिया वृषणो रेजमाना दक्षस्य चिन्महिना मृळता नः ॥ ७.०६०.१०
 यो ब्रह्मणे सुमतिमायजाते वाजस्य सातौ परमस्य रायः ।
 सीक्षन्त मन्युं मघवानो अर्य उरु क्षयाय चक्रिरे सुधातु ॥ ७.०६०.११
 इयं देव पुरोहितिर्युवभ्यां यज्ञेषु मित्रावरुणावकारि ।
 विश्वानि दुर्गा पिपृतं तिरो नो यूयं पात स्वस्तिभिः सदा नः ॥ ७.०६०.१२
 उद्वां चक्षुर्वरुण सुप्रतीकं देवयोरिति सूर्यस्ततन्वान् ।
 अभि यो विश्वा भुवनानि चष्टे स मन्युं मर्त्येष्वा चिकेत ॥ ७.०६१.०१
 प्र वां स मित्रावरुणावृतावा विप्रो मन्मानि दीर्घश्रुदियर्ति ।
 यस्य ब्रह्माणि सुक्रतू अवाथ आ यत्क्रत्वा न शरदः पृणैथे ॥ ७.०६१.०२
 प्रोरोमित्रावरुणा पृथिव्याः प्र दिव ऋष्वाद्बृहतः सुदानू ।

स्पशो दधाथे ओषधीषु विक्ष्वध्ग्यतो अनिमिषं रक्षमाणा ॥ ७.०६१.०३
 शंसा मित्रस्य वरुणस्य धाम शुष्मो रोदसी बद्धे महित्वा ।
 अयन्मासा अयज्वनामवीराः प्र यज्ञमन्मा वृजनं तिराते ॥ ७.०६१.०४
 अमूरा विश्वा वृषणाविमा वां न यासु चित्रं ददृशे न यक्षम् ।
 द्रुहः सचन्ते अनृता जनानां न वां निण्यान्यचिते अभूवन् ॥ ७.०६१.०५
 समु वां यज्ञं मह्यं नमोभिर्हुवे वां मित्रावरुणा सबाधः ।
 प्र वां मन्मान्यूचसे नवानि कृतानि ब्रह्म जुजुषन्निमानि ॥ ७.०६१.०६
 इयं देव पुरोहितिर्युवभ्यां यज्ञेषु मित्रावरुणावकारि ।
 विश्वानि दुर्गा पिपृतं तिरो नो यूयं पात स्वस्तिभिः सदा नः ॥ ७.०६१.०७
 उत्सूर्यो बृहदर्चीष्यश्रेत्पुरु विश्वा जनिम मानुषाणाम् ।
 समो दिवा ददृशे रोचमानः क्रत्वा कृतः सुकृतः कर्तृभिर्भूत् ॥ ७.०६२.०१
 स सूर्यं प्रति पुरो न उद्गा एभिः स्तोमैभिरेतशेभिरेवैः ।
 प्र नो मित्राय वरुणाय वोचोऽनागसो अर्यम्णे अग्रये च ॥ ७.०६२.०२
 वि नः सहस्रं शुरुधो रदन्त्वृतावानो वरुणो मित्रो अग्निः ।
 यच्छन्तु चन्द्रा उपमं नो अर्कमा नः कामं पूपुरन्तु स्तवानाः ॥ ७.०६२.०३
 द्यावाभूमौ अदिते त्रासीथां नो ये वां जज्ञुः सुजनिमान ऋष्वे ।
 मा हेळे भूम वरुणस्य वायोर्मा मित्रस्य प्रियतमस्य नृणाम् ॥ ७.०६२.०४
 प्र बाहवा सिस्मृतं जीवसे न आ नो गव्यूतिमुक्षतं घृतेन ।
 आ नो जने श्रवयतं युवाना श्रुतं मे मित्रावरुणा हवेमा ॥ ७.०६२.०५
 नू मित्रो वरुणो अर्यमा नस्त्मने तोकाय वरिवो दधन्तु ।
 सुगा नो विश्वा सुपथानि सन्तु यूयं पात स्वस्तिभिः सदा नः ॥ ७.०६२.०६
 उद्वेति सुभगो विश्वचक्षाः साधारणः सूर्यो मानुषाणाम् ।
 चक्षुर्मित्रस्य वरुणस्य देवश्चर्मैव यः समविव्यक्तमासि ॥ ७.०६३.०१
 उद्वेति प्रसवीता जनानां महान्केतुरर्णवः सूर्यस्य ।
 समानं चक्रं पर्याविवृत्सन्त्यदेतशो वहति धूर्षु युक्तः ॥ ७.०६३.०२
 विभ्राजमान उपसामुपस्थाद्रेभैरुदेत्यनुमद्यमानः ।
 एष मे देवः सविता चच्छन्द यः समानं न प्रमिनाति धाम ॥ ७.०६३.०३

दिवो रुक्म उरुचक्षा उदेति दूरेअर्थस्तरणिभ्राजमानः ।
 नूनं जनाः सूर्येण प्रसूता अयन्नर्थानि कृणवन्नपासि ॥ ७.०६३.०४
 यत्रा चक्रुरमुता गातुमस्मै श्येनो न दीयन्नन्वेति पाथः ।
 प्रति वां सूर उदिते विधेम नमोभिर्मित्रावरुणोत हव्यैः ॥ ७.०६३.०५
 नू मित्रो वरुणो अर्यमा नस्मने तोकाय वरिवो दधन्तु ।
 सुगा नो विश्वा सुपथानि सन्तु यूयं पात स्वस्तिभिः सदा नः ॥ ७.०६३.०६
 दिवि क्षयन्ता रजसः पृथिव्यां प्र वां घृतस्य निर्णिजो ददीरन् ।
 हव्यं नो मित्रो अर्यमा सुजातो राजा सुक्षत्रो वरुणो जुषन्त ॥ ७.०६४.०१
 आ राजाना मह ऋतस्य गोपा सिन्धुपती क्षत्रिया यातमर्वाक् ।
 इळा नो मित्रावरुणोत वृष्टिमव दिव इन्वतं जीरदानू ॥ ७.०६४.०२
 मित्रस्तत्रो वरुणो देवो अर्यः प्र साधिष्ठेभिः पथिभिर्नयन्तु ।
 ब्रवद्यथा न आदरिः सुदास इषा मदेम सह देवगोपाः ॥ ७.०६४.०३
 यो वां गर्तं मनसा तक्षदेतमूर्ध्वा धीतिं कृणवद्धारयच्च ।
 उक्षेथा मित्रावरुणा घृतेन ता राजाना सुक्षितीस्तर्पयेथाम् ॥ ७.०६४.०४
 एष स्तोमो वरुण मित्र तुभ्यं सोमः शुक्रो न वायवेऽयामि ।
 अविष्टं धियो जिगृतं पुरधीर्यूयं पात स्वस्तिभिः सदा नः ॥ ७.०६४.०५
 प्रति वां सूर उदिते सूक्तैर्मित्रं हुवे वरुणं पूतदक्षम् ।
 ययोरसुर्यश्मक्षितं ज्येष्ठं विश्वस्य यामन्नाचिता जिगन्तु ॥ ७.०६५.०१
 ता हि देवानामसुरा तावर्या ता नः क्षितीः करतमूर्जयन्तीः ।
 अश्याम मित्रावरुणा वयं वां द्यावा च यत्र पीपयन्नहा च ॥ ७.०६५.०२
 ता भूरिपाशावनृतस्य सेतू दुरत्येतू रिपवे मर्त्याय ।
 ऋतस्य मित्रावरुणा पथा वामपो न नावा दुरिता तरेम ॥ ७.०६५.०३
 आ नो मित्रावरुणा हव्यजुष्टिं घृतैर्गव्यूतिमुक्षतमिळाभिः ।
 प्रति वामत्र वरमा जनाय पृणीतमुद्रो दिव्यस्य चारोः ॥ ७.०६५.०४
 एष स्तोमो वरुण मित्र तुभ्यं सोमः शुक्रो न वायवेऽयामि ।
 अविष्टं धियो जिगृतं पुरधीर्यूयं पात स्वस्तिभिः सदा नः ॥ ७.०६५.०५
 प्र मित्रयोर्वरुणयोः स्तोमो न एतु शूष्यः ।

नमस्वान्तुविजातयोः ॥ ७.०६६.०१
 या धारयन्त देवाः सुदक्षा दक्षपितरा ।
 असुर्याय प्रमहसा ॥ ७.०६६.०२
 ता नः स्तिपा तनूपा वरुण जरितृणाम् ।
 मित्र साधयतं धियः ॥ ७.०६६.०३
 यदद्य सूर उदितेऽनागा मित्रो अर्यमा ।
 सुवाति सविता भगः ॥ ७.०६६.०४
 सुप्रावीरस्तु स क्षयः प्र नु यामन्सुदानवः ।
 ये नो अंहोऽतिपिप्रति ॥ ७.०६६.०५
 उत स्वराजो अदितिरदब्धस्य व्रतस्य ये ।
 महो राजान ईशते ॥ ७.०६६.०६
 प्रति वां सूर उदिते मित्रं गृणीषे वरुणम् ।
 अर्यमणं रिशादसम् ॥ ७.०६६.०७
 राया हिरण्यया मतिरियमवृकाय शवसे ।
 इयं विप्रा मेधसातये ॥ ७.०६६.०८
 ते स्याम देव वरुण ते मित्र सूरिभिः सह ।
 इषं स्वश्च धीमहि ॥ ७.०६६.०९
 बहवः सूरचक्षसोऽग्निजिह्वा ऋतावृधः ।
 त्रीणि ये येमुर्विदधानि धीतिभिर्विश्चानि परिभूतिभिः ॥ ७.०६६.१०
 वि ये दधुः शरदं मासमादहर्यज्ञमक्तुं चादृचम् ।
 अनाप्यं वरुणो मित्रो अर्यमा क्षत्रं राजान आशत ॥ ७.०६६.११
 तद्वो अद्य मनामहे सूक्तैः सूर उदिते ।
 यदोहते वरुणो मित्रो अर्यमा यूयमृतस्य रथ्यः ॥ ७.०६६.१२
 ऋतावान ऋतजाता ऋतावृधो घोरासो अनृतद्विषः ।
 तेषां वः सुम्ने सुच्छुर्दिष्टमे नरः स्याम ये च सूरयः ॥ ७.०६६.१३
 उदु त्यद्दर्शतं वपुर्दिव एति प्रतिह्वरे ।
 यदीमाशुर्वहति देव एतशो विश्वस्मै चक्षसे अरम् ॥ ७.०६६.१४

शीर्ष्णाः शीर्ष्णां जगतस्तस्थुषस्पतिं समया विश्वमा रजः ।
 सप्त स्वसारः सुविताय सूर्यं वहन्ति हरितो रथे ॥ ७.०६६.१५
 तच्चक्षुर्देवहितं शुक्रमुचरत् ।
 पश्येम शरदः शतं जीवेम शरदः शतम् ॥ ७.०६६.१६
 काव्यैभिरदाभ्या यातं वरुण द्युमत् ।
 मित्रश्च सोमपीतये ॥ ७.०६६.१७
 दिवो धामभिर्वरुण मित्रश्चा यातमद्रुहा ।
 पिबतं सोममातुजी ॥ ७.०६६.१८
 आ यातं मित्रावरुणा जुषाणावाहुतिं नरा ।
 पातं सोममृतावृधा ॥ ७.०६६.१९
 प्रति वां रथं नृपती जरध्यै हविष्मता मनसा यज्ञियेन ।
 यो वा दूतो न धिष्ण्यावजीगरच्छा सूनूर्न पितरा विवक्त्रि ॥ ७.०६७.०१
 अशोच्यग्निः समिधानो अस्मे उपो अदृश्रन्तमसश्चिदन्ताः ।
 अचेति केतुरुषसः पुरस्ताच्छ्रिये दिवो दुहितुर्जायमानः ॥ ७.०६७.०२
 अभि वां नूनमश्विना सुहोता स्तोमैः सिषक्ति नासत्या विवक्त्रान् ।
 पूर्वीभिर्यातं पथ्याभिरर्वाक्स्वर्विदा वसुमता रथेन ॥ ७.०६७.०३
 अवोर्वा नूनमश्विना युवाकुर्ह्वे यद्वां सुते माध्वी वसूयुः ।
 आ वां वहन्तु स्थविरासो अश्वः पिबाथो अस्मे सुषुता मधूनि ॥ ७.०६७.०४
 प्राचीमु देवाश्विना धियं मेऽमृध्रां सातये कृतं वसूयुम् ।
 विश्वा अविष्टं वाज आ पुरधीस्ता नः शक्तं शचीपती शचीभिः ॥ ७.०६७.०५
 अविष्टं धीष्वाश्विना न आसु प्रजावद्रेतो अहयं नो अस्तु ।
 आ वां तोके तनये तूतुजानाः सुरत्नासो देववीतिं गमेम ॥ ७.०६७.०६
 एष स्य वां पूर्वगत्वेव सख्ये निधिर्हितो माध्वी रातो अस्मे ।
 अहेळता मनसा यातमर्वागश्रन्ता हव्यं मानुषीषु विक्षु ॥ ७.०६७.०७
 एकस्मिन्योगे भुरणा समाने परि वां सप्त स्रवतो रथो गात् ।
 न वायन्ति सुभ्वो देवयुक्ता ये वां धूर्षु तरणयो वहन्ति ॥ ७.०६७.०८
 असश्रता मघवद्भ्यो हि भूतं ये राया मघदेयं जुनन्ति ।

प्र ये बन्धुं सूनृताभिस्तिरन्ते गव्या पृश्नन्तो अश्व्या मघानि ॥ ७.०६७.०९
 नू मे हवमा शृणुतं युवाना यासिष्टं वर्तिरश्विनाविरावत् ।
 धत्तं रत्नानि जरतं च सूरीन्युयं पात स्वस्तिभिः सदा नः ॥ ७.०६७.१०
 आ शुभ्रा यातमश्विना स्वश्वा गिरो दस्रा जुजुषाणा युवाकोः ।
 हव्यानि च प्रतिभृता वीतं नः ॥ ७.०६८.०१
 प्र वामन्धांसि मद्यान्यस्थुरं गन्तं हविषो वीतये मे ।
 तिरो अर्यो हवनानि श्रुतं नः ॥ ७.०६८.०२
 प्र वां रथो मनोजवा इयर्ति तिरो रजास्यश्विना शतोतिः ।
 अस्मभ्यं सूर्यावसू इयानः ॥ ७.०६८.०३
 अयं ह यद्वा देवया उ अद्रिरूर्ध्वो विवक्ति सोमसुद्युवभ्याम् ।
 आ वल्गू विप्रो ववृतीत हव्यैः ॥ ७.०६८.०४
 चित्रं ह यद्वां भोजनं न्वस्ति न्यत्रये महिष्वन्तं युयोतम् ।
 यो वामोमानं दधते प्रियः सन् ॥ ७.०६८.०५
 उत त्यद्वां जुरते अश्विना भूध्यवानाय प्रतीत्यं हविर्दे ।
 अधि यद्वर्ष इतऊति धत्थः ॥ ७.०६८.०६
 उत त्यं भुज्युमश्विना सखायो मध्ये जहदुरेवासः समुद्रे ।
 निरीं पर्षदरावा यो युवाकुः ॥ ७.०६८.०७
 वृकाय चिञ्जसमानाय शक्तमुत श्रुतं शयवे हूयमाना ।
 यावघ्न्यामपिन्वतमपो न स्तर्यं चिच्छत्तश्विना शचीभिः ॥ ७.०६८.०८
 एष स्य कारुर्जरते सूक्तैरग्रे बुधान उषसा सुमन्मा ।
 इषा तं वर्धदघ्न्या पयोभिर्युयं पात स्वस्तिभिः सदा नः ॥ ७.०६८.०९
 आ वां रथो रोदसी बद्धधानो हिरण्ययो वृषभिर्यात्वश्वैः ।
 घृतवर्तनिः पविभी रुचान इषां वोव्हा नृपतिर्वाजिनीवान् ॥ ७.०६९.०१
 स प्रप्रथानो अभि पञ्च भूमा त्रिवन्धुरो मनसा यातु युक्तः ।
 विशो येन गच्छथो देवयन्तीः कुत्रा चिद्याममश्विना दधाना ॥ ७.०६९.०२
 स्वश्वा यशसा यातमर्वाग्दस्रा निधिं मधुमन्तं पिबाथः ।
 वि वां रथो वध्वा इ यादमानोऽन्तान्दिवो बाधते वर्तनिभ्याम् ॥ ७.०६९.०३

युवोः श्रियं परि योषावृणीत सूरौ दुहिता परितकम्यायाम् ।
 यद्वैवयन्तमवथः शचीभिः परि ग्रंसमोमना वां वयो गात् ॥ ७.०६९.०४
 यो ह स्य वां रथिरा वस्त उस्त्रा रथो युजानः परियाति वर्तिः ।
 तेन नः शं योरुषसो व्युष्टौ न्यश्विना वहतं यज्ञे अस्मिन् ॥ ७.०६९.०५
 नरा गौरैव विद्युतं तृषाणास्माकमद्य सवनोप यातम् ।
 पुरुत्रा हि वां मतिभिर्हवन्ते मा वामन्ये नि यमन्देवयन्तः ॥ ७.०६९.०६
 युवं भुज्युमवविद्धं समुद्र उदूहथुरणसो अस्त्रिधानैः ।
 पतत्रिभिरश्रमैरव्यथिभिर्दंसनाभिरश्विना पारयन्ता ॥ ७.०६९.०७
 नू मे हवमा शृणुतं युवाना यासिष्टं वर्तिरश्विनाविरावत् ।
 धत्तं रत्नानि जरतं च सूरीन्यूयं पात स्वस्तिभिः सदा नः ॥ ७.०६९.०८
 आ विश्ववाराश्विना गतं नः प्र तत्स्थानमवाचि वां पृथिव्याम् ।
 अश्वो न वाजी शुनपृष्ठो अस्थादा यत्सेदथुर्ध्रुवसे न योनिम् ॥ ७.०७०.०१
 सिषक्ति सा वां सुमतिश्चनिष्ठातापि घर्मो मनुषो दुरोणे ।
 यो वां समुद्रान्सरितः पिपत्येतग्वा चित्र सुयुजा युजानः ॥ ७.०७०.०२
 यानि स्थानान्यश्विना दधाथे दिवो यद्द्विष्वोषधीषु विक्षु ।
 नि पर्वतस्य मूर्धनि सदन्तेषं जनाय दाशुषे वहन्ता ॥ ७.०७०.०३
 चनिष्टं देवा ओषधीष्वप्सु यद्योग्या अश्रवैथे ऋषीणाम् ।
 पुरूणि रत्ना दधतौ न्यशस्मे अनु पूर्वाणि चख्यथुर्युगानि ॥ ७.०७०.०४
 शुश्रुवांसा चिदश्विना पुरूण्यभि ब्रह्माणि चक्षाथे ऋषीणाम् ।
 प्रति प्र यातं वरमा जनायास्मे वामस्तु सुमतिश्चनिष्ठा ॥ ७.०७०.०५
 यो वां यज्ञो नासत्या हविष्मान्कृतब्रह्मा समर्योऽभवाति ।
 उप प्र यातं वरमा वसिष्ठमिमा ब्रह्माण्यच्यन्ते युवभ्याम् ॥ ७.०७०.०६
 इयं मनीषा इयमश्विना गीरिमां सुवृक्तिं वृषणा जुषेथाम् ।
 इमा ब्रह्माणि युवयून्यग्मन्यूयं पात स्वस्तिभिः सदा नः ॥ ७.०७०.०७
 अप स्वसुरुषसो नग्जिहीते रिणक्ति कृष्णीररुषाय पन्थाम् ।
 अश्वामघा गोमघा वां हुवेम दिवा नक्तं शरुमस्मद्युयोतम् ॥ ७.०७१.०१
 उपायातं दाशुषे मत्याय रथेन वाममश्विना वहन्ता ।

युयुतमस्मदनिराममीवां दिवा नक्तं माध्वी त्रासीथां नः ॥ ७.०७१.०२
आ वां रथमवमस्यां व्युष्टौ सुम्रायवो वृषणो वर्तयन्तु ।
स्यूमगभस्तिमृतयुग्भिरश्वैराश्विना वसुमन्तं वहेथाम् ॥ ७.०७१.०३
यो वां रथो नृपती अस्ति वोव्हा त्रिवन्धुरो वसुमाँ उस्रयामा ।
आ न एना नासत्योप यातमभि यद्वा विश्वप्स्यो जिगाति ॥ ७.०७१.०४
युवं च्यवानं जरसोऽमुमुक्तं नि पेदव ऊहथुराशुमश्वम् ।
निरंहसस्तमसः स्पर्तमत्रिं नि जाहृषं शिथिरे धातमन्तः ॥ ७.०७१.०५
इयं मनीषा इयमश्विना गीरिमां सुवृक्तिं वृषणा जुषेथाम् ।
इमा ब्रह्माणि युवयून्यग्मन्यून्यं पात स्वस्तिभिः सदा नः ॥ ७.०७१.०६
आ गोमता नासत्या रथेनाश्ववता पुरुश्चन्द्रेण यातम् ।
अभि वां विश्वा नियुतः सचन्ते स्पर्हया श्रिया तन्वा शुभाना ॥ ७.०७२.०१
आ नो देवेभिरुप यातमर्वाक्सजोषसा नासत्या रथेन ।
युवोर्हि नः सख्या पित्र्याणि समानो बन्धुरुत तस्य वित्तम् ॥ ७.०७२.०२
उदु स्तोमासो अश्विनोरबुध्रञ्जामि ब्रह्माण्युषसश्च देवीः ।
आविवासन्नोदसी धिष्ण्येमे अच्छ्वा विप्रो नासत्या विवक्ति ॥ ७.०७२.०३
वि चेदुच्छन्त्यश्विना उषासः प्र वां ब्रह्माणि कारवो भरन्ते ।
ऊर्ध्वं भानुं सविता देवो अश्रेद्बुहदग्नयः समिधा जरन्ते ॥ ७.०७२.०४
आ पश्चातान्नासत्या पुरस्तादाश्विना यातमधरादुदक्तात् ।
आ विश्वतः पाञ्चजन्येन राया यूयं पात स्वस्तिभिः सदा नः ॥ ७.०७२.०५
अतारिष्म तमसस्पारमस्य प्रति स्तोमं देवयन्तो दधानाः ।
पुरुदंसा पुरुतमा पुराजामर्त्या हवते अश्विना गीः ॥ ७.०७३.०१
न्यु प्रियो मनुषः सादि होता नासत्या यो यजते वन्दते च ।
अश्रीतं मध्वो अश्विना उपाक आ वां वोचे विदथेषु प्रयस्वान् ॥ ७.०७३.०२
अहेम यज्ञं पथामुराणा इमां सुवृक्तिं वृषणा जुषेथाम् ।
श्रुष्टीवेव प्रेषितो वामबोधि प्रति स्तोमैर्जरमाणो वसिष्ठः ॥ ७.०७३.०३
उप त्या वह्नी गमतो विशं नो रक्षोहणा सम्भृता वीळुपाणी ।
समन्धास्यग्मत मत्सराणि मा नो मर्धिष्टमा गतं शिवेन ॥ ७.०७३.०४

आ पश्चातान्नासत्या पुरस्तादाश्विना यातमधरादुदक्तात् ।
 आ विश्वतः पाञ्चजन्येन राया यूयं पात स्वस्तिभिः सदा नः ॥ ७.०७३.०५
 इमा उ वां दिविष्टय उस्ना हवन्ते अश्विना ।
 अयं वामह्वेऽवसे शचीवसू विशविशं हि गच्छथः ॥ ७.०७४.०१
 युवं चित्रं ददथुर्भोजनं नरा चोदेथां सूनृतावते ।
 अर्वाग्रथं समनसा नि यच्छतं पिबतं सोम्यं मधु ॥ ७.०७४.०२
 आ यातमुप भूषतं मध्वः पिबतमश्विना ।
 दुग्धं पयो वृषणा जेन्यावसू मा नो मर्धिष्टमा गतम् ॥ ७.०७४.०३
 अश्वसो ये वामुप दाशुषो गृहं युवां दीयन्ति बिभ्रतः ।
 मक्षुयुभिर्नरा ह्येभिरश्विना देवा यातमस्मयू ॥ ७.०७४.०४
 अधा ह यन्तो अश्विना पृक्षः सचन्त सूरयः ।
 ता यसतो मघवद्भ्यो ध्रुवं यशश्छर्दिरस्मभ्यं नासत्या ॥ ७.०७४.०५
 प्र ये ययुरवृकासो रथा इव नृपातारो जनानाम् ।
 उत स्वेन शवसा शूशुवुर्नर उत क्षियन्ति सुक्षितिम् ॥ ७.०७४.०६
 व्युषा आवो दिविजा ऋतेनाविष्कृण्वाना महिमानमागात् ।
 अप द्रुहस्तम आवरजुष्टमङ्गिरस्तमा पथ्या अजीगः ॥ ७.०७५.०१
 महे नो अद्य सुविताय बोध्युषो महे सौभगाय प्र यन्धि ।
 चित्रं रयिं यशसं धेह्यस्मे देवि मतेषु मानुषि श्रवस्युम् ॥ ७.०७५.०२
 एते त्ये भानवो दर्शतायाश्चित्रा उषसो अमृतास आगुः ।
 जनयन्तो दैव्यानि व्रतान्यापृणन्तो अन्तरिक्षा व्यस्थुः ॥ ७.०७५.०३
 एषा स्या युजाना पराकात्पञ्च क्षितीः परि सद्यो जिगाति ।
 अभिपश्यन्ती वयुना जनानां दिवो दुहिता भुवनस्य पत्नी ॥ ७.०७५.०४
 वाजिनीवती सूर्यस्य योषा चित्रामघा राय ईशे वसूनाम् ।
 ऋषिष्टुता जरयन्ती मघोन्युषा उच्छति वह्निभिर्गृणाना ॥ ७.०७५.०५
 प्रति द्युतानामरुषासो अश्वश्चित्रा अदृश्रन्नुषसं वहन्तः ।
 याति शुभ्रा विश्वपिशा रथेन दधाति रत्नं विधते जनाय ॥ ७.०७५.०६
 सत्या सत्येभिर्महती महद्भिर्देवी देवेभिर्यजता यजत्रैः ।

रुजद्बृहानि दददुस्त्रियाणां प्रति गाव उषसं वावशन्त ॥ ७.०७५.०७
 नू नो गोमद्वीरवद्धेहि रत्नमुषो अश्ववत्पुरुभोजो अस्मे ।
 मा नो बर्हिः पुरुषता निदे कर्ष्यं पात स्वस्तिभिः सदा नः ॥ ७.०७५.०८
 उदु ज्योतिरमृतं विश्वजन्यं विश्वानरः सविता देवो अश्रेत् ।
 ऋत्वा देवानामजनिष्ट चक्षुराविरकर्भुवनं विश्वमुषाः ॥ ७.०७६.०१
 प्र मे पन्था देवयाना अदृश्रन्नमर्धन्तो वसुभिरिष्कृतासः ।
 अभूदु केतुरुषसः पुरस्तात्प्रतीच्यागादधि हर्म्यभ्यः ॥ ७.०७६.०२
 तानीदहानि बहुलान्यासन्या प्राचीनमुदिता सूर्यस्य ।
 यतः परि जार इवाचरन्त्युषो ददृक्षे न पुनर्यतीव ॥ ७.०७६.०३
 त इद्वेवानां सधमाद आसन्नृतावानः कवयः पूर्व्यासः ।
 गूळ्हं ज्योतिः पितरो अन्वविन्दन्सत्यमन्ना अजनयन्नुषासम् ॥ ७.०७६.०४
 समान ऊर्वे अधि संगतासः सं जानते न यतन्ते मिथस्ते ।
 ते देवानां न मिनन्ति व्रतान्यमर्धन्तो वसुभिर्यादमानाः ॥ ७.०७६.०५
 प्रति त्वा स्तोमैरीळते वसिष्ठा उषर्बुधः सुभगे तुष्टुवांसः ।
 गवां नेत्री वाजपत्नी न उच्छोषः सुजाते प्रथमा जरस्व ॥ ७.०७६.०६
 एषा नेत्री राधसः सूनृतानामुषा उच्छन्ती रिभ्यते वसिष्ठैः ।
 दीर्घश्रुतं रयिमस्मे दधाना यूयं पात स्वस्तिभिः सदा नः ॥ ७.०७६.०७
 उपो रुरुचे युवतिर्न योषा विश्वं जीवं प्रसुवन्ती चरायै ।
 अभूदग्निः समिधे मानुषाणामकज्योतिर्बाधमाना तमासि ॥ ७.०७७.०१
 विश्वं प्रतीची सप्रथा उदस्थाद्गुशद्वासो विभ्रती शुक्रमश्वैत् ।
 हिरण्यवर्णा सुदृशीकसंदृग्गवां माता नेत्र्यहामरोचि ॥ ७.०७७.०२
 देवानां चक्षुः सुभगा वहन्ती श्वेतं नयन्ती सुदृशीकमश्वम् ।
 उषा अदर्शि रश्मिभिर्व्यक्ता चित्रामघा विश्वमनु प्रभूता ॥ ७.०७७.०३
 अन्तिवामा दूरे अमित्रमुच्छोर्वीं गव्यूतिमभयं कृधी नः ।
 यावय द्वेष आ भरा वसूनि चोदय राधो गृणते मघोनि ॥ ७.०७७.०४
 अस्मे श्रेष्ठेभिर्भानुभिर्वि भाह्युषो देवि प्रतियन्ती न आयुः ।
 इषं च नो दधती विश्ववारे गोमदश्ववद्रथवच्च राधः ॥ ७.०७७.०५

यां त्वा दिवो दुहितर्वर्धयन्त्युषः सुजाते मतिभिर्वसिष्ठाः ।
सास्मासु धा रयिमृष्वं बृहन्तं यूयं पात स्वस्तिभिः सदा नः ॥ ७.०७७.०६
प्रति केतवः प्रथमा अदृशन्नूर्ध्वा अस्या अञ्जयो वि श्रयन्ते ।
उषो अर्वाचा बृहता रथेन ज्योतिष्मता वाममस्मभ्यं वक्षि ॥ ७.०७८.०१
प्रति पीमग्निर्जरते समिद्धः प्रति विप्रासो मतिभिर्गृणन्तः ।
उषा याति ज्योतिषा बाधमाना विश्वा तमासि दुरिताप देवी ॥ ७.०७८.०२
एता उ त्याः प्रत्यदृशन्मुरस्ताञ्ज्योतिर्यच्छन्तीरुषसो विभातीः ।
अजीजनन्सूर्यं यज्ञमग्निमपाचीनं तमो अगादज्जुष्टम् ॥ ७.०७८.०३
अचेति दिवो दुहिता मघोनी विश्वे पश्यन्त्युषसं विभातीम् ।
आस्थाद्रथं स्वधया युज्यमानमा यमश्वासः सुयुजो वहन्ति ॥ ७.०७८.०४
प्रति त्वाद्य सुमनसो बुधन्तास्माकासो मघवानो वयं च ।
तित्विलायध्वमुषसो विभातीर्युयं पात स्वस्तिभिः सदा नः ॥ ७.०७८.०५
व्युषा आवः पथ्याश्च जनानां पञ्च क्षितीर्मानुषीर्बोधयन्ती ।
सुसंदग्भिरुक्षभिर्भानुमश्रेद्धि सूर्यो रोदसी चक्षसावः ॥ ७.०७९.०१
व्यञ्जते दिवो अन्तेष्वकून्विशो न युक्ता उषसो यतन्ते ।
सं ते गावस्तम आ वर्तयन्ति ज्योतिर्यच्छन्ति सवितेव बाहू ॥ ७.०७९.०२
अभूदुषा इन्द्रतमा मघोन्यजीजनत्सुविताय श्रवासि ।
वि दिवो देवी दुहिता दधात्यङ्गिरस्तमा सुकृते वसूनि ॥ ७.०७९.०३
तावदुषो राधो अस्मभ्यं रास्व यावत्स्तोतृभ्यो अरदो गृणाना ।
यां त्वा जज्ञुर्वृषभस्या रवेण वि दृक्कस्य दुरो अद्वैरौर्णोः ॥ ७.०७९.०४
देवदेवं राधसे चोदयन्त्यस्मद्यक्सूनृता ईरयन्ती ।
व्युच्छन्ती नः सनये धियो धा यूयं पात स्वस्तिभिः सदा नः ॥ ७.०७९.०५
प्रति स्तोमैभिरुषसं वसिष्ठा गीर्भिर्विप्रासः प्रथमा अबुध्रन् ।
विवर्तयन्तीं रजसी समन्ते आविष्कृण्वतीं भुवनानि विश्वा ॥ ७.०८०.०१
एषा स्या नव्यमायुर्दधाना गूढी तमो ज्योतिषोषा अबोधि ।
अग्र एति युवतिरह्याणा प्राचिकित्सूर्यं यज्ञमग्निम् ॥ ७.०८०.०२
अश्रावतीर्गोमतीर्न उषासो वीरवतीः सदमुच्छन्तु भद्राः ।

घृ॒तं दु॒हा॒ना वि॒श्वतः॑ प्र॒पी॒ता यू॒यं पा॒त स्व॒स्तिभिः॑ सदा॑ नः ॥ ७.०८०.०३
प्र॒त्यु॒ अद॒श्या॒यत्यु॑च्छ॒न्ती॒ दुहि॒ता दि॒वः ।
अपो॑ महि॑ व्ययति चक्ष॑से तमो॑ ज्योतिष्कृ॑णोति॒ सून॑री ॥ ७.०८१.०१
उदु॑स्त्रियाः सृ॒जते॑ सूर्यः॒ सचा॑ उ॒द्यन्न॑क्षत्रमर्चि॑वत् ।
तवे॑दुषो॒ व्युषि॑ सूर्यस्य च सं भ॑क्तेन गमेमहि ॥ ७.०८१.०२
प्रति॑ त्वा दु॒हितर्दि॑व उषो॑ जी॒रा अ॒भुत्स्महि॑ ।
या वह॑सि पु॒रु स्या॑र्ह वन॒न्वति॑ रत्नं॒ न दा॑शुषे मयः ॥ ७.०८१.०३
उच्छ॑न्ती॒ या कृ॑णोषि मं॒हना॑ महि प्रख्ये॑ दे॒वि स्व॑र्द॒शे ।
तस्या॑स्ते रत्न॒भाज॑ ई॒महे व॑यं स्याम॒ मात॑र्नु॒ सून॑वः ॥ ७.०८१.०४
तच्चि॑त्रं रा॒ध आ भ॑रोषो यद्दी॒र्घश्रु॑त्तमम् ।
यत्ते॑ दि॒वो दु॒हित॑र्म॒र्तभो॑ज॒नं तद्रा॑स्व भु॒नजा॑महै ॥ ७.०८१.०५
श्रवः॑ सूरि॒भ्यो अ॒मृत॑ वसु॒त्वनं॑ वाजा॑ अ॒स्मभ्यं॑ गो॒मतः॑ ।
चो॒दयि॑त्री म॒घोनः॑ सूनृ॒ताव॑त्युषा उच्छ॒दप॑ स्त्रिधः ॥ ७.०८१.०६
इन्द्रा॑वरुणा यु॒वम॑ध्वराय॒ नो वि॑शे ज॒नाय॑ महि शर्म॑ यच्छ॒तम् ।
दी॒र्घप्र॑यज्यु॒मति॑ यो व॒नुष्य॑ति व॒यं ज॑येम॒ पृत॑नासु दू॒द्व्यः ॥ ७.०८२.०१
स॒म्राळ॑न्यः स्व॒राळ॑न्य उच्यते वां म॒हान्ता॑विन्द्रा॒वरुणा॑ म॒हाव॑सू ।
विश्वे॑ दे॒वासः॑ पर॒मे व्यो॑मनि॒ सं वा॑मोजो॑ वृषणा॒ सं बलं॑ दधुः ॥ ७.०८२.०२
अ॒न्वपां॑ खा॒न्यतृ॑न्तमोज॒सा सूर्य॑मैरय॒तं दि॒वि प्र॑भुम् ।
इन्द्रा॑वरुणा मदे अस्य मा॒यिनो॑ऽपि॒न्वत॑म॒पितः॑ पि॒न्वतं॑ धियः ॥ ७.०८२.०३
यु॒वामि॑द्युत्सु॒ पृत॑नासु॒ वह्यो॑ यु॒वां क्षे॑मस्य प्र॒सवे॑ मि॒तज्ञ॑वः ।
ई॒शाना॑ वस्व उ॒भय॑स्य का॒रव॑ इन्द्रा॒वरुणा॑ सु॒हवा॑ ह॒वाम॑हे ॥ ७.०८२.०४
इन्द्रा॑वरुणा॒ यदि॑मानि च॒क्रथु॑र्वि॒श्वा जा॑तानि॒ भुव॑नस्य म॒ज्मना॑ ।
क्षे॒मेण॑ मि॒त्रो वरु॑णं दु॒वस्य॑ति मरु॒द्विरु॑ग्रः शु॒भम॑न्य ई॒यते ॥ ७.०८२.०५
म॒हे शु॒ल्काय॑ वरु॒णस्य॑ नु त्विष॑ ओ॒जो मि॑माते॒ ध्रुव॑मस्य॒ यत्स्व॑म् ।
अ॒जा॒मि॒मन्यः॑ श्रथ॒यन्त॑माति॒रद्भ्रे॑भि॒रन्यः॑ प्र वृ॒णोति॑ भू॒यसः॑ ॥ ७.०८२.०६
न तमं॑हो न दुरि॒तानि॑ म॒र्त्यमि॑न्द्रा॒वरुणा॑ न तपः॑ कु॒तश्च॑न ।
यस्य॑ दे॒वा गच्छ॑थो वी॒थो अ॑ध्व॒रं न तं॑ म॒र्तस्य॑ न॒शते॑ परि॒ह्वतिः॑ ॥ ७.०८२.०७

अर्वाङ्गरा दैव्येनावसा गतं शृणुतं हवं यदि मे जुजोषथः ।
 युवोर्हि सख्यमुत वा यदाप्यं मार्डीकमिन्द्रावरुणा नि यच्छतम् ॥ ७.०८२.०८
 अस्माकमिन्द्रावरुणा भरेभरे पुरोयोधा भवतं कृष्ट्योजसा ।
 यद्वां हवन्त उभये अध स्पृधि नरस्तोकस्य तनयस्य सातिषु ॥ ७.०८२.०९
 अस्मे इन्द्रो वरुणो मित्रो अर्यमा द्युमं यच्छन्तु महि शर्म सप्रथः ।
 अवध्रं ज्योतिरदितेऋतावृधो देवस्य श्लोकं सवितुर्मनामहे ॥ ७.०८२.१०
 युवां नरा पश्यमानास आप्यं प्राचा गव्यन्तः पृथुपश्वो ययुः ।
 दासा च वृत्रा हतमार्याणि च सुदासमिन्द्रावरुणावसावतम् ॥ ७.०८३.०१
 यत्रा नरः समयन्ते कृतध्वजो यस्मिन्नाजा भवति किं चन प्रियम् ।
 यत्रा भयन्ते भुवना स्वर्दशस्तत्रा न इन्द्रावरुणाधि वोचतम् ॥ ७.०८३.०२
 सं भूम्या अन्ता ध्वसिरा अदृक्षतेन्द्रावरुणा दिवि घोष आरुहत् ।
 अस्थुर्जनानामुप मामरातयोऽर्वागवसा हवनश्रुता गतम् ॥ ७.०८३.०३
 इन्द्रावरुणा वधनाभिरप्रति भेदं वन्वन्ता प्र सुदासमावतम् ।
 ब्रह्माण्येषां शृणुतं हवीमनि सत्या तृत्सूनामभवत्पुरोहितिः ॥ ७.०८३.०४
 इन्द्रावरुणावभ्या तपन्ति माघान्यर्यो वनुषामरातयः ।
 युवं हि वस्व उभयस्य राजथोऽध स्मा नोऽवतं पायै दिवि ॥ ७.०८३.०५
 युवां हवन्त उभयास आजिष्विन्द्रं च वस्वो वरुणं च सातये ।
 यत्र राजभिर्दशभिर्निबाधितं प्र सुदासमावतं तृत्सुभिः सह ॥ ७.०८३.०६
 दश राजानः समिता अयज्यवः सुदासमिन्द्रावरुणा न युयुधुः ।
 सत्या नृणामद्मसदामुपस्तुतिर्देवा एषामभवन्देवहूतिषु ॥ ७.०८३.०७
 दाशराज्ञे परियत्ताय विश्वतः सुदास इन्द्रावरुणावशिक्षतम् ।
 श्वित्यञ्चो यत्र नमसा कपर्दिनो धिया धीवन्तो असपन्त तृत्सवः ॥ ७.०८३.०८
 वृत्राण्यन्यः समिथेषु जिघ्रते व्रतान्यन्यो अभि रक्षते सदा ।
 हवामहे वां वृषणा सुवृक्तिभिरस्मे इन्द्रावरुणा शर्म यच्छतम् ॥ ७.०८३.०९
 अस्मे इन्द्रो वरुणो मित्रो अर्यमा द्युमं यच्छन्तु महि शर्म सप्रथः ।
 अवध्रं ज्योतिरदितेऋतावृधो देवस्य श्लोकं सवितुर्मनामहे ॥ ७.०८३.१०
 आ वा राजानावध्वरे ववृत्यां हव्येभिरिन्द्रावरुणा नमोभिः ।

प्र वां घृताचीं बाह्वोर्दधाना परि त्मना विषुरूपा जिगाति ॥ ७.०८४.०१
 युवो राष्ट्रं बृहदिन्वति द्यौर्यौ सेतृभिररञ्जुभिः सिनीथः ।
 परि नो हेळो वरुणस्य वृज्या उरुं न इन्द्रः कृणवदु लोकम् ॥ ७.०८४.०२
 कृतं नो यज्ञं विदथेषु चारुं कृतं ब्रह्माणि सूरिषु प्रशस्ता ।
 उपो रयिर्देवजूतो न एतु प्र णः स्पार्हाभिरूतिभिस्तिरेतम् ॥ ७.०८४.०३
 अस्मे इन्द्रावरुणा विश्ववारं रयिं धत्तं वसुमन्तं पुरुक्षुम् ।
 प्र य आदित्यो अनृता मिनात्यमिता शूरो दयते वसूनि ॥ ७.०८४.०४
 इयमिन्द्रं वरुणमष्ट मे गीः प्रावत्तोके तनये तूतुजाना ।
 सुरत्वासो देववीतिं गमेम यूयं पात स्वस्तिभिः सदा नः ॥ ७.०८४.०५
 पुनीषे वामरक्षसं मनीषां सोममिन्द्राय वरुणाय जुह्वत् ।
 घृतप्रतीकामुषसं न देवीं ता नो यामन्नुरुष्यतामभीके ॥ ७.०८५.०१
 स्पधन्ते वा उ देवहूये अत्र येषु ध्वजेषु दिद्यवः पतन्ति ।
 युवं ताँ इन्द्रावरुणावमित्रान्हतं पराचः शर्वा विषूचः ॥ ७.०८५.०२
 आपश्चिद्धि स्वयशसः सदस्सु देवीरिन्द्रं वरुणं देवता धुः ।
 कृष्टीरन्यो धारयति प्रविक्ता वृत्राण्यन्यो अप्रतीनि हन्ति ॥ ७.०८५.०३
 स सुक्रतुर्ऋतचिदस्तु होता य आदित्य शवसा वां नमस्वान् ।
 आववर्तदवसे वां हविष्मानसदित्स सुविताय प्रयस्वान् ॥ ७.०८५.०४
 इयमिन्द्रं वरुणमष्ट मे गीः प्रावत्तोके तनये तूतुजाना ।
 सुरत्वासो देववीतिं गमेम यूयं पात स्वस्तिभिः सदा नः ॥ ७.०८५.०५
 धीरा त्वस्य महिना जनूषि वि यस्तस्तम्भ रोदसी चिदुर्वी ।
 प्र नाकमृष्वं नुनुदे बृहन्तं द्विता नक्षत्रं पप्रथच्च भूम ॥ ७.०८६.०१
 उत स्वया तन्वा३ सं वदे तत्कदा न्वशन्तर्वरुणे भुवानि ।
 किं मे हव्यमहृणानो जुषेत कदा मृळीकं सुमना अभि रव्यम् ॥ ७.०८६.०२
 पृच्छे तदेनो वरुण दिदृक्षूपो एमि चिकितुषो विपृच्छम् ।
 समानमिन्मे कवयश्चिदाहरयं ह तुभ्यं वरुणो हृणीते ॥ ७.०८६.०३
 किमाग आस वरुण ज्येष्ठं यत्स्तोतारं जिघांससि सखायम् ।
 प्र तन्मे वोचो दूळभ स्वधावोऽव त्वानेना नमसा तुर इयाम् ॥ ७.०८६.०४

अव॑ द्रु॒ग्धानि॑ पित्र्या॑ सृजा॒ नोऽव॑ या वयं॑ च॒कृमा॑ त॒नूभिः॑ ।
 अव॑ राज॒न्यशु॑तृपं॒ न ता॑युं सृजा॒ वत्सं॑ न दाम्नो॑ वसिष्ठम् ॥ ७.०८६.०५
 न स॑ स्वो दक्षो॑ वरुण॒ धृतिः॑ सा सुरा॑ म॒न्युर्वि॑भीदको॒ अचित्तिः॑ ।
 अस्ति॑ ज्याया॒नकनी॑यस॒ उपारे॑ स्वप्रश्च॒नेदनृ॑तस्य प्रयोता ॥ ७.०८६.०६
 अरं॑ दासो॒ न मी॑व्हुषे॒ करा॑ण्यहं देवाय॑ भूर्णयेऽनागाः ।
 अचे॑तयद॒चितो॑ देवो अ॒र्यो गृ॑त्सं रा॒ये क॒वितरो॑ जुनाति ॥ ७.०८६.०७
 अयं॑ सु तुभ्यं॑ वरुण॒ स्वधा॑वो हृदि॒ स्तोम॑ उपश्रितश्चिदस्तु ।
 शं नः॑ क्षेमे॒ शमु॑ योगे॒ नो अस्तु॑ यूयं पात॒ स्वस्ति॑भिः सदा॒ नः ॥ ७.०८६.०८
 रद॑त्पथो वरुणः॒ सूर्या॑य प्राणा॑सि॒ समु॑द्रिया॒ नदीना॑म् ।
 सर्गो॑ न सृष्टो॒ अवती॑र्क॒ताय॑श्चकार॒ मही॑रवनीरह॒भ्यः ॥ ७.०८७.०१
 आ॒त्मा ते॑ वातो॒ रज॑ आ नवीनोत्प॒शुर्न भूर्णि॑र्यवसे॒ सस॑वान् ।
 अ॒न्तर्म॑ही बृ॒हती॑ रोदसीमे॒ विश्वा॑ ते धाम॒ वरुण॑ प्रियाणि ॥ ७.०८७.०२
 परि॑ स्पशो॒ वरुण॑स्य॒ स्मदि॑ष्टा उ॒भे प॑श्यन्ति॒ रोदसी॑ सुमेके ।
 ऋ॒तावानः॑ क॒वयो॑ य॒ज्ञधी॑राः प्रचेतसो॒ य इ॒षय॑न्त॒ मन्म ॥ ७.०८७.०३
 उवाच॑ मे वरुणो॒ मेधि॑राय॒ त्रिः सप्त॑ नामाघ्या॒ बिभ॑र्ति ।
 वि॒द्वान्पद॑स्य॒ गुह्या॑ न वोचद्यु॒गाय॑ विप्र॒ उपरा॑य॒ शिक्ष॑न् ॥ ७.०८७.०४
 तिस्रो॑ द्यावो॒ निहि॑ता अ॒न्तर॑स्मिन्ति॒स्रो भू॑मीरुपराः॒ षड्वि॑धानाः ।
 गृ॒त्सो राजा॑ वरुणश्चक्र॒ एतं॑ दि॒वि प्रे॒ङ्खं हि॑रण्ययं॒ शुभे॑ कम् ॥ ७.०८७.०५
 अव॑ सिन्धुं॒ वरु॑णो द्यौरिव॒ स्थाद्र॑प्सो न श्चेतो॒ मृग॑स्तुविष्मान् ।
 ग॒म्भीर॑शंसो॒ रज॑सो वि॒मानः॑ सु॒पा॒रक्ष॑त्रः सतो॒ अस्य॑ राजा ॥ ७.०८७.०६
 यो मृ॒ळया॑ति च॒क्रुषे॑ चिदागो॒ वयं॑ स्याम॒ वरु॑णे अनागाः ।
 अनु॑ व्र॒तान्य॑दितेः॒ऋध॑न्तो॒ यूयं॑ पात॒ स्वस्ति॑भिः सदा॒ नः ॥ ७.०८७.०७
 प्र शु॒न्युवं॑ वरुणाय॒ प्रेष्ठां॑ मतिं॒ वसि॑ष्ठ मी॒व्हुषे॑ भरस्व ।
 य ई॒मर्वा॑श्चं॒ करते॑ यजत्रं॒ सह॑स्रामघं॒ वृष॑णं बृहन्तम् ॥ ७.०८८.०१
 अधा॑ न्वस्य॒ संदृ॑शं॒ जग॑न्वान॒ग्नेर॑नीकं॒ वरु॑णस्य मंसि ।
 स्व॑र्षदश्मन्नधिपा उ॒ अ॒न्योऽभि॑ मा॒ वपु॑र्दृशये॒ निनी॑यात् ॥ ७.०८८.०२
 आ यद्रु॑हाव॒ वरु॑णश्च॒ नावं॑ प्र॒ यत्स॑मु॒द्रमी॑रयाव॒ मध्य॑म् ।

अधि॑ यदपां॑ सुभि॑श्चराव॑ प्र प्रेङ्ख॑ ईङ्ख्यावहे॑ शुभे॑ कम् ॥ ७.०८८.०३
 वसिष्ठं॑ ह वरु॑णो ना॒व्याधा॑दृषिं॒ चकार॑ स्वपा॒ महो॑भिः ।
 स्तो॒तारं॑ विप्रः॒ सुदि॑नत्वे अ॒ह्नां या॒न्नु द्या॑वस्त॒तन॒न्यादु॑पासः ॥ ७.०८८.०४
 क्व॑ त्यानि॒ नौ स॒ख्या ब॒भूवुः॑ सचा॑वहे॒ यदवु॑कं पुरा॒ चित् ।
 बृह॑न्तं मानं॑ वरु॒ण स्व॑धावः स॒हस्र॑द्वारं॒ जग॑मा गृहं॑ ते ॥ ७.०८८.०५
 य आ॒पिर्नित्यो॑ वरु॒ण प्रि॑यः सन्त्वामागा॑सि कृ॒णव॑त्सखा॒ ते ।
 मा त॑ ए॒नस्व॑न्तो यक्षि॒न्भुजे॑म यन्धि॒ ष्मा वि॑प्रः स्तु॒वते॑ वरू॒थम् ॥ ७.०८८.०६
 ध्रु॒वासु॑ त्वा॒सु क्षि॑तिषु॒ क्षिय॑न्तो व्य॑स्मत्पाशं॒ वरु॑णो मुमोचत् ।
 अ॒वो व॒न्वाना॑ अ॒दिते॑रु॒पस्था॑द्यूयं॒ पात॑ स्व॒स्तिभिः॑ सदा॒ नः ॥ ७.०८८.०७
 मो षु॑ वरु॒ण मृ॒न्मयं॑ गृहं॒ राज॑न्नहं॒ गम॑म् ।
 मृ॒ळा सु॑क्षत्र॒ मृळ॑य ॥ ७.०८९.०१
 यदे॒मि प्र॑स्फुरन्नि॒व दृति॑र्न ध्मा॒तो अ॒द्रिवः॑ ।
 मृ॒ळा सु॑क्षत्र॒ मृळ॑य ॥ ७.०८९.०२
 ऋ॒त्वः स॒मह॑ दी॒नता॑ प्रती॒पं ज॑गमा शु॒चे ।
 मृ॒ळा सु॑क्षत्र॒ मृळ॑य ॥ ७.०८९.०३
 अ॒पां मध्ये॑ तस्थि॒वांसं॑ तृ॒ष्णावि॑दञ्ज॒रितार॑म् ।
 मृ॒ळा सु॑क्षत्र॒ मृळ॑य ॥ ७.०८९.०४
 यत्किं॑ चेदं॒ वरु॑ण॒ दैव्ये॑ जनेऽभि॒द्रोहं॑ म॒नुष्या॑श्च॒राम॑सि ।
 अ॒चिती॑ यत्त॒व धर्मा॑ यु॒योपि॑म मा न॒स्तस्मा॑दे॒नसो॑ दे॒व री॑रिषः ॥ ७.०८९.०५
 प्र वी॑रया शु॒चयो॑ दद्रे॒रे वाम॑ध्वर्युभिर्मधु॒मन्तः॑ सु॒तासः॑ ।
 वह॑ वा॒यो नि॒युतो॑ या॒ह्यच्छा॑ पि॒बा सु॒तस्या॑न्ध॒सो म॑दाय ॥ ७.०९०.०१
 ई॒शाना॑य प्र॒हुतिं॑ यस्त॒ आ॒नट् छुचिं॑ सोमं॒ शुचि॑पास्तु॒भ्य वा॑यो ।
 कृ॒णोषि॑ तं म॒र्त्येषु॑ प्रश॒स्तं जा॒तोजा॑तो जा॒यते॑ वा॒ज्यस्य॑ ॥ ७.०९०.०२
 रा॒ये नु॑ यं ज॒ज्ञतू॑ रोद॒सीमे॑ रा॒ये दे॒वी धि॑षणा॒ धाति॑ दे॒वम् ।
 अध॑ वा॒युं नि॒युतः॑ सश्च॒त स्वा॒ उत॑ श्वेतं॒ वसु॑धितिं॒ निरे॑के ॥ ७.०९०.०३
 उ॒च्छन्न॑पसः॒ सुदि॑ना॒ अरि॑प्रा॒ उरु॑ ज्योतिर्वि॒विदु॑र्दी॒ध्यानाः॑ ।
 गव्यं॑ चि॒दूर्व॑मु॒शिजो॑ वि॒वब्रु॑स्तेषाम॒नु प्र॑दिवः॒ सस्रु॑रापः ॥ ७.०९०.०४

ते सत्येन मनसा दीध्यानाः स्वेन युक्तासः ऋतुना वहन्ति ।
 इन्द्रवायू वीरवाहं रथं वामीशानयोरभि पृक्षः सचन्ते ॥ ७.०९०.०५
 ईशानासो ये दधते स्वर्णो गोभिरश्वेभिर्वसुभिर्हिरण्यैः ।
 इन्द्रवायू सूरयो विश्वमायुरवृद्धिर्वीरिः पृतनासु सद्युः ॥ ७.०९०.०६
 अर्वन्तो न श्रवसो भिक्षमाणा इन्द्रवायू सुष्टुतिभिर्वसिष्ठाः ।
 वाजयन्तः स्ववसे हुवेम यूयं पात स्वस्तिभिः सदा नः ॥ ७.०९०.०७
 कुविदङ्ग नमसा ये वृधासः पुरा देवा अनवद्यास आसन् ।
 ते वायवे मनवे बाधितायावासयन्नुषसं सूर्येण ॥ ७.०९१.०१
 उशन्ता दूता न दभाय गोपा मासश्च पाथः शरदश्च पूर्वीः ।
 इन्द्रवायू सुष्टुतिर्वामियाना मार्डीकमीट्टे सुवितं च नव्यम् ॥ ७.०९१.०२
 पीवोअत्राँ रयिवृधः सुमेधाः श्वेतः सिषक्ति नियुतामभिशीः ।
 ते वायवे समनसो वि तस्थुर्विश्वेन्नरः स्वपत्यानि चक्रुः ॥ ७.०९१.०३
 यावत्तरस्तन्वो३ यावदोजो यावन्नरश्चक्षसा दीध्यानाः ।
 शुचिं सोमं शुचिपा पातमस्मे इन्द्रवायू सदतं बहिरिदम् ॥ ७.०९१.०४
 नियुवाना नियुतः स्पर्हवीरा इन्द्रवायू सरथं यातमर्वाक् ।
 इदं हि वां प्रभृतं मध्वो अग्रमध प्रीणाना वि मुमुक्तमस्मे ॥ ७.०९१.०५
 या वां शतं नियुतो याः सहस्रमिन्द्रवायू विश्ववाराः सचन्ते ।
 आभिर्यातं सुविदत्राभिरर्वाक्पातं नरा प्रतिभृतस्य मध्वः ॥ ७.०९१.०६
 अर्वन्तो न श्रवसो भिक्षमाणा इन्द्रवायू सुष्टुतिभिर्वसिष्ठाः ।
 वाजयन्तः स्ववसे हुवेम यूयं पात स्वस्तिभिः सदा नः ॥ ७.०९१.०७
 आ वायो भूष शुचिपा उप नः सहस्रं ते नियुतो विश्ववार ।
 उपो ते अन्धो मद्यमयामि यस्य देव दधिषे पूर्वपेयम् ॥ ७.०९२.०१
 प्र सोता जीरो अध्वरेष्वस्थात्सोममिन्द्राय वायवे पिबध्वै ।
 प्र यद्वां मध्वो अग्रियं भरन्त्यध्वर्यवो देवयन्तः शचीभिः ॥ ७.०९२.०२
 प्र याभिर्यासिं दाश्वान्समच्छा नियुद्धिर्वायविष्टये दुरोणे ।
 नि नो रयिं सुभोजसं युवस्व नि वीरं गव्यमश्व्यं च राधः ॥ ७.०९२.०३
 ये वायव इन्द्रमादनास आदेवासो नितोशनासो अर्यः ।

घ्नन्तो वृत्राणि सुरिभिः प्याम सासह्वांसो युधा नृभिरमित्रान् ॥ ७.०९२.०४
 आ नो नियुद्धिः शतिनीभिरध्वरं सहस्रिणीभिरुप याहि यज्ञम् ।
 वायो अस्मिन्सवने मादयस्व यूयं पात स्वस्तिभिः सदा नः ॥ ७.०९२.०५
 शुचिं नु स्तोमं नवजातमद्येन्द्राग्नी वृत्रहणा जुषेथाम् ।
 उभा हि वां सुहवा जोहवीमि ता वाजं सद्य उशते धेष्ठा ॥ ७.०९३.०१
 ता सानसी शवसाना हि भूतं साकंवृधा शवसा शूशुवांसा ।
 क्षयन्तौ रायो यवसस्य भूरेः पृङ्गं वाजस्य स्थविरस्य घृष्वेः ॥ ७.०९३.०२
 उपो ह यद्विदथं वाजिनो गुर्धोभिर्विप्राः प्रमतिमिच्छमानाः ।
 अर्वन्तो न काष्ठां नक्षमाणा इन्द्राग्नी जोहुवतो नरस्ते ॥ ७.०९३.०३
 गीर्भिर्विप्रः प्रमतिमिच्छमान ईद्रे रयिं यशसं पूर्वभाजम् ।
 इन्द्राग्नी वृत्रहणा सुवज्रा प्र नो नव्येभिस्तिरतं देष्णैः ॥ ७.०९३.०४
 सं यन्मही मिथती स्पर्धमाने तनुरुचा शूरसाता यतैते ।
 अदेवयुं विदथे देवयुभिः सत्रा हतं सोमसुता जनेन ॥ ७.०९३.०५
 इमामु षु सोमसुतिमुप न एन्द्राग्नी सौमनसाय यातम् ।
 नू चिद्धि परिमम्राथे अस्माना वां शश्वद्विर्वृतीय वाजैः ॥ ७.०९३.०६
 सो अग्र एना नमसा समिद्धोऽच्छा मित्रं वरुणमिन्द्र वोचेः ।
 यत्सीमागश्चक्रुमा तत्सु मृळ तदर्यमादितिः शिश्रथन्तु ॥ ७.०९३.०७
 एता अग्र आशुषाणास इष्टीर्युवोः सचाभ्यश्याम वाजान् ।
 मेन्द्रो नो विष्णुर्मरुतः परि ख्यन्युयं पात स्वस्तिभिः सदा नः ॥ ७.०९३.०८
 इयं वामस्य मन्मन इन्द्राग्नी पूर्व्यस्तुतिः ।
 अभ्राद्दृष्टिरिवाजनि ॥ ७.०९४.०१
 शृणुतं जरितुर्हवमिन्द्राग्नी वनतं गिरः ।
 ईशाना पिप्यतं धियः ॥ ७.०९४.०२
 मा पापत्वाय नो नरेन्द्राग्नी माभिशस्तये ।
 मा नो रीरधतं निदे ॥ ७.०९४.०३
 इन्द्रे अग्रा नमो बृहत्सुवृक्तिमेरयामहे ।
 धिया धेना अवस्यवः ॥ ७.०९४.०४

ता हि शश्वन्त ईळत इत्था विप्रास ऊतये ।
 सबाधो वाजसातये ॥ ७.०९४.०५
 ता वा गीर्भिर्विपन्यवः प्रयस्वन्तो हवामहे ।
 मेधसाता सनिष्यवः ॥ ७.०९४.०६
 इन्द्राग्नी अवसा गतमस्मभ्य चर्षणीसहा ।
 मा नो दुःशंस ईशत ॥ ७.०९४.०७
 मा कस्य नो अररुषो धूर्तिः प्रणङ्गत्यस्य ।
 इन्द्राग्नी शर्म यच्छतम् ॥ ७.०९४.०८
 गोमद्धिरण्यवद्वसु यद्वामश्ववदीमहे ।
 इन्द्राग्नी तद्वनेमहि ॥ ७.०९४.०९
 यत्सोम आ सुते नर इन्द्राग्नी अजोहवुः ।
 सप्तीवन्ता सपर्यवः ॥ ७.०९४.१०
 उक्थेभिर्वृत्रहन्तमा या मन्दाना चिदा गिरा ।
 आङ्गुषैराविवासतः ॥ ७.०९४.११
 ताविदुःशंसं मर्त्यं दुर्विद्वांसं रक्षस्विनम् ।
 आभोगं हन्मना हतमुदधिं हन्मना हतम् ॥ ७.०९४.१२
 प्र क्षोदसा धायसा सस्र एषा सरस्वती धरुणमायसी पूः ।
 प्रबाबधाना रथ्येव याति विश्वा अपो महिना सिन्धुरन्याः ॥ ७.०९५.०१
 एकाचेतत्सरस्वती नदीनां शुचिर्यती गिरिभ्य आ समुद्रात् ।
 रायश्चेतन्ती भुवनस्य भूरेर्घृतं पयो दुदुहे नाहुषाय ॥ ७.०९५.०२
 स वावृधे नर्यो योषणासु वृषा शिशुर्वृषभो यज्ञियासु ।
 स वाजिनं मघवद्भ्यो दधाति वि सातये तन्व मामृजीत ॥ ७.०९५.०३
 उत स्या नः सरस्वती जुषाणोप श्रवत्सुभगा यज्णे अस्मिन् ।
 मितज्जुभिर्नमस्येरियाना राया युजा चिदुत्तरा सखिभ्यः ॥ ७.०९५.०४
 इमा जुह्वाना युष्मदा नमोभिः प्रति स्तोमं सरस्वति जुषस्व ।
 तव शर्मन्प्रियतमे दधाना उप स्थेयाम शरणं न वृक्षम् ॥ ७.०९५.०५
 अयमु ते सरस्वति वसिष्ठो द्वारावृतस्य सुभगे व्यावः ।

वर्धं शुभ्रे स्तुवते रासि वाजान्युयं पात स्वस्तिभिः सदा नः ॥ ७.०१५.०६
बृहदु गायिषे वचोऽसुर्या नदीनाम् ।
सरस्वतीमिन्महया सुवृक्तिभिः स्तोमैर्वसिष्ठ रोदसी ॥ ७.०१६.०१
उभे यत्ते महिना शुभ्रे अन्धसी अधिक्षियन्ति पूरवः ।
सा नो बोध्यवित्री मरुत्सखा चोद राधो मघोनाम् ॥ ७.०१६.०२
भद्रमिद्भद्रा कृणवत्सरस्वत्यकवारी चेतति वाजिनीवती ।
गृणाना जमदग्निवत्स्तुवाना च वसिष्ठवत् ॥ ७.०१६.०३
जनीयन्तो न्वग्रवः पुत्रीयन्तः सुदानवः ।
सरस्वन्तं हवामहे ॥ ७.०१६.०४
ये ते सरस्व ऊर्मयो मधुमन्तो घृतश्रुतः ।
तेभिर्नोऽविता भव ॥ ७.०१६.०५
पीपिवांसं सरस्वतः स्तनं यो विश्वदर्शतः ।
भक्षीमहि प्रजामिषम् ॥ ७.०१६.०६
यज्ञे दिवो नृषदने पृथिव्या नरो यत्र देवयवो मदन्ति ।
इन्द्राय यत्र सवनानि सुन्वे गमन्मदाय प्रथमं वयश्च ॥ ७.०१७.०१
आ दैव्या वृणीमहेऽवासि बृहस्पतिर्नो मह आ सखायः ।
यथा भवेम मीळ्हुषे अनागा यो नो दाता परावतः पितेव ॥ ७.०१७.०२
तमु ज्येष्ठं नमसा हविर्भिः सुशेवं ब्रह्मणस्पति गृणीषे ।
इन्द्रं श्लोको महि दैव्यः सिषक्तु यो ब्रह्मणो देवकृतस्य राजा ॥ ७.०१७.०३
स आ नो योनि सदतु प्रेष्ठो बृहस्पतिर्विश्ववारो यो अस्ति ।
कामो रायः सुवीर्यस्य तं दात्पषन्नो अति सश्चतो अरिष्टान् ॥ ७.०१७.०४
तमा नो अर्कममृताय जुष्टमिमे धासुरमृतासः पुराजाः ।
शुचिक्रन्दं यजतं पस्त्यानां बृहस्पतिमनर्वाणं हुवेम ॥ ७.०१७.०५
तं शग्मासो अरुपासो अश्वा बृहस्पतिं सहवाहो वहन्ति ।
सहश्चिद्यस्य नीलवत्सधस्थं नभो न रूपमरुपं वसानाः ॥ ७.०१७.०६
स हि शुचिः शतपत्रः स शुन्ध्युर्हिरण्यवाशीरिषिरः स्वर्षाः ।
बृहस्पतिः स स्वावेश ऋष्वः पूरु सखिभ्य आसुति करिष्ठः ॥ ७.०१७.०७

दे॒वी दे॒वस्य॑ रोद॒सी जनि॑त्री बृह॒स्पति॑ वावृधतुर्म॒हित्वा ।
 द॒क्षाया॑य दक्षता सखायः कर॒द्ब्रह्म॑णे सुतरा सुगा॒धा ॥ ७.०१७.०८
 इ॒यं वा॑ ब्रह्मणस्पते सुवृ॒क्तिर्ब्रह्मेन्द्रा॑य व॒ज्रिणे॑ अकारि ।
 अ॒विष्टं॑ धियो जिगृ॒तं पुर॑धीर्ज॒जस्तम॑र्यो व॒नुषाम॑रातीः ॥ ७.०१७.०९
 बृह॒स्पते॑ युवमिन्द्रश्च वस्वो दि॒व्यस्ये॑शाथे उ॒त पा॑र्थिवस्य ।
 ध॒त्तं र॒यिं स्तु॒वते॑ की॒रये॑ चि॒द्युयं॑ पा॒त स्व॒स्तिभिः॑ सदा नः ॥ ७.०१७.१०
 अध्व॑र्यवोऽरुणं दुग्धमंशुं जुहोतन वृषभाय क्षितीनाम् ।
 गौरा॑द्वेदीयाँ अव॒पान॑मिन्द्रो विश्वाहेद्याति सुतसोममिच्छन् ॥ ७.०१८.०१
 यद्दधि॑षे प्रदिवि चार्वन्नं दि॒वेदे॒वे पी॒तिमि॑दस्य वक्षि ।
 उ॒त हृ॑दोत मनसा जुषाण उ॒शन्नि॑न्द्र प्रस्थितान्याहि सोमान् ॥ ७.०१८.०२
 ज॒ज्ञानः॑ सोमं सहसे पपाथ प्र ते माता महिमानमुवाच ।
 ए॒न्द्र प्र॑पार्थोर्व॑न्तरिक्षं युधा दे॒वेभ्यो॑ वरिवश्चकर्थ ॥ ७.०१८.०३
 यद्यो॑धया महतो मन्यमानान्साक्षाम तान्बाहुभिः शाशदानान् ।
 यद्वा नृभि॑र्वृत इन्द्राभियुध्यास्तं त्वयाजिं सोश्रवसं जयेम ॥ ७.०१८.०४
 प्रेन्द्र॑स्य वोचं प्रथमा कृतानि प्र नूतना मघवा या चकार ।
 यदे॒ददे॒वीर॑सहिष्ट माया अथाभवत्केवलः सोमो अस्य ॥ ७.०१८.०५
 तवे॒दं वि॒श्वम॑भितः पशव्यं॑ यत्पश्यसि चक्षसा सूर्यस्य ।
 गवा॑मसि गोपतिरेक इन्द्र भक्षीमहि ते प्रयतस्य वस्वः ॥ ७.०१८.०६
 बृह॒स्पते॑ युवमिन्द्रश्च वस्वो दि॒व्यस्ये॑शाथे उ॒त पा॑र्थिवस्य ।
 ध॒त्तं र॒यिं स्तु॒वते॑ की॒रये॑ चि॒द्युयं॑ पा॒त स्व॒स्तिभिः॑ सदा नः ॥ ७.०१८.०७
 परो॑ मात्रया तन्वा वृधान न ते महित्वमन्वश्नुवन्ति ।
 उ॒भे ते॑ विद्म रजसी पृथिव्या विष्णो देव त्वं परमस्य वित्से ॥ ७.०१९.०१
 न ते॑ विष्णो जायमानो न जातो देव महिम्नः परमन्तमाप ।
 उ॒दस्त॑भ्रा नाकमुष्वं बृहन्तं दाधर्थं प्राचीं ककुभं पृथिव्याः ॥ ७.०१९.०२
 इ॒राव॑ती धेनुमती हि भूतं सूयवसिनी मनुषे दशस्या ।
 व्य॒स्तभ्रा॑ रोदसी विष्णवेते दाधर्थं पृथिवीमभितो मयूखैः ॥ ७.०१९.०३
 उ॒रुं य॒ज्ञाय॑ चक्रथुरु लोकं जनयन्ता सूर्यमुषासमग्निम् ।

दासस्य चिद्वृषशिप्रस्य माया जघ्नथुर्नरा पृतनाज्येषु ॥ ७.०९९.०४
इन्द्राविष्णू दृहिताः शम्बरस्य नव पुरो नवतिं च श्रथिष्टम् ।
शतं वर्चिनः सहस्रं च साकं हथो अप्रत्यसुरस्य वीरान् ॥ ७.०९९.०५
इयं मनीषा बृहती बृहन्तोरुक्रमा तवसा वर्धयन्ती ।
ररे वां स्तोमं विदथेषु विष्णो पिन्वतमिषो वृजनेष्विन्द्र ॥ ७.०९९.०६
वषट् ते विष्णवास आ कृणोमि तन्मे जुषस्व शिपिविष्ट हव्यम् ।
वर्धन्तु त्वा सुष्टुतयो गिरो मे यूयं पात स्वस्तिभिः सदा नः ॥ ७.०९९.०७
नू मर्तो दयते सनिष्यन्त्यो विष्णव उरुगायाय दाशत् ।
प्र यः सत्राचा मनसा यजात एतावन्तं नर्यमाविवासात् ॥ ७.१००.०१
त्वं विष्णो सुमतिं विश्वजन्यामप्रयुतामेवयावो मतिं दाः ।
पर्चो यथा नः सुवितस्य भूरेश्चावतः पुरुश्चन्द्रस्य रायः ॥ ७.१००.०२
त्रिदेवः पृथिवीमेष एतां वि चक्रमे शतचसं महित्वा ।
प्र विष्णुरस्तु तवसस्तवीयान्त्वेपं ह्यस्य स्थविरस्य नाम ॥ ७.१००.०३
वि चक्रमे पृथिवीमेष एतां क्षेत्राय विष्णुर्मनुषे दशस्यन् ।
ध्रुवासो अस्य कीरयो जनास उरुक्षितिं सुजनिमा चकार ॥ ७.१००.०४
प्र तत्ते अद्य शिपिविष्ट नामार्यः शंसामि वयुनानि विद्वान् ।
तं त्वा गृणामि तवसमतव्यान्क्षयन्तमस्य रजसः पराके ॥ ७.१००.०५
किमित्ते विष्णो परिचक्ष्यं भूत्र यद्ववक्षे शिपिविष्टो अस्मि ।
मा वर्षो अस्मदपं गूह एतद्यदन्यरूपः समिथे बभूथ ॥ ७.१००.०६
वषट् ते विष्णवास आ कृणोमि तन्मे जुषस्व शिपिविष्ट हव्यम् ।
वर्धन्तु त्वा सुष्टुतयो गिरो मे यूयं पात स्वस्तिभिः सदा नः ॥ ७.१००.०७
तिस्रो वाचः प्र वद ज्योतिरग्रा या एतद्गृहे मधुदोघमूधः ।
स वत्सं कृण्वन्गर्भमोषधीनां सद्यो जातो वृषभो रोरवीति ॥ ७.१०१.०१
यो वर्धन ओषधीनां यो अपां यो विश्वस्य जगतो देव ईशे ।
स त्रिधातु शरणं शर्म यंसन्निवर्तु ज्योतिः स्वभिष्ट्र१स्मे ॥ ७.१०१.०२
स्त्रीरु त्वद्भवति सूत उ त्वद्यथावशं तन्व चक्र एषः ।
पितुः पयः प्रति गृभ्णाति माता तेन पिता वर्धते तेन पुत्रः ॥ ७.१०१.०३

यस्मिन्विश्वानि भुवनानि तस्थुस्तिस्त्रो द्यावस्त्रेधा ससुरापः ।
 त्रयः कोशास उपसेचनासो मध्वः श्रोतन्त्यभितो विरप्शाम् ॥ ७.१०१.०४
 इदं वचः पर्जन्याय स्वराजे हृदो अस्त्वन्तरं तञ्जुजोषत् ।
 मयोभुवो वृष्टयः सन्त्वस्मे सुपिप्पला ओषधीर्देवगोपाः ॥ ७.१०१.०५
 स रेतोधा वृषभः शश्वतीनां तस्मिन्नात्मा जगतस्तस्थुषश्च ।
 तन्म ऋतं पातु शतशारदाय यूयं पात स्वस्तिभिः सदा नः ॥ ७.१०१.०६
 पर्जन्याय प्र गायत दिवस्पुत्राय मीळ्हुषे ।
 स नो यवसमिच्छतु ॥ ७.१०२.०१
 यो गर्भमोषधीनां गवां कृणोत्यर्वताम् ।
 पर्जन्यः पुरुषीणाम् ॥ ७.१०२.०२
 तस्मा इदास्ये हविर्जुहोता मधुमत्तमम् ।
 इळा नः संयतं करत् ॥ ७.१०२.०३
 संवत्सरं शशयाना ब्राह्मणा व्रतचारिणः ।
 वाचं पर्जन्यजिन्वितां प्र मण्डूका अवादिषुः ॥ ७.१०३.०१
 दिव्या आपो अभि यदेनमायन्दृतिं न शुष्कं सरसी शयानम् ।
 गवामह न मायुर्वत्सिनीनां मण्डूकानां वयुरत्रा समेति ॥ ७.१०३.०२
 यदीमेनाँ उशतो अभ्यवर्षीत्तृष्यावतः प्रावृष्यागतायाम् ।
 अखलीकृत्या पितरं न पुत्रो अन्यो अन्यमुप वदन्तमेति ॥ ७.१०३.०३
 अन्यो अन्यमनु गृभ्णात्येनोरपां प्रसर्गे यदमन्दिषाताम् ।
 मण्डूको यदभिवृष्टः कनिष्कन्युश्रिः सम्पृङ्गे हरितेन वाचम् ॥ ७.१०३.०४
 यदेषामन्यो अन्यस्य वाचं शाक्तस्येव वदति शिक्षमाणः ।
 सर्वं तदेषां समृधेव पर्व यत्सुवाचो वदथनाध्यप्सु ॥ ७.१०३.०५
 गोमायुरेको अजमायुरेकः पृश्निरेको हरित एक एषाम् ।
 समानं नाम बिभ्रतो विरूपाः पुरुत्रा वाचं पिपिशुर्वदन्तः ॥ ७.१०३.०६
 ब्राह्मणासो अतिरात्रे न सोमे सरो न पूर्णमभितो वदन्तः ।
 संवत्सरस्य तदहः परि छ यन्मण्डूकाः प्रावृषीण बभूव ॥ ७.१०३.०७
 ब्राह्मणासः सोमिनो वाचमक्रत ब्रह्म कृण्वन्तः परिवत्सरीणम् ।

अध्वर्यवो घर्मिणः सिष्विदाना आविर्भवन्ति गुह्या न के चित् ॥ ७.१०३.०८
 देवहितं जुगुपुर्द्वादशस्य ऋतुं नरो न प्र मिनन्त्येते ।
 संवत्सरे प्रावृष्यागतायां तप्ता घर्मा अश्रुवते विसर्गम् ॥ ७.१०३.०९
 गोमायुरदादजमायुरदात्पृश्निरदाद्धरितो नो वसूनि ।
 गवां मण्डूका ददतः शतानि सहस्रसावे प्र तिरन्त आयुः ॥ ७.१०३.१०
 इन्द्रासोमा तपतं रक्ष उज्जतं न्यर्पयतं वृषणा तमोवृधः ।
 परा शृणीतमचितो न्योषतं हतं नुदेथां नि शिशीतमत्रिणः ॥ ७.१०४.०१
 इन्द्रासोमा समघशंसमभ्यश्घं तपुर्ययस्तु चरुरग्निवाँ इव ।
 ब्रह्मद्विषे ऋव्यादे घोरचक्षसे द्वेषो धत्तमनवायं किमीदिने ॥ ७.१०४.०२
 इन्द्रासोमा दुष्कृतो वव्रे अन्तरनारम्भणे तमसि प्र विध्यतम् ।
 यथा नातः पुनरेकश्चनोदयत्तद्दामस्तु सहसे मन्युमच्छवः ॥ ७.१०४.०३
 इन्द्रासोमा वर्तयतं दिवो वधं सं पृथिव्या अघशंसाय तर्हणम् ।
 उत्तक्षतं स्वर्यं पर्वतेभ्यो येन रक्षो वावृधानं निजूवथः ॥ ७.१०४.०४
 इन्द्रासोमा वर्तयतं दिवस्पर्यग्नितप्तेभिर्युवमश्महन्मभिः ।
 तपुर्वधेभिरजरैभिरत्रिणो नि पशाने विध्यतं यन्तु निस्वरम् ॥ ७.१०४.०५
 इन्द्रासोमा परि वां भूतु विश्वत इयं मतिः कक्ष्याश्वेव वाजिना ।
 यां वां होत्रां परिहिनोमि मेधयेमा ब्रह्माणि नृपतीव जिन्वतम् ॥ ७.१०४.०६
 प्रति स्मरेथां तुजयद्विरेवैर्हतं द्रुहो रक्षसो भङ्गुरावतः ।
 इन्द्रासोमा दुष्कृते मा सुगं भूद्यो नः कदा चिदभिदासति द्रुहा ॥ ७.१०४.०७
 यो मा पाकेन मनसा चरन्तमभिचष्टे अनृतेभिर्वचोभिः ।
 आप इव काशिना संगृभीता असन्नस्त्वासत इन्द्र वक्ता ॥ ७.१०४.०८
 ये पाकशंसं विहरन्त एवैर्ये वा भद्रं दूषयन्ति स्वधाभिः ।
 अहये वा तान्प्रददातु सोम आ वा दधातु निर्ऋतेरुपस्थे ॥ ७.१०४.०९
 यो नो रसं दिप्सति पित्वो अग्ने यो अश्वानां यो गवां यस्तनूनाम् ।
 रिपुः स्तेनः स्तेयकृद्भ्रमेतु नि ष हीयतां तन्वा३ तना च ॥ ७.१०४.१०
 परः सो अस्तु तन्वा३ तना च तिस्रः पृथिवीरधो अस्तु विश्वाः ।
 प्रति शुष्यतु यशो अस्य देवा यो नो दिवा दिप्सति यश्च नक्तम् ॥ ७.१०४.११

सुविज्ञानं चिकितुषे जनाय सच्चासच्च वचसी पस्पृधाते ।
तयोर्यत्सत्यं यतरदृजीयस्तदित्सोमोऽवति हन्त्यासत् ॥ ७.१०४.१२
न वा उ सोमो वृजिनं हिनोति न क्षत्रियं मिथुया धारयन्तम् ।
हन्ति रक्षो हन्त्यासद्वदन्तमुभाविन्द्रस्य प्रसितौ शयाते ॥ ७.१०४.१३
यदि वाहमनृतदेव आस मोघं वा देवाँ अप्यूहे अग्ने ।
किमस्मभ्यं जातवेदो हृणीषे द्रोघवाचस्ते निर्ऋथं सचन्ताम् ॥ ७.१०४.१४
अद्या मुरीय यदि यातुधानो अस्मि यदि वायुस्ततप पूरुषस्य ।
अधा स वीरैर्दशभिर्वि यूया यो मा मोघं यातुधानेत्याह ॥ ७.१०४.१५
यो मायातुं यातुधानेत्याह यो वा रक्षाः शुचिरस्मीत्याह ।
इन्द्रस्तं हन्तु महता वधेन विश्वस्य जन्तोरधमस्पदीष्ट ॥ ७.१०४.१६
प्र या जिगाति खर्गलेव नक्तमप द्रुहा तन्वंश गूहमाना ।
वव्राँ अनन्ताँ अव सा पदीष्ट ग्रावाणो घ्नन्तु रक्षस उपब्दैः ॥ ७.१०४.१७
वि तिष्ठध्वं मरुतो विक्ष्विश्च्छत गृभायत रक्षसः सं पिनष्टन ।
वयो ये भूत्वी पतयन्ति नक्तभिर्ये वा रिपो दधिरे देवे अध्वरे ॥ ७.१०४.१८
प्र वर्तय दिवो अश्मानमिन्द्र सोमशितं मघवन्सं शिशाधि ।
प्राक्तादपाक्तादधरादुक्तादभि जहि रक्षसः पर्वतेन ॥ ७.१०४.१९
एत उ त्ये पतयन्ति श्वयातव इन्द्र दिप्सन्ति दिप्सवोऽदाभ्यम् ।
शिशीते शक्रः पिशुनेभ्यो वधं नूनं सृजदशनि यातुमद्भ्यः ॥ ७.१०४.२०
इन्द्रो यातूनामभवत्पराशरो हविर्मथीनामभ्याश्वासाताम् ।
अभीदु शक्रः परशुर्यथा वनं पात्रेव भिन्दन्सत एति रक्षसः ॥ ७.१०४.२१
उलूकयातुं शुशुलूकयातुं जहि श्वयातुमुत कोकयातुम् ।
सुपर्णयातुमुत गृध्रयातुं दृषदेव प्र मृण रक्ष इन्द्र ॥ ७.१०४.२२
मा नो रक्षो अभि नड्रातुमावतामपोच्छतु मिथुना या किमीदिना ।
पृथिवी नः पार्थिवात्पात्वंहसोऽन्तरिक्षं दिव्यात्पात्वस्मान् ॥ ७.१०४.२३
इन्द्र जहि पुमांसं यातुधानमुत स्त्रिय मायया शाशदानाम् ।
विप्रीवासो मूरदेवा ऋदन्तु मा ते दृशन्सूर्यमुच्चरन्तम् ॥ ७.१०४.२४
प्रति चक्ष्व वि चक्ष्वेन्द्रश्च सोम जागृतम् ।

रक्षो॑भ्यो॒ व॒धम॑स्यतम॒शनि॑ यातुम॒द्भ्यः॑ ॥ ७.१०४.२५

Last updated July 2, 2013

Special mention : Initial processing and help by Avinash and Shashi Sathaye, Avinash Choppe, Shree Devi Kumar, Sunder Hattangadi, John Gardner.

Reprocessed from Original in final form by Detlef Eichler with additional corrections.

See Detlef's site <http://www.detlef108.de/Rigvedatm>

for other details and formats.

The text is shown with accents (Anudattas, dependent Svaritas, and independent Svaritas including Kampas). Words are connected (agnimILe).

Ch is doubled as in gachChati according to the rules of Rigveda-Pratishakhya.

At the end of a word m is replaced by Anusvara M if the initial letter of the following word is a labial stop consonant (p, ph, b, bh, m).

Visarga H before sh, Sh or s followed by a voiceless consonant has been restored.

Source : The Aufrecht/van Nooten/Holland (Samhita) version

of the Rigveda (<http://www.people.fasarvard.edu/witzel/onlineRVtm>).

In this text accented vowels have Udatta or 'independent Svarita' markers.

Kampas are not shown. Words are separated (agnim ILe).


Ch is not doubled as in gaChati. At the end of a word we find m before a following labial stop consonant (p, ph, b, bh, m).

Visarga H before sh, Sh or s followed by a voiceless consonant has been dropped according to a rule of Rigveda-Pratishakhya.

Send corrections to : detlefeichler@googlemail.com, sanskrit@cheerful.com

——
Rigveda Mandala 7

pdf was typeset on October 2, 2020

——
Please send corrections to sanskrit@cheerful.com

